

# El Santo Evangelio Según

# San Lucas

---

**1** <sup>1</sup>Jabi Jesú ani ca jahuë bo yoati tsi huéstima cabá quënëniquë.  
Noqui xéréquë xo tsi ja ani ca ja quënëcani quiha. <sup>2</sup>Jesu rabëti  
bo, toatiyá jisnish cabo, tihi cabá yoani ca ja quënëcaniquë no  
tsayano iquish na. <sup>3</sup>Jabi ja quënëcani ca tēquë è tsayarianiquë éa  
ri ra. Tsayariaxo tsi jaboqui jatiroha ca rëquë rohari ca jahuë bo  
yoati tsi quënëbonacasquia éa ri, Teofiló. <sup>4</sup>Nëca tsi Jesu yoati mi  
bax quënëcasquia, jabija ca tēquë mi cahëno, mi parahacayamano  
iquish na. Jia tsi mia ja tiisimacani ca jahuë bo mi cahëyoino ra.

## Zacarías qui ángel jonina

<sup>5</sup>Jabi jodioba mai xo tsi chama Herodés yonano tsi quiha tobi  
arati ibo iniquë, naa Zacarías icanai cato. Abías icanai ca maxo ya  
tsi quiha ja yonoconiquë arati xobó no. Jabi Elisabet jahuë ahuini  
janë ini quiha. Jasca, arati ibo bo jahuë ahuini jimi bo ini quiha  
jato ri. Arati ibo ba chahitaxocobo ja ini quiha. <sup>6</sup>Jabi Zacarías,  
Elisabet, tihi cabá Dios noirianiquë. Quësotimaxëni ca shinajiaxëni  
ca ja icani quiha. Jasca, Dios yoba bo tēquë ja nicacani quiha ra.  
<sup>7</sup>Jasca, baquë yama ja icaniquë rë, tohoyatimaxëni Elisabet ini  
quëshpi na. Jasca, sirixëni ja icani quiha.

<sup>8</sup>Huësti barí tsi quiha jahuë maxo ya Zacarías iniquë arati  
xobó no. Arati iboba yonoco aqui ja ini quiha. <sup>9</sup>Toatiyá tsi ja  
raahacaniquë iboba iti qui jicoti, altar xo tsi incienso mëshati.  
<sup>10</sup>Jabi incienso mëshajahuano tsi quiha nohiria bo bëhoxhi iniquë  
cacha. <sup>11</sup>Jatsi Zacarías qui ángel jisiquiniquë, naa Ibo quima  
jonish cato. Incienso ya ca altar mënécayá nii ángel ini quiha.

**12** Jatsi ángel jisi tsi Zacariás shina-risiquiniquë. Raquëria ja ini quiha.

**13** Jatsi,

—Raquëyamana, Zacariás —i ja qui ángel niquë—. Nicahacaquë mi bëhoxhaina ra. Mi bax baquë comaxëhi quiha mi ahui Elisabet ra. Juan ja janéhacaxëti xo. **14** Ja iqui tsi raniriaxëqui mato ra. Jasca, ranixëhi quiha huëstima cabو, ja coquë no. **15** Jasca, Dios bësojó tsi oquë ca joni ixëhi quiha mi baquë. Vino, jénë shapo, tihi cabو ja ayamano. Espíritu Santo rëamëxëhi quiha ja coquë no. **16** Huëstima ca Israél ca nohiria jato Ibo Dios qui jahari bëxëhi quiha. **17** Jasca, Ibo bëbo caxëhi quiha mi baquë, nohiria shomahuahi na. Elías yamaba jabi, jahuë chama, tihi cabو jayaxëhi quiha ja caquë no. Jatsi jahëpa bo, jahëhua bo, jato xocobo, tihi cabو noinamaxëhi quiha. Jasca, nicamisxëni cabو Dios qui bacamaxëhi quiha, mëstëxëni ca jahuë bo jato shinamaxëna. Toca tsi nohiria bo shomahuaxëhi quiha, Ibo johai ca quëshpi na —nëa tsi quiha ángel nëcaniquë Zacarías qui.

**18** Jatsi,

—¿Jéniria pi raca ja na? Joni sirixëni xo ëa ra. Sirixëni xo noho ahui ri —i ángel qui Zacarías niquë.

**19** Jatsi angél quëbiniquë:

—Gabriel xo ëa ra. Dios tapaí nii ca ëa xo naa. E raahacaquë mi qui chaniti, chani jia ca mi qui bëti. **20** Jatihuahacaxëhi quiha ë yoahana ra. Noho chani mi chahahuayamaha iqui tsi jaro, chaniti mëtsama ixëqui mia ra, mi baquë coquë rohari —nëa tsi ja qui ángel nëcaniquë.

**21** Jabi Zacarías ó pasohi nohiria bo iniquë tsëquëti. Yama a. Yopahi tsi,

—¿Jéniriahax bamahi ni sa? —itsi jaca niquë.

**22** Jatsi Zacarías tsëquëniquë. Tsëquëhax tsi quiha nohiria bo qui chaniti mëtsama ja iniquë. Jaro quiha. Jatsi ja tënämëha nori nohiria bá cahëniquë. Japi Zacariás jato qui bëëbëeniquë, chaniti mëtsama ja iqui ca jismaxëna.

**23** Jaquirëquë arati xobó tsi ja yonocohai ca xaba jatiquë tsi quiha jahuë xobo qui Zacarías caniquë. **24** Jaquirëquë jahuë ahui Elisabet tohoyaniquë. Jatsi cinco oxë no tsi xobó tsi ja chitëniquë.

**25** —Nëca tsi ëa Diós shomahuaquë ra. Jaboqui pi nohiria yahi tsi bërabiyyamaxëquia, baquë ë jayaxëhai quëshpi na —i Elisabet niquë.

### María qui ángel jonina

<sup>26</sup>Oxë huëtsa huinocaquë tsi quiha Diós jahuë ángel Gabriel raaniquë Nazaret icanai ca yaca qui. Jabi Galilea maí tsi naa yaca ini quiha. <sup>27</sup>Jabi Gabriel raahacani quiha María icanai ca yoxajahi qui Dios Chani bëti. Jari bënë yama María ini quiha. Jasca, jahuë bënë ti ca José ini quiha, naa David yamaba chahitaxocobo huësti ca iquiina.

<sup>28</sup>Xobo qui jicohax tsi quiha,

—Shoma xo mia ra; yoxa bo huëtsa oquë quiha. Mi bëta xo Ibo ra —i María qui Gabriel niquë.

<sup>29</sup>Angel chani nicahax shinati pi Mariá cahëyamaniquë.

—¿Jénihi ni sa? —i ja niquë jahuë shinaná no.

<sup>30</sup>Jatsi,

—Raquëyamatsihuë, Mariá —i ángel niquë—. Diós mia shomahuaquë ra. <sup>31</sup>Tohoyaxëqui mia. Baquë comaxëqui mia ra. Comaxo tsi Jesu mi janëno. <sup>32</sup>Jasca, oquëxëhi quiha mi baquë. Dios-diosria Baquë ja quënahacaxëti xo. Jahuë jahëpa David yamaba yonati chama ja qui axëhi quiha Ibo Dios, jahuë nohiria yonati. <sup>33</sup>Jabi Israél ca nohiria yona-yonapaoxëhi quiha. Jatiyamaxëhi quiha ja yonahaina —nëa tsi María qui ángel nécaniquë.

<sup>34</sup>Jatsi ángel Mariá nicaniquë:

—Yoxajahi xo ëa ra. ¿Jénahuariaxo raca baquë ë comana? —iquiina.

<sup>35</sup>Jatsi angél quëbiniquë:

—Mi qui joxëhi quiha Espíritu Santo. Tsëmo jascaria tsi mia mapaxëhi quiha Dios chama. Ja quëshpi tsi Dios Baquë jiaxëni ca quënahacaxëti xo mi Baquë, ja coquë no.

<sup>36</sup>‘Mi rëquëmë Elisabet tsayahuë. “Tohoyatimaxëni xo” i nohiria bo paoni quiha mi rëquëmë yoati na. Jama, seis oxë no tsi ja tohoyaquë, sirixëni ja iqui ri. <sup>37</sup>Tsayahuë. Jatiuhuahacaxëti xo Diós yoahai tëquë. Jatiroha ca ati mëtsa xo ra —nëa tsi quiha María qui ángel nécaniquë.

<sup>38</sup>Jatsi Mariá quëbiniquë:

—Ibo yonati xo ëa ra. Jabija xo toa mi yoahana ra —iquiina.

Jatsi ángel jisbayaniquë.

### Elisabet qui María shishonina

**39** Toatiyá tsi bamahaxma tsi quiha Elisabet yaca qui María caniqué. Jabi jodioba mai maca bo xéréquë ó tsi jahuë yaca ini quiha. **40** Cahéhax Zacarías xobo qui María jiconiqué. Jicoxo tsi quiha Elisabet ja joihuaniqué. **41** Jatsi María joihuahai ca Elisabét nicaquë tsi quiha jahuë xamá ca baqué mohiniqué. Jatsi Espíritu Santó Elisabet chanimaniqué:

**42** —Yoxa huëtsa bo oquë tsi mi shomahuahacaquë ra. Shomahuahacaquë mi baqué ri —itsi María qui Elisabet niquë joi pistiama cató no—. **43** E qui shishohi noho Iboba jahëhua joquë pa. Shoma xo ëa ra. **44** Jabi mi joihuahai ca ë nicaquë tsi rani tsi ëa xara ca baqué mohiquë ra. **45** Mi qui angél yoahitaha ca jatihuaxëhi quiha Ibo Dios ra. Raniria xo mia ra, Dios qui mi chitimihai ca quëshpi na —i María qui Elisabet niquë.

**46** Jatsi María chaniniqué:

—Oquë xo Dios ra iquia.

**47** Noho Xabahamati Ibo Dios tahëhax tsi raniquia.

**48** Ea, naa jahuë yonati nori ca ja noiquë ra.

Jaboqui “Shomahuahaca ca tsi xo toa” ixëhi quiha nohiria bo ëa yoati na.

**49** Jiaria tsi xo ë qui Chamaxëni cató acana.

Jaxëni xo jahuë janë ra.

**50** Jasca, ja qui aracanaibo noi-noipaohi quiha.

**51** Anomaria tsi xo Diós acana jahuë chamá no.

Jamë shinamixënì cabo,  
oquë ca manëcascanaibo,  
tihì cabò pacanamahi quiha.

**52** Nohiria chama-chamaria bo niahì quiha,

jato oquë ja bënocano.

Noitiria cabò oquëhuahi quiha.

**53** Jasca, jahuë jahuë jia bá tsi paxnacanaibo sëyamaxëhi quiha.

Jama, jahuë mishni jayaria cabò mëquëya tsi raaxëhi quiha.

**54** Jahuë Israél ca nohiria mëbihi johi quiha,

jato noihi na.

**55** Jabi noba rëquébo yamabo qui ja yoani ca shina-bënoyamahi quiha Dios ra,

“Mato shomahuaxëquia” i Abraham,  
jahuë chahitaxocobo,

tihi cabó qui ja ni quëshpi na —nëa tsi quiha María nëcaniquë.

<sup>56</sup>Jatsi tres oxë no tsi quiha Elisabet ya tsi María chitëniquë. Jaquirëquë jahari jahuë xobo qui ja caniquë.

### Juan conina

<sup>57</sup>Tséquëniquë Elisabet comati xabaca ra. Jatsi baqué ja comaniquë.

<sup>58</sup>Jabi Elisabet Diós shomahuani nori ca jahuë yacatá ca nohiria, jahuë jimibo, tihi cabá nicaniquë. Ja raniyocani quiha jato ri, nicahax na. <sup>59</sup>Jatsi ocho bari huinocaquë tsi quiha jahuë baqué jibirishahi jahuë jimibo bëcaniquë. Jato jodioba jabi quiha. Jatsi jahuë jahëpa janë, naa Zacarías janë baqué qui ja acascaniquë toatiyá no. <sup>60</sup>Jatsi jahuë jahëhuá quëbiniquë:

—Juan ja quënahacaxëti xo ra —iquina.

<sup>61</sup>—Majia. Yama tsi xo mi jimibo xérëquë ó ca toa janë jaya catora —i ja qui jaca niquë.

<sup>62</sup>Jatsi jato mëquë bá tsi jisti bo ja acacaniquë baqué jahëpa qui. Toca tsi Zacarías ja nicacaniquë:

—¿Jahuë janë mi baqué qui axëhi ni noa ra? —iquina.

<sup>63</sup>Jatsi jahuë mëquéné tsi Zacarías bëebëehaniquë papi ja qui ja acano. Jatsi, “Jahuë janë tsi xo Juan” i ja quéneni ca ni quiha. Jatsi quiha ja ratëyocaniquë. <sup>64</sup>Jarohapa tsi chaniti mëtsa Zacarías iniquë pa. Chanitsijaniquë. Dios ocahuatsijahua-niquë. <sup>65</sup>Jatsi yacatá ca nohiria bo shina-risiquiniquë jënipijani ca nicahax na. Jatsi Juan coni chani pacanani quiha, jodioba maí ca maca ó ca nohiria bo qui. <sup>66</sup>Nicahax ja shina-shinacaniquë.

—¿Oquë ca ixëhi ni naa baqué sa? —i jaca ni quiha.

Jasca, ja bëta Iboba chama iqui ca ja jiscaniquë.

### Jia tsi Dios Zacariás ocahuánina

<sup>67</sup>Jabi Espíritu Santo rëamë tsi Juan jahëpa Zacarías iniquë. Jatsi ja qui Diós ani ca chani yoatsijahuaniquë.

<sup>68</sup>—Oquë xo Ibo, Israél caba Dios.

Jahuë nohiria mëbihi ja joquë ra,  
jocha quima noqui paquëmaxëna.

<sup>69</sup>Jabi David yamaba chahitaxocobo noqui raahi quiha,  
noqui Xabahamatí Ibo-iboria iti.

<sup>70</sup>Naama tsi quiha jahuë Chani yoanish cabó Diós chanimani quiha.

<sup>71</sup>“Mato qui caxacanaibo quima mato xabahamaxëquia”

i ja ni quiha.

72-73 Jabi noqui shomahuacatsi quiha Dios ra,  
 naa noba rëquébo yamabo ja shomahuarani jascaria.  
 Tobi quiha jato qui ja yoanina,  
 tobi quiha noba rëquébo yamaba Abraham qui ja yoanina.  
 Tihi ca tsi shina-bënøyamahi quiha Dios.

74 Noqui caxacanaibo quima noqui xabahamacatsi quiha ra,  
 raquëhaxma tsi Dios bax no yonocono iquish na.

75 Ja bësojó tsi jocha yama,  
 mëstë, tihi tsi no i-ipaoxëti xo,  
 ja bax yonocohi na —nëa tsi quiha Zacarías nëcaniquë  
 Dios Chani yoahi na.

76 Jatsi,  
 —Dios-diosria Chani yoati ibo mi quënahacaxëti xo,  
 noho baquë.  
 Ibo bëbo caxëqui mia,  
 Ibo johai ca quëshpi nohiria bo shomahuahi na.

77 Nohiria xabahamatí quinia yoaxëqui mia ra,  
 “Mato jocha mëbixëqui Dios” i jato quiina.

78 Toca tsi ahi quiha Dios,  
 noqui noiquí na.

Ja quëshpi tsi mana ca Huëa nori ca noqui raaxëhi quiha,  
 79 tsémó cabø,

bënoria ca rësoti basima cabø,  
 tihí cabø qui huahuaxëti.

Bëpasimati quinia ó tsi noqui rëquëninixëhi quiha —nëa tsi  
 Zacarías

nëcaniquë.

80 Toatiyá tsi Zacarías baquë Juan shinahaniquë. Dios ja noiriani  
 quiha. Shinahacax tsi quiha xabachá tsi Juan racaniquë. Toá tsi ja ini  
 quiha, Dios Chani yoahi canox pari. Jaquirëqué Israél maí ca nohiria  
 bësojó tsi quiha ja jisiquiniquë, naa jahuë yonoco chitahëhuaxëna.

### Jesu conina

Mateo 1.18-25

**2** 1 Toatiyá tsi quiha romanoba chama-chamaria Augustó jahuë  
 chani raaniquë nohiria tëquë qui.  
 —Tocahacati xo nohiria tëquë —i quiha ja niquë.

<sup>2</sup>Jabi jariapari ca nohiria tocani ca xaba tsi xo naa. Jasca, toatiyá tsi quiha Siria mai xo tsi chama Cireníó yonani quiha.  
<sup>3</sup>Jatsi jahanahax ja cocani ca yaca qui jatiroha cabo bocaniqué tocahacati. <sup>4</sup>Caniqué José ri. Jahuë Galileá ca maí ca yaca Nazaret ja jisbayaniqué Belén yaca qui caxëna. Jabi Belén, naa jahuë David yamaba coni ca yaca qui ja cani quiha tocahacati, David yamaba chahitaxocobo huësti ca ja ini quëshpi na. <sup>5</sup>Jasca, ja bëta caniqué María ri, naa jahuë ahui ti cato. Jabi tohoya tsi María ini quiha. <sup>6</sup>Belén tsi jacano tsi quiha jahuë baquë comati xaba tséquëniquë. <sup>7</sup>Jatsi jahuë jariapari ca baquë Mariá comaniqué. Comaxo tsi quiha raití tsi Mariá yaboniqué. Yaboxo tsi quiha yohina piti caja ó tsi jahuë Baquë ja jananiqué. Yama ini quiha racati xobó ca xëa rë.



*Jesu conina*

### Oveja obësocanaibo

<sup>8</sup>Jabi yaca basima tsi quiha oveja obëso caba oxti iniquë. Baquicha quiha. Jato oveja ó bësohi ja icani quiha. <sup>9</sup>Jatsi jato bësojó tsi iboba ángel jisiquiniquë. Jasca, jato tteamë tsi quiha Iboba oquë bajra-bajraniquë. Raquériatsijacaniquë tsayahax na.

<sup>10</sup>Jatsi jato qui ángel chaniniquë:

—Raquëyamacana. Chani jia ca mato qui bëquia. Nohiria tëquë ranihuaxëhi quiha é yoahaina. <sup>11</sup>Jaboqui David yacatá tsi coyaquë Xabahamatí Ibo ra. Mato Cristo, naa Diós raaha ca Ibo tsi xo naa. <sup>12</sup>Yabohaca ca baquë jisxëqui mato. Yohina piti cajá tsi raca ixëhi quiha. Tocatsixëhi quiha, noho quiayama ca chani ma cahëno iquish na ra —nëa tsi quiha jato qui ángel nécaniquë.

<sup>13</sup>Jatsi quiha ángel ya tsi jisiquitapiniquë huëstima ca naipá ca ángel bo. Misco quiha. Dios ocahuahi ja icani quiha. Jabi ja yoacani ca tsi xo naa:

<sup>14</sup>—Mana ca Dios oquëhuahacano ra.

Ja qui jia cabo,

naa jahuë maí ca nohiria xérëquë ó ca rabëti bo  
bëpasimacatsi quiha —i jaca niquë.

<sup>15</sup>Jatsi quiha nai qui ángel bo bocaniquë. Ja bocaquë tsi quiha oveja obëso cabo chaninaniquë:

—¿Belén jisi canomani? Jénipijaha ca no jisno. Jia tsi xo naa Ibobá noqui yoahana ra —i jaca niquë.

<sup>16</sup>Jatsi quiha Belén qui ja jabacaniquë baquë mërahi na. María, José, piti cajá ca racahai ca Baquë, tihi cabo ja jiscaniquë. <sup>17</sup>Baquë jisi tsi quiha angél jato yoaha ca ja yoacaniquë. <sup>18</sup>Jatsi oveja obëso cabá yoani ca qui ratëyoniquë nicanish cabo tëquë. <sup>19</sup>María qui jia ini quiha ja yoacanina. Jénipijacani ca tëquë ja shina-shinani quiha. <sup>20</sup>Jatsi quiha oveja obëso cabo bacaniquë. Bacahi tsi ja quëquëcanacaniquë. Jia tsi Dios ja ocahuacaniquë, naa ja jiscanina, ja nicacanina, tihi cabo quëshpi na.

### Arati xobo qui jahuë nabá Jesu bënina

<sup>21</sup>Huësti ca semana huinocaquë tsi quiha jato baquë jibirishahacaniquë. Toatiyá tsi Jesu jato baquë ja janëcani quiha. Jabi toa janë baquë qui angél ani quiha, siri, naa María tohoyanox pari no. <sup>22-24</sup>Jatsi quiha tséquëniquë arati xobo xo tsi María

bahuëhacati ca xabaca. Jatsi Jerusalén qui José ya María caniquë, Moisés yamabá yoba jatihuaxëna. Cahëxo tsi quiha arati ibo qui jato yobá yoani ca jahuë bo ja acaniquë bahuëhacati. “Tëpas-hacati xo rabë ca botocoa. Jama, toa pi ati mëtsama jaca no tsi tëpas-hacati nori rabë ca corobisa iquë” nëa tsi jato yoba nëcani quiha. Jasca, toa barí tsi Jerusalén qui jato baqué Jesu ja bëcaniquë Dios qui mëaxëna. Jato jodioba jabi quiha. Ja tocacani quiha Iboba yoba quënëni ca tahëhax na, naa “Dios qui mëahacaxëti xo jariapari ca cohax ca baqué” i Dios yoba ni quëshpi na.

<sup>25</sup>Naatiyá tsi quiha Jerusalén tsi joni iniquë, naa Simeón icanai cato. Joni shinajaxëni ca naa joni ini quiha, Dios qui aranish ca iquiina. Israél cabo Xabahamatí Ibo johai ó ja pasoni quiha. Jasca, Espíritu Santo rëamë tsi ja ini quiha. <sup>26</sup>Jasca, rësoti ó ja pasoyamani quiha, Ibobá raahai ca Xabahamatí Ibo jisquë rohari. Toca ca Espíritu Santó jismani quiha.

<sup>27</sup>Jatsi quiha arati xobo qui Simeón caniquë, Espíritu Santó mëpihacahax na. Jabi toá tsi ja ini quiha, jahuë nabo ya Jesu cahëquë no. Jasca, Moisés yoba jatihuahi quiha José, María, tihi cabo bëcaniquë jato baqué Jesu ya. <sup>28</sup>Jatsi jato baqué pistia quiha Simeón iconiquë jisish na. Icoxo tsi quiha jia tsi Dios ja ocahuaniquë. Ja nëcani quiha:

<sup>29</sup>—Jarohari tsi éa mi yoani ca jatihuahacaqué ra.

Jaboqui ranihax tsi rësoti mëtsa xo éa ra.

<sup>30</sup>Noho bëro yoí tsi Xabahamatí Ibo é jisquë ra.

<sup>31</sup> Nohiria bo tëquë qui naa baqué mi raaquë.

<sup>32</sup>Carayanabo qui ja raahacaqué ra,  
mía ja cahëcano iquish na jato ri.

Mi Israél ca nohiria qui ja raahacaqué ra,  
jato oquëhuaxëna —nëa tsi quiha

Simeón nëcaniquë.

<sup>33</sup>Jatsi Jesu nabo ratëniquë toca tsi jato baqué yoati Simeón chaniquë no. <sup>34</sup>Jatsi María, José, jato baqué, tihi cabo bax Simeón bëhoxníquë, Diós jato shomahuano. Bëhoxhax tsi quiha Jesu jahëhua qui ja chaniniquë:

—Mi Baqué Diós biniquë ra. Ja iqui tsi bënoxëhi quiha huëstima ca Israél cabo. Jasca, ja iqui tsi rani-ranixëhi quiha huëstima cabo. Jabi Dios quima ca jisti ixëhi quiha mi Baqué. Ja pasomaha chanixëhi quiha huëstima cabo rë. Jasca, Dios quinia nohiria bo

jismaxëhi quiha. <sup>35</sup>Toca tsi nohiria bá shinahai ca jonë ca jahuë bo jisiquimaxëhi quiha mi Baqué. Jasca, cohuëriaxëqui mia ri, naa mi shina saipí nacohai jascaria —nëa tsi quiha María qui Simeón nëcaniquë.

<sup>36</sup>Jasca, tobi quiha arati xobó tsi yoxa iniquë, naa Ana icanai cato. Dios Chani yoanish ca yoxa ja ini quiha. Fanuel jahi ja ini quiha, naa Aserbo icanai ca maxo quima conish cato. Jabi sirixëni Ana iniquë. Siete año roha no tsi bënë ja jayani quiha. <sup>37</sup>Rësoni quiha jahuë bënë. Jaquirëquë ochenta año no tsi Dios arati xobo ja jisbayayamani quiha. Toá tsi barihani, baquicha, tihi ca tsi Dios qui ja ara-arani quiha. Jasca, toá tsi samapama tsi ja bëhxoxni quiha. Jahuë jabi quiha. <sup>38</sup>María, José, tihi cabo ya Simeón chaninano tsi Ana joniquë. Johax Dios qui “Gracias” itsijaniquë jaa ri, baqué tsayahax na. Jatsi Israél cabo Diós xabahamatí ó pasocanaibo qui chanitsi quiha Ana niquë baqué Jesu yoati na.

### Nazaret yaca qui ja bacacanina

<sup>39</sup>Jaquirëquë ja yoahacani ca ati jahuë bo tëquë María, José, tihi cabá jatihuaniquë, naa Iboba yobá yoani cato. Jatihuahax jahari Galilea mai qui ja bocaniquë jato Nazaret yaca qui. <sup>40</sup>Toatiyá tsi quiha jato baqué Jesu shinahaniquë. Ja coshinani quiha. Ja tiisinani quiha. Jabi jato Baqué Jesu quiha Diós shomahuaniquë.

### Arati xobó tsi Jesu inina

<sup>41</sup>Jabi jatiroha ca xénipá tsi quiha Jerusalén qui Jesu nabo bocaniquë pascua fiesta axëna. Jato jabi quiha. <sup>42</sup>Jatsi doce año bo jathihax jahuë nabo ya Jerusalén qui Jesu caniquë jaa ri. <sup>43</sup>Toa fiesta huinocaquë tsi quiha jato xobo qui bacatsi María, José tihi cabo niquë. Jama, Jerusalén tsi chitëhi Jesu iniquë pa. Yopayamani quiha jahuë nabo. <sup>44</sup>Jahuë rabëti bo ya tsi bacahai ja iqui ca ja quëscahuajahuacani quiha. Toca tsi huësti bari ja raacaniquë bahí no. Jatsi yata tsi jato rabëti bo, jato jimibo, tihi cabo xérëquë xo tsi Jesu mératsijahuacaniquë. Yama a ra. <sup>45</sup>Mahitsa ja méracaniquë rë. Jarohari tsi quiha jahari Jerusalén qui José, María, bocaniquë méraxëna.

<sup>46</sup>Tres bari tsi ja raacaniquë Jesu mérähi na. Jarohari tsi arati xobó ca jato baqué ja jiscaniquë. Yoba tiisimacanaibo ya tsaho ja ini quiha. Jato bëta chaninahi Jesu iniquë Quënëhacanish cabo yoati na. <sup>47</sup>Jabi Jesu tiisi, ja quëbihaina, tihi cabo qui ja

ratëyocaniquë, naa nicacanish cabó. <sup>48</sup>Jato bëta ja iqui ca jisi tsi quiha jahuë nabo ratëniquë jato ri. Jatsi quiha ja qui jahuë jahëhua chaniniquë:

—¿Jéniriahax noqui mi nëcaha pa? Noba shina jii-jiiquë rë mia mërahi na. Mahitsa mia no mëra-mëraquë ra —i María niquë.

<sup>49</sup>Jatsi Jesú jato quëbiniquë:

—¿Jéniriaxo tsi éa méracanai pa? ¿Noho Jahëpa xobó tsi é iti nori ca ma cahëyamaha? —iquiina.

<sup>50</sup>Jama, ja quëbini ca jahuë nabá cahëyamaniquë. Jato joma quiha. <sup>51</sup>Jatsi quiha jahari Nazaret qui Jesu caniquë jahuë nabo ya. Jato ja nica-nicaniquë ra. Jabi jénipijani ca jahuë jahëhuá shina-shinaniquë. Ja shina-bënoyamani quiha.

<sup>52</sup>Jatsi shinahaniquë Jesu. Shinahacax ja tiisinaniquë. Dios, nohuria, tìhi cabá toa baqué noiniquë.



*Arati xobó tsi Jesu inina*

### Dios Chani Juán yoanina xabacha xo na

*Mateo 3.1-12; Marcos 1.1-8; Juan 1.19-28*

**3** <sup>1</sup>Jabi quince año bo jatiqué tsi quiha romanoba chama-chamaria Tiberió nohiria bo yonaniqué jaa ri. Jasca, ja namá tsi jodioba mai Poncio Pilató yonani quiha ja bax na. Jasca, chama Tiberio bax Galilea mai Herodés yonani quiha jaa ri. Jasca, Iturea, Traconite, tihi cabo yonani quiha Herodes noma Felipe. Chama Lisaniás Abilinia mai yonani quiha. <sup>2</sup>Jasca, arati ibo-iboria bo Anás, Caifás tihi cabo ini quiha. Jatsi toatiyá tsi quiha Zacariás baqué Juan qui Dios Chani joniqué. Xabachá tsi racahí Juan ini quiha. <sup>3</sup>Jatsi ani Jordán tapaí ca racahai ca nohiria bo qui Dios Chani Juán yoabonaniqué. Yoabonahax jato qui ja nécaniqué:

—Ashimahacaxëti xo nohiria bo. Mato jocha quima Dios quiri bësocana, mato jocha masahacano ra —i nohiria bo qui ja ni quiha.

<sup>4</sup>Jabi Juán acai ca yoati tsi Isaías yamabo chaniniqué ja quënëni cato ó no. Jabi siri tsi ja quënëni ca tsi xo naa:

“Xabacha xo tsi quënaxëhi quiha.

Quënahax,

‘Rohahuahacacana, Ibo johai ca quëshpi na’ ixëhi quiha.

‘Bahi mëstë ca acana ja bax coti.

<sup>5</sup>Rëahacaxëti quiha quini bo.

Michorohacaxëti quiha témachi bo.

Mëstëhuahacaxëti quiha yoro ca iti bo.

Parahuahacaxëti quiha bahi yoi cabo.

Toca tsi rohahuahacaxëti quiha mato shinana ra,

Ibo johai ca quëshpi na.

<sup>6</sup>Jasca, Dios xabahamati quinia jisxëhi quiha carayanabo ri, naa nohiria tëqué’ nécaxëhi quiha”.

Jabi néca tsi Isaías yamabá quënëni quiha Juan yoati na.

<sup>7</sup>Jatsi huéstima ca nohiria Juan qui bëcaniqué ashimahacaxëna.

Jato ja yoani ca tsi xo naa:

—Quiaxëni caba xocobo xo mato ra. Tséquëti basima tsi xo nohiria qui Dios caxahai ca bari ra. ¿Tsohuë mato yobani, Dios caxa quima ax jabati? <sup>8</sup>¿Mato jocha quima Dios quiri ma bësoha pa? No tsayano. Jariapari tsi jabi paxa ca ma jismaxëti xo. “No xabahamahacaxëti xo, Abraham yamaba chahitaxocobo no nori quëshpi na” iyamatsicana. Mato mëbiti mëtsama xo Abraham

yamabo ra. Tsayacahuë. Naa maxax bo biti mëtsa xo Dios, Abraham xocobo yoi bo axëna iquia ra. <sup>9</sup>Jatsi quiniacaxëcahuë. Mato copipaimaria xo Dios ra. Bimi jia ca pi jihuí saihuayamano tsi toa jihui rëraxëhi quiha ibo. Réraxo tsi chihi qui niahí quiha. Jatsi jabi paxa ca ma saihuaxëti xo —nëa tsi nohiria bo qui Juan nëcaniquë.

<sup>10</sup>Jatsi,

—¿Jénahuaxëhi ni noa ra? —i Juan qui nohiria niquë.

<sup>11</sup>Jatsi Juán jato quëbiniquë:

—¿Dos ca sahuëti jaya ni mato? Dos ca pi jayaquí tsi noitiria ca qui huësti ca acana. ¿Huéstima ni mato oriquiti? Huéstima pi jayahi tsi huëtsa bo ya xatënacana —i quiha jato qui Juan niquë.

<sup>12</sup>Jatsi impuesto bicanaibo, naa nohiria qui anoma cabo bëcaniquë ashimahacaxëna.

—¿Jénahuaxëhi ni noa, maestró? —i Juan qui jaca niquë jato ri.

<sup>13</sup>Jatsi,

—Gobierno qui nohiriá mëati ca parata roha bicana. Huino ca biyamacahuë —i jato qui Juan niquë.

<sup>14</sup>Jatsi soldado bá nicaniquë:

—¿Jénahuaxëhi ni noa ra? —iquina.

Jato ja quëbiniquë:

—Nohiria roayamacana parata bixëna. Mato sueldo quëshpi tsi ranicana —iquina.

<sup>15</sup>Toatiyá tsi Xabahamatí Ibo ó nohiria bo pasohi ini quiha. Ja quëshpi tsi jato Cristo Juan iqui ca ja quëscahuajahuacani quiha.

<sup>16</sup>Japi jato tëqué qui Juan nëcaniquë:

—Jéné tsi mato ashimaquia. Jama, joxëhi quiha ëa oquëria cato ra. Ea tsi xo oquë yama cato. Espíritu Santó tsi, naa chihi iquiria cató tsi mato ashimaxëhi quiha. <sup>17</sup>Joxo tsi jahué-na bo tsëcaxëhi quiha, ja otomai ca qui ja jicocano iquish na. Jama, trigo xaca jascaria tsi nocatimaxëni ca chihi qui yoixëni cabo niaxëhi quiha mëshoxëna —nëa tsi Juán nëcaniquë Jesu yoati na.

<sup>18</sup>Dios Chani yoapama tsi huéstima tsi nohiria Juán yobaniquë, Dios quiri ja bësocano iquish na. <sup>19</sup>Jasca, chama Herodes pasomaha Juán chanipaoniquë, jahué noma ahui ja bini iqui na. Jabi jahué noma ahuni, naa Herodías icanai ca ja bini quiha, jahué ahui iti. Jasca, huéstima ca yoi ca Herodés ani quiha. Jahué jabi quiha. <sup>20</sup>Jatsi pë preso qui Herodés Juan nanëniquë. Anoma toa joni iniquë ra.

**Jesu ashimahacanina**  
*Mateo 3.13-17; Marcos 1.9-11*

- 21** Nohiria tēquë ashimahacayoquë tsí quiha Jesu  
 ashimahacaniquë jaa ri. Béhoxjano tsí quiha nai japéqueniquë.  
**22** Jatsi ja qui Espíritu Santo boteníquë; boto jisiria ja nori. Jatsi,  
 —Noho Baqué yoi xo mia. Mia noiquia. Ea ranihuaqui mia ra —i  
 quiha naipá ca joi niquë.

**Jesu rēquëbo yamabo**  
*Mateo 1.1-17*

**23** Jabi treinta año bo quiha Jesú jayaniquë, jahuë yonoco ja  
 chitahéhuaquë no. Jabi José baqué ja nori ca quëschua nohiria bá  
 huaniquë.

- 24** José jahëpa Elí iniquë.  
 Elí jahëpa Matat iniquë.  
 Matat jahëpa Leví iniquë.  
 Leví jahëpa Melqui iniquë.  
 Melqui jahëpa Jana iniquë.  
 Jana jahëpa José iniquë.  
**25** José jahëpa Matatías iniquë.  
 Matatías jahëpa Amós iniquë.  
 Amós jahëpa Nahum iniquë.  
 Nahum jahëpa Esli iniquë.  
 Esli jahëpa Nagai iniquë.  
**26** Nagai jahëpa Maat iniquë.  
 Maat jahëpa Matatías iniquë.  
 Matatías jahëpa Semei iniquë.  
 Semei jahëpa José iniquë.  
 José jahëpa Judá iniquë.  
**27** Judá jahëpa Joana iniquë.  
 Joana jahëpa Resa iniquë.  
 Resa jahëpa Zorobabel iniquë.  
 Zorobabel jahëpa Salatiel iniquë.  
 Salatiel jahëpa Neri iniquë.  
**28** Neri jahëpa Melqui iniquë.  
 Melqui jahëpa Adi iniquë.  
 Adi jahëpa Cosam iniquë.

- Cosam jahëpa Elmodam iniquë.  
 Elmodam jahëpa Er iniquë.
- 29** Er jahëpa Josué iniquë.  
 Josué jahëpa Eliezer iniquë.  
 Eliezer jahëpa Jorim iniquë.  
 Jorim jahëpa Matat iniquë.
- 30** Matat jahëpa Leví iniquë.  
 Leví jahëpa Simeón iniquë.  
 Simeón jahëpa Judá iniquë.  
 Judá jahëpa José iniquë.  
 José jahëpa Jonán iniquë.  
 Jonán jahëpa Eliaquim iniquë.
- 31** Eliaquim jahëpa Melea iniquë.  
 Melea jahëpa Mainán iniquë.  
 Mainán jahëpa Matata iniquë.  
 Matata jahëpa Natán iniquë.  
 Natán jahëpa David iniquë.
- 32** David jahëpa Isaí iniquë.  
 Isaí jahëpa Obed iniquë.  
 Obed jahëpa Booz iniquë.  
 Booz jahëpa Salmón iniquë.  
 Salmón jahëpa Naasón iniquë.
- 33** Naasón jahëpa Aminadab iniquë.  
 Aminadab jahëpa Aram iniquë.  
 Aram jahëpa Esrom iniquë.  
 Esrom jahëpa Fares iniquë.  
 Fares jahëpa Judá iniquë.
- 34** Judá jahëpa Jacob iniquë.  
 Jacob jahëpa Isaac iniquë.  
 Isaac jahëpa Abraham iniquë.  
 Abraham jahëpa Taré iniquë.  
 Taré jahëpa Nacor iniquë.
- 35** Nacor jahëpa Serug iniquë.  
 Serug jahëpa Ragau iniquë.  
 Ragau jahëpa Peleg iniquë.  
 Peleg jahëpa Heber iniquë.  
 Heber jahëpa Sala iniquë.
- 36** Sala jahëpa Cainán iniquë.

Cainán jahëpa Arfaxad iniquë.

Arfaxad jahëpa Sem iniquë.

Sem jahëpa Noé iniquë.

Noé jahëpa Lamec iniquë.

**37** Lamec jahëpa Matusalén iniquë.

Matusalén jahëpa Enoc iniquë.

Enoc jahëpa Jared iniquë.

Jared jahëpa Mahalaleel iniquë.

Mahalaleel jahëpa Cainán iniquë.

**38** Cainán jahëpa Enós iniquë.

Enós jahëpa Set iniquë.

Set jahëpa Adán iniquë.

Adán jahëpa Dios iniquë.

### Jesu tanamahacanina jochamaxëna

*Mateo 4.1-11; Marcos 1.12-13*

- 4** 1 Jatsi quiha ani Jordán Jesú jisbayaniquë. Espíritu Santo rëamë ja ini quiha. Jatsi cuarenta bari no tsi xabaca ax tsi ja mëpihacaniquë Espíritu Santó no. 2 Jabi xabacá ja no tsi quiha Satanás Jesu tanamaniquë jochamaxëna. Cuarenta bari no tsi Jesú piyamani quiha. Ja paxnani quiha. 3 Jatsi ja qui Satanás chaniniquë:  
—Dios Baqué iipiquí tsi naa maxax yoahuë mapari ja manëno —iquina.
- 4 Jatsi Jesú quëbiniquë:  
—“Maparí roha tsi bësoramaxëhi quiha joni, jama, Dios Chaní tsi ja nori” ii quiha Quënëhacanish cabo —iquina.
- 5 Jatsi quiha mana Satanás Jesu boniquë témachí no. Boxo tsi quiha maí ca chama bá yonahaina, jato oquë, tihi cabo Jesu ja jismaniquë. 6 Jismahax ja nécaniquë:  
—Naa nohiria bo yonati chama tëquë, ja yonacanai ca oquë, tihi cabo mi qui axëquia, ë qui ja acacani nori quëshpi na. Jabi tsuhuëcara, naa ë qui jia ca qui naa tëquë ati mëtsa xo ëa ra. 7 Japi ë qui mi arapino tsi jatiroha ca mina-xëhi quiha —i Satanás niquë.
- 8 Jatsi Jesú quëbiniquë:  
—“Mato Ibo Dios roha qui ma arano ra. Mato chama roha ca tsi xo toa” ii quiha Quënëhacanish cabo —iquina.
- 9 Jaquirëquë Jerusalén ca arati xobo qui Satanás Jesu boniquë. Boxo tsi quiha jodioba arati xobo cacha, naa jahuë quëmapó tsi Satanás niimaniquë. Niimahax ja qui ja chaniniquë:

—“Dios Baquë iipiquí tsi mai qui mimë niahacahuë. <sup>10</sup>Mato qui jahuë ángel bo raaxëhi quiha Dios, mato ó ja bësocano” ii quiha Quënëhacanish cabo. <sup>11</sup>Jasca, “Jato mëquéné tsi mia bëcaxëcani quiha ángel bo, mi paquëyamano, mi tahë tëquëyamano iquish na” ii quiha —nëa tsi quiha Jesu qui Satanás nëcaniquë.

<sup>12</sup>Jatsi Jesú quëbiniquë:

—“Mi Ibo Dios tanamayamahuë” ii quiha Quënëhacanish cabo —iquina.

<sup>13</sup>Jabi huëstima ca quiniá tsi Satanás Jesu tanamaniquë jochamaxëna; mahitsa quiha. Jochamati mëtsaxoma tsi quiha ja jisbërianiquë, oquë ca xaba huëtsa manaquí na.

### Galileá ca mai xo tsi Jesú jahuë yonoco chitahëhuanina

*Mateo 4.12-17; Marcos 1.14-15*

<sup>14</sup>Jatsi quiha Galilea mai qui Jesu bacaniquë. Espíritu Santo chama jayani quiha. Jabi toa maí tsi quiha chani pacananiquë ja acai ca yoati na. <sup>15</sup>Jasca, jato catiti xobo xo tsi Jesú tiismaniquë.

—Anomaria tsi xo toa joni ra —i nohiria bo niquë jahuë chani nicahax na.

### Nazarét cabá Jesu nianina

*Mateo 13.53-58; Marcos 6.1-6*

<sup>16</sup>Jatsi quiha Nazaret qui Jesu joniquë, naa jahá ja shinahani ca yacata. Jabi toa barí tsi jato catiti xobo qui ja caniquë tiisimahi na. Jahuë jabi quiha. Jatsi quiha Jesu niiniquë Quënëhacanish cabo nicamaxëna. <sup>17</sup>Isaías yamabá quënëni ca libro Jesu qui acacani quiha. Japëcaxo tsi quiha Dios Chani jato ja nicamaniquë.

<sup>18</sup>—“E bëta xo Ibobá Shinana ra.

Ea ja raaquë, Chani jia ca noitiria cabو qui ë yoano.

Ea ja raaquë, ‘Paquëmahacaxëqui mato’ i achiqui cabو qui ë no, ‘Jistëquëxëqui mato’ i bëco cabو qui ë no.

Ea ja raaquë cohüë cabو ë mëbino.

<sup>19</sup>‘Ibobá nohiria bo xabahamati xaba tsi xo naa’ ë iti xo” —nëa tsi Jesu

nëcaniquë Dios Chani nicamahi na.

<sup>20</sup>Nicamaxo tsi quiha libro Jesú mapaniquë. Jatsi ibo qui axo tsi quiha ja tsahoniquë. Jatsi xobó ca nohiria tëquëtá tsaya-tsayaniquë ratëquí na. <sup>21</sup>Jatsi,

—Jaboqui mato bësojó tsi jatihuahacaquë Isaías yamabá quënënina ra —i jato qui Jesu niquë.

22 Jatsi Jesú yoani ca qui nohiria bo shina-risiquiniquë.

—Anomaria tsi xo toa ja chanihaina ra. ¿José baquë ma ni naa sa? —itsi quiha nohiria bo niquë.

23 Jatsi quiha Jesú jato quëbiniquë:

—Mato yosiba yoba éa yoacasqui mato tia, naa “Noqui pari mëbihuë, nohiria huëtsa bo mi mëbinox pari” iquiina. Jasca, “¿Jénahuariaxo raca mi coni yacata xo tsi jisti bo ayamahai rë, naa Capernaum mai xo tsi mi aquitaha jascaria?” itiari è qui xëqui mato ra. 24 Jama, jaha ja coni ca yaca qui Dios Chani yoati ibo jono tsi jahuë chani bicasyamahi quiha jahuë yacatá ca nohiria bo pë iquia ra. Jascaria, éa bicasyama xo mato rë. 25 Ea nicaparicana. Mato parayamaquia. Jabi Elías yamabo bësono tsi quiha huéstima ca bënë imanish cabo racapaoniquë jodioba maí no. Toatiyá tsi quiha tres año y medio no tsi yama oi iniquë. Jasca, oriquiti binianiquë nohiria tëquë rë. 26 Jama, toa nohiria bo qui Elías yamabo raahacayamaniquë mëbiti. Jama, noitiria ca bënë imanish ca, naa carayana qui Elías yamabo raahacaniquë ra, naa Sidón basima ca Sarepta yacatá ca racanish ca yoxa qui. Tocapijaniquë ra, Elías yamabo qui jahuë nohiria bá nicacasyamani iqui na. 27 Jasca, Eliseo yamabo bësono tsi quiha huéstima ca leproso bo, naa bonohuaxëni cabo iniquë jodioba maí no. Jama, ja jénimahuahacayama-caniquë, Eliseo yamabo qui ja chitimiyamacani iqui na. Jama, carayana ca Naamán yamabo jénimahuahacaniquë ra —nëa tsi Jesu nécaniquë.

28 Jatsi Jesu qui caxarianiquë toa catiti xobó ca nohiria tëquë jahuë chani nicahax na. 29 Ja niitapicaniquë ja qui tsamixëna. Niixo tsi quiha yaca cachá Jesu ja xérëcaniquë. Xérëxo tsi quiha témachi cachá ja bocaniquë, naa jato yaca rohahuahacani cató no. Toa quëmapo xo tsi rënichi Jesu ja niajahuacascani quiha axëna. 30 Jama, toa nohiria misco Jesu naconiquë pa, jato jisbëriaquí na.

### **Yoshi jayanish ca joni**

*Marcos 1.21-28*

31 Jaquirëquë quiha Capernaum yaca qui Jesu caniquë, naa Galileá ca yacata. Toa xo tsi nohiria bo tiisimatsi quiha Jesú huaniquë joiti barí no. 32 Jabi ja tiisimani ca qui nohiria bo rateniquë, chama ya ja tiisimani quëshpi na.

33 Toa catiti xobó tsi quiha yoshi jayanish ca joni iniquë. Joi pistiamá tsi quiha ja quénaniquë:

34—Jishopë. Noqui jisbayahuë ra, Nazarét ca Jesú. Noqui quëyohi mi joquë pë. Mia cahëquia. Dios Baqué jiaxëni ca xo mia ra —i ja qui yoshi niquë.

35 Jatsi quiha Jesú raahaniquë:

—Pasihuë. Joni quima ax natséquëhuë —iquiina.

Jatsi pë nohiria bo bësojó tsi yoshiní joni nianiquë mai qui. Niahax joni quima ja natséquëniquë. Jatsi jénima toa joni ini quiha. 36 Jatsi nohiria ratëyoniquë.

—¿Jahuë chani ni naa sa? Chamá tsi yoshi bo qui ja chaniquë pa. Natséquëquë jahuë yoshi bo ra —i nohiria bo niquë.

Toca tsi ja chaninacani quiha ratëhi na. 37 Jatsi quiha toa maí tsi chani pacananiquë, Jesú ani ca yoati na.

### Simón raisi jénimahuahacanina

*Mateo 8.14-15; Marcos 1.29-31*

38 Catiti xobo jisbaya tsi quiha Simón xobo qui Jesu caniquë. Iquihi quiha Simón raisi iniquë rë. Jatsi quiha Jesu qui ja chanicaniquë yoaxëna. 39 Jatsi jahuë naquëtë qui Jesu jiconiquë. Jicohax jahuë oxati tapaí ja niiniquë. Jatsi quiha jahuë iqui qui Jesu chaniniquë ja janacano. Jatsi ja janacatapiniquë ra. Bamahaxma tsi ja niiniquë. Jénima ja ini quiha. Niixo tsi jato qui oriquiti ja taaniquë pa.

### Iquicanaibo Jesú jénimahuanina

*Marcos 1.35-39*

40 Bari chixabano tsi quiha isicanaibo, iquicanaibo, anomaria cabo, tihí cabó nohiria bá Jesu qui bëniquë ja jénimahuahacacano. Jatsi bëcanish cabó tëquë ja motsaniquë jahuë mëquënenó. Jato tëquë ja jénimahuani quiha. 41 Jasca, huéstima ca yoshi bo natsécahacani quiha nohiria bo quima. Natséquëhax ja quénacaniquë:

—Dios Baqué xo mia ra —iquiina.

Jatsi quiha yoshi bo Jesú raahaniquë. Jato ja pasimani quiha, Dios raahacanish ca Xabahamati Ibo ja iqui ca ja cahëcani quëshpi na. 42 Jaquirëquë huëaquë tsi yaca Jesú jisbayaniquë xobo yama ca iti qui caxëna. Jatsi quiha nohiria bá yopaniquë. Yopaxo tsi quiha Jesú mératsijahuacaniquë. Jisi tsi,



*Jesú noitiria cabo jénimahuanina*

—Jari cayamahuë rë. No bëta mi chitëno ra —i ja qui nohiria bo niquë.

43 Jama,

—Yaca huëtsa bo qui ë cati xo, “Nohiria bo otocatsi quiha Dios” ixëna. Ja tsi xo toa ë raahacanina —i Jesu jato qui niquë.

<sup>44</sup>Jatsi quiha jodioba mai xo tsi Dios Chani Jesú yoabonaniquë jato catiti xobo xo na.

### Jesú jahuë rabëti bo quënanina

*Mateo 4.18-22; Marcos 1.16-20*

**5** <sup>1</sup>Huësti barí tsi quiha Genesaret ia quëmapó tsi nii Jesu iniquë, Dios Chani yoahi na. Ja qui nicapama tsi ja qui nohiria bo quëtsoniquë. <sup>2</sup>Jatsi dos ca rërénish ca noti bo Jesú jisniquë. Mëquëya quiha. Basima tsi jato ibo bo ini quiha, jato nishi bo chocohacaina. <sup>3</sup>Jatsi nohiria misco iqui tsi quiha noti qui Jesu jiconiquë jabaxëna. Jabi Simón notí ja ini quiha. Jicohax,

—Tori pistia noti chishtëquirimahuë —i Pedro qui ja niquë.

Jatsi noti xo tsi nohiria bo ja tiisimaniquë tsahoxo na. <sup>4</sup>Jahuë chani jatihuahax Pedro qui ja chaniniquë:

—Tori pistia noti rëboohahuë, naa paxnëmi ca qui. Toa xo tsi mato nishi niacahuë sani bixëna —i Jesu niquë.

<sup>5</sup>Jatsi Simón quëbiniquë:

—Mahitsa no tanashinaquë rë. Yama a. Jama, “Niahuë” i pi mi no tsi aqui noa tia —i Pedro niquë.

<sup>6</sup>Jatsi quiha jato nishi bo ja niacaniquë. Ja niacaquë tsi quiha nishi qui huëstima ca sani rëoconiquë. Tihiria ca racana. Rérëtsë-paimaria jato nishi ini quiha. <sup>7</sup>Jaha tsi quiha jato rabëti bo qui jato mëquéné tsi ja bëebëehacaniquë ja bëcano jato mëbixëna. Jatsi jato rabëti bo bëcaniquë mëbixëna. Jato noti ja rëacani quiha. Huëstima ca sani iqui tsi jëtëquëpaimaria jato noti bo ini quiha. <sup>8</sup>Tocapijani ca jisi tsi Jesu bësojó tsi Pedro mëniniquë.

—Noqui jisbayahuë, Taitá. Ea tsi xo jochahuaxëni cato ra. E bëtacasyama xo mia tia —i ja qui Pedro niquë.

<sup>9</sup>Jabi ratëniquë Pedro, ja bëtanish cabو, naa tihiria ca sani ja bicani tahëhax na. <sup>10</sup>Jasca, ratëniquë Jacobo, Juan ri, naa Zebedeo baquë bo. Jabi Pedro ya yonoconabë-quinish cabو ja icani quiha. Jatsi,

—Raquëyamahuë, Pedró. Jaboqui rohari tsi joni bo bixëqui mia. Dios quinia jato qui jismaxëqui mia —i ja qui Jesu niquë.

<sup>11</sup>Jatsi jato noti bo rërëhaxo tsi jatiroha ca ja jisbëriacaniquë Jesu banahuaxëna.

### Leproso inish ca Jesú jénimahuanina

*Mateo 8.1-4; Marcos 1.40-45*

12 Jabi jahuëcaraca yaca shishopama tsi quiha lepra jaya ca joní Jesu bëchaniquë. Bonohuaxëni ca joni ja ini quiha. Jesu jisi tsi ja bësojó ja mënинiquë.

—Apicatsi tsi éa jénimahuati mëtsa xo mia, Taitá —iriatsi ja niquë.

13 Jatsi quiha Jesú joni motsaniquë. Motsahax,

—Mia jénimahuacasquia ra. Jénima xo mia —i ja qui ja niquë.

Jatsi quiha jahuë bono tapoyotapiniquë ra. 14 Jatsi joni Jesú yobaniquë:

—Jénipimiha ca huëtsa bo yoayamaxëhuë. Bamaxoma tsi arati ibo qui mimë jismata. Moisés yoani ca jahuë ja qui ahuë tēpasti, naa mi buhuëxéhai ca quëshpi na. Tocapimino tsi jénima mi nori ca cahëcaxëcani quiha nohiria bo.

15 Jaquiréquë quiha Jesu yoati tsi chani pacanarianiquë. Ja iqui tsi ja qui huéstima ca nohiria quëtsoniquë jahuë chani nicaxëna. Jasca, ja bëcani quiha jénimahuahacaxëna. 16 Jama, Jesú jato jisbërianiquë nohiria yama ca iti qui caxëna. Jaha tsi quiha Dios qui ja bëhoxniquë.

### Jesú mohitimaxëni ca jénimahuanina

*Mateo 9.1-8; Marcos 2.1-12*

17 Jesú nohiria bo tiisimano tsi quiha ja tahë tsi fariseobo, yoba tiisimacanaibo, tihi cabو tsaho iniquë. Jabi huéstima ca yaca bo ax ja bëcani quiha. Galileá ca yaca bo, jodioba maí ca yaca bo, Jerusalén, tihi cabو ax ja bëcaniquë Jesu nicaxëna. Jabi Ibo Dios chama Jesú jayani quiha nohiria jénimahuati. 18 Jatsi quiha joni bá mohiyama ca bëniquë jahuë oxatí no. Xobo qui cahëhax ja jicocascaniquë, Jesu bësojó noitiria ca joni janaxëna. 19 Jicotimaxëni ja icani quiha nohiria misco iqui na. Jatsi quiha xobo mapasti qui ja bocaniquë. Jaha xo tsi quiha teja bo ja tsëcacaniquë quinihuaxëna. Quinihuaxo tsi quiha naxéréquë tsi joni ja botëmaniquë jahuë oxatí no. Jesu bësojó tsi ja botëmajahuacani quiha. 20 Jabi mohiyama ca jénimahuati mëtsa ca Jesu iqui ca joni bá cahëni quiha. Jasca, ja chahahuacanai ca jisi tsi,

—Masahacaquë mi jocha, noho baquë —i joni qui Jesu niquë.

**21** Jatsi quiha jamë xéréquë tsi chaninatsi fariseobo, yoba tiisimacanaibo, tihí cabó niquë. Shinahax,

—Quiaxení ca joni tsi xo naa ra. Dios pasomaha chanihi quiha pë. ¿Jénahuariaxo raca jocha ja masana? Jaroha xo Dios —i jaca niquë Jesu yoati na.

**22** Jama, ja shinabéquicanai ca jahuë bo Jesú cahéniquë. Cahéhax,

—¿Jéniriahax toca tsi shinacanai pa? **23** ¿Jénica ni toa béroria

ca yoati? “Masahacaqué mi jocha” ¿iti ni? “Niina. Cohuë” ¿iti ni?

**24** Nohiria ba jocha masati chama è jaya ca ma cahéno ra —i quiha jato qui Jesu niquë.

Jatsi mohitimaxení ca qui Jesu chaniniquë:

—Niina. Mi oxati bihuë. Mi xobo qui cata —iquina.

**25** Jatsi niitapiniquë joni jato bësojó no. Jatsi jahuë oxati ja bitapiniquë. Bichi tsi quiha jahuë xobo qui ja caniquë. Jia tsi Dios ja ocahuaniquë ra. **26** Jasca, shina-risiquiniquë nohiria. Ja ratéyocani quiha. Jatsi Dios ocahuatsijahuacaniquë jato ri:

—Anomaria tsi xo naa jaboqui no jisina ra —iquina.

### Jesú Levi quënanina

*Mateo 9.9-13; Marcos 2.13-17*

**27** Jaquiréquë quiha xobo jisbaya tsi gobierno bax parata binish ca joni Jesú bëchaniquë, naa Leví icanai cato. Jahuë parata biti xobó tsi tsaho ja ini quiha. Jatsi,

—E bëta mi jono —i Leví qui Jesu niquë.

**28** Jatsi Leví niiniquë. Niixó tsi quiha jatiroha ca ja jisbérianiquë Jesu banahuaxëna.

**29** Jatsi quiha jahuë xobo xo tsi Jesu Leví orihiuacasníquë. Toá tsi ini quiha nohiria misco, naa gobierno bax parata bicanaibo, Leví rabëti huëtsa bo. **30** Jasca, toá tsi fariseobo, yoba tiisimacanaibo, tihí cabó ini quiha jato ri tsaya-tsayaxëna. Jatsi Jesu pasomaha ocahuatsijahuacaniquë jahuë rabëti bo qui:

—¿Jénihax tsi gobierno bax parata bicanaibo, jochahuaxení cabó, tihí cabó ya tsi oriquicanai pa? —i jaca niquë.

**31** Jatsi quiha Jesú jato quëbiniquë nicaxo na:

—Doctor qui bocani quiha anoma cabó roha. Jénima cabó tsi xo cayamahaina. **32** Jasca, jamë shinamisxení cabó quënahí è joyamaniquë; jama, noitiria ca jochacanaibo jato jocha quima Dios quirí bësomahi nori —nëa tsi quiha jato qui Jesu nécaniquë.

### Samati jabi

*Mateo 9.14-17; Marcos 2.18-22*

**33** Jatsi quiha nëca tsi Jesu qui nohiria bo chaniniquë:

—Huéstima tsi xo Juan rabëti bo samacanaina. Jasca, huéstima tsi xo Dios qui ja bëhoxcanaina ra. Tocacani quiha fariseoba jabi acanaibo ri. Jama, mi rabëti bo tsi xo tocayamahaina pa. Mi rabëti bo tsi xo picanaina, jënë acaina rë —i Jesu qui jaca niquë.

**34** Jatsi quiha Jesú québiniquë:

—¿Joní ahui yano tsi samahi ni ahui yahax cato rabëti bo pa? Iyamacani quiha ra. Cohuëti xaba ma xo. Toa barí tsi ja bëta oriquicani quiha.

Jascaria, jaboqui samayamahi quiha noho rabëti bo ri jato bëta ë iquë no.

**35** Jama, jato quima ë mëbihacano tsi samacaxëcani quiha. Jatsi toa barí tsi cohuëcaxëcani quiha. Jatsi samacaxëcani quiha toatiyá no —i Jesu niquë.

**36** Jatsi joxëhai ca arati quinia paxa ca yoati tsi Jesu chaniniquë nëca cató no:

—Jahuë sahuëti paxa ca quima quësi quësaya mahi quiha nohiria, jahuë sahuëtixëni pishpaxëna. Tocapiquí tsi jahuë sahuëti paxa ca yosihuahi quiha. Jasca, tsocoxéhi quiha quësi, jaha bëquiyamahai quëshpi na. (Jascaria tsi noho tiisi paxa cató tsi mato arati jabi siri shomahuatimaxëni xo mato. Juharisi ma xo.)

**37** Jasca, mato jabi ma xo toa bichi ca sota sirixëni qui jënëria paxa ca rëhuihaina. Anoma quiha. Ma rëhuipino tsi bichi ca sota poshaxëhi quiha naa jënëria paxa cato. Ja poshiquë tsi japaquëxéhi quiha naa jënë rë. Yosihuahacaxëhi quiha bichi ca sota ri.

**38** Jama, bichi ca sota paxa ca qui jënëria paxa ca rëhuihacaxëti xo. Toca tsi yosihuahacayamaxëhi quiha sota. Jasca, japaquëyamaxëhi quiha jënë. (Jascaria tsi arati quinia huëtsá tsi noho tiisi paxa ca tiisimahacaxëti quiha. Mato arati jabi siri jaha bëquiyamahai quiha noho tiisi paxa cato ra.)

**39** Jama, noho tiisi paxa ca bicasyamaxo nohiria bo rë. Jato arati jabi siri bo noiyoicani quiha pë. “Oquë tsi xo noba arati jabi siri bo” icani quiha rë. Jato arati jabi rarinamacasyamacani quiha ra —nëa tsi Jesu nëcaniquë jahuë tiisi paxa ca yoati na.

### Joiti bari Ibo

*Mateo 12.1-8; Marcos 2.23-28*

**6** **1** Joiti barí tsi quiha jahuë rabëti bo ya huai bo nacohi Jesu iniquë. Nacopama tsi jahuë rabëti bá bimi bëro risaniquë. Risaxo tsi quiha jato mëquené tsi ja huërocaniquë pixëna.

**2** Jatsi quiha huësti huësti ca fariseobá Jesu nicaniquë:

—¿Jénixo tsi yoba pasomaha ca acanai? Anoma tsi xo yonocohaina joiti barí no ra —i Jesu qui fariseobo rabëroha niquë.

<sup>3</sup>Jatsi quiha Jesú jato quëbiniquë:

—¿Quënöhacanish cabo ó ca David yamabá ani ca ma tsayayamayamani, naa Dios arati xobo qui ja jicoquë no? <sup>4</sup>Jicoxo tsi quiha Dios bësójó ca janani ca mapari ja bini quiha pixëna. Piniquë quiha jahuë joni bo ri. Jabi arati ibo bá mapari ja picaniquë pa. Roa quiha. Jabi noba jabi pasomaha ja picanai ca iniquë ra; jama, ja jochayamacaniquë iquia. <sup>5</sup>Jascaria, jénima tsi xo toa no acaina iquia, joiti bari Ibo è nori quëshpi na —nëa tsi fariseobo qui Jesu nécaniquë.

### Mëquë choni jaya cato

*Mateo 12.9-14; Marcos 3.1-6*

<sup>6</sup>Joiti bari huëtsá tsi quiha catiti xobo qui Jesu jiconiquë. Jicoxo tsi nohiria bo ja tiisimaniquë. Jabi toá tsi quiha tsaho iniquë mënëcayá ca mëquë choni jayanish ca joni. <sup>7</sup>Jatsi quiha Jesu tsayatsi fariseobo, yoba tiisimacanaibo, tihi cabá huaniquë. Joiti barí pi Jesú joni jénimahuaxëhai ca ja jiscascani quiha, ja qui quësocatsi na. <sup>8</sup>Jama, ja shinacanai ca Jesú cahëni quiha. Jaha tsi mëquë choni jayanish ca joni qui ja chaniniquë:

—Niihuë. Néri johuë —iquiina.

Jatsi joni joiniquë. Joihax toá tsi ja niiniquë. <sup>9</sup>Jatsi quiha fariseobo, yoba tiisimacanaibo, tihi cabo qui Jesu chaniniquë:

—¿Yoi ni, jia ni, naa joiti barí tsi jia ca acaina? ¿Yoi ca axëhi ni noa? ¿Naa joni mëbixëhi ni noa? ¿Mëbiyamaxëhi ni noa? —i jato qui ja ni quiha.

<sup>10</sup>Bëro boho-bohoquí tsi quiha jato Jesú jisniquë. Jatsi,

—Mi mëquë mëstëhuana —i joni qui ja niquë.

Jahuë mëquë ja mëstëhuajahuaquë tsi quiha ja jénimahuahacaniquë. <sup>11</sup>Jatsi quiha Jesu qui fariseobo, yoba tiisimacanaibo, tihi cabo caxarianiquë, joiti barí tsi toa joni ja jénimahuani iqui na. Jatsi chaninatsijacaniquë:

—¿Jénahuariaxëhi ni noa sa Jesu qui? —iquiina.

### Jesu doce ca rabëtiria cabo

*Mateo 10.1-4; Marcos 3.13-19*

<sup>12</sup>Jaquirëquë quiha maca bo qui Jesu caniquë bëhoxhi na. Toa xo tsi quiha baquicha ja raaniquë Dios qui bëhoxquí na. <sup>13</sup>Huëaqué

tsi jahuë rabëti bo ja biniquë. Doce ca joni bo ja bihaca tsi jahuë chani chitahëhuati ibo bo jato ja manëmaniquë. Jabi ja bini ca tsi xo naa:

**14** Simón, naa Pedro ja janëni cato.

Pedro noma Andrés,  
Jacobo,  
Juan,  
Felipe,  
Bartolomé,

**15** Mateo,

Tomás,  
Alfeo baquë Jacobo,  
gobierno pasomaha ca Simón,

**16** Jacobo baquë Judas,

Judas Iscariote, naa jodioba chama bo qui Jesu mëanish cato.  
Tahi cabu Jesú bini quiha jahuë Chani chitahëhuati ibo bo iti.

### Huëstima ca jënimahuahacanina

Mateo 4.23-25

**17** Maca bo ax jahuë rabëti bo ya botëhax mai para ca ití tsi Jesu niiniquë chanixëna. Toá tsi quiha huëstima ca banahuacanaibo ini quiha jahuë chani nicaxëna. Misco quiha. Jodioba mai, Jerusalén, ia quëpë ca Tiro, Sidón yaca bo, tihia ca iti bo ax huëstima ca nohiria bëcani quiha jënimahuahacaxëna. **18** Jatsi jënimahuahacani quiha yoshi jayanish cabo. **19** Jasca, nohiria bá Jesu motsani quiha, ja quima jato jënimahuati chama tsëquëni iqui na. Jabi toca tsi jënimahuahacacani quiha ja motsacanai cató no.

### Ranicanaibo — Cohuë cabu

Mateo 5.1-12

**20** Jahuë rabëti bo bëis-hax tsi jato qui Jesu chaniniquë:

—Shoma xo mato noitiria cabu, Diós otohai ca qui ma jicoxëhai quëshpi na.

**21** ‘Shoma xo mato paxnacanaibo. Sëyahua hacaxëqui mato.

Shoma xo mato aracanaibo. Ranixëqui mato.

**22** ‘Ea tahëhax pi mato qui nohiria caxano tsi mato bëta pi ja rabëncasyamacano tsi shoma xo mato ra. Jasca, shoma xo mato, nohiria bá mato ocahuauquë no, ëa ma chahahuahai ca tahëxo

na. <sup>23</sup>Jabi ë bacano tsi raniriaxëqui mato, huëstima ca mato naipá ca copi jiaxëni cabو ma jayaxëhai quëshpi na. Toa barí tsi anomariaxëhi quiha mato copi ra. Jabi Dios Chani yoanish cabو tënëmahacani quiha jato ri, naa jaboqui ma yosihacahai jascaria.

<sup>24</sup>Jama, noitiria xo toa jahuëmishni bo jayaria cabو. Nëá roha tsi ranicani quiha rë.

<sup>25</sup>Noitiria tsi xo toa jaboqui sëyacanaibo. Paxnacaxëcani quiha.

'Noitiria tsi xo toa jaboqui shiracanaibo. Toa barí tsi araconacaxëcani quiha, cohuë iquiina.

<sup>26</sup>Noitiria xo mato, paraxo tsi jia tsi nohiria bá mato ocahuaquë no. Jabi toca tsi mato mahitsa ca Dios Chani yoanish cabو mato rëquébo yamabá oquëhuani quiha jato ri. Jato qui jia jato mahitsa ca chani iniquë pë —nëa tsi Jesu nëcaniquë jahuë rabëti bo yobahi na.

### Noqui caxacanaibo no noino

Mateo 5.38-48; 7.12

<sup>27</sup>Jabi ëa nicacanaibo qui naa yoba aquia: Mato qui caxacanaibo noicana. Jato mëbicana. <sup>28</sup>Mato ocahuacanaibo shomahuacana. Mato ranimisxëni cabو bax bëhoxcana. <sup>29</sup>Tsohuëcaracá pi mato tapaishano tsi ja qui mato tamo huëtsa acana tapaishahacati. Mato sahuëti pi joní bino tsi ja bëta iquinayamacana. Toa joni qui mi camisa ri acana. <sup>30</sup>Mato jahuë bo pi joní bënanø tsi ja qui acana. Acax, "Jahari bicasquia ra" iyamacana jahari bixëna. <sup>31</sup>Jia tsi nohiria huëtsa shomahuacana, naa mamë ma shomahuahacacatsai jascaria.

<sup>32</sup>Jabi bëroria tsi xo mato noicanaibo noihibaina. Iriama tsi xo toca ca ma noihibaina iquia. Jabi jato noicanaibo noihi quiha chahahuayamacanaibo ri. <sup>33</sup>Bëroria tsi xo mato mëbicanaibo ma mëbihibaina. Iriama tsi xo toca ca ma mëbihibaina ra. Toca tsi acani quiha chahahuayamacanaibo ri. <sup>34</sup>Jabi bëroria tsi xo toa mato jahuë bo prestahuahacaina, mato qui nohiria bá parata aquë no. Tocacaqui chahahuayamacanaibo ri parata bixëna. <sup>35</sup>Tocayamacana. Jabi nëcacana: Mato qui caxacanaibo noicana. Jato mëbicana. Mato jahuë bo prestahuahacana, jahari jahuëcara biti ó pasoyamaquí na. ¿Jabi "Gracias" iyamacanaibo, yoixëni cabو, tihí ca nohiria bo mëbiyamayamahi ni Dios ra? Jato mëbihibaina quiha. Japi tocacana mato ri. Tocapiquí tsi copi jiaxëni ca bixëqui mato

ra. Mana ca Dios baquë bo ixëqui mato. <sup>36</sup>Jabi noi-noiriahí quiha mato Jahëpa Dios. Japi noicana, ja noihai ca jascaria.

### Ocahuayamacana

*Mateo 7.1-5*

<sup>37</sup>Huëtsa bo raniyamacana. Jatsi mato raniyamaxëhi quiha Dios ri. Huëtsa bo qui quësoyamacana, mahitsa. Quësoyamapimano tsi mato qui quësoyamaxëhi quiha Dios ri. Jasca pi nohiria mato pasomaha jochano tsi jato jocha shina-bënocana. Tocapimano tsi mato jocha shina-bënoxëhi quiha Dios ri. <sup>38</sup>Jasca, huëtsa bo qui acana. Huashiyamacana. Tocapimano tsi mato qui axëhi quiha Dios. Jatsi huësttimaria ca bixëqui mato. Ma acai ca huino quiha. Oquë ca ixëhi quiha. Jia pi nohiria huëtsa bo ma mëbino tsi mëbihacaxëqui mato ri. Jama jia pi huëtsa bo ma mëbiyamano tsi iriamaxëhi quiha ma shomahuahacahai ca ri.

### Mahitsa ca maestro bo yoati Jesú yobanina

<sup>39</sup>Jatsi chani Jesu jato qui yoaniquë:  
 —¿Jénahuariaxo raca bëco ca joní, bëco ca joni huëtsa mëpina? ¿Naporó quini qui paquéyamayamacaxëcahi ni jato tëquëta? Jabi jasca xo mahitsa ca maestro bo ri. Janyama bocani quiha ra. Janyama mëpihacahi quiha jato alumna bo ri rë. <sup>40</sup>¿Jénahuariaxo raca jato mahitsa ca maestro oquë tsi alumno bá cahëna? Jama, maestro jia cató pi jahuë alumno bo tiisima-tiisimano tsi ¿jähari si iyamayamacaxëcahi ni? Jato maestro jascacaxëcani quiha jahuë alumno bo ra. <sup>41</sup>Jabi mabë xatë bá janyama ca acai ca tsayaxëni xo mato pë. Jato tsaya-tsayaquí tsi yoi ca ma acai ca jisyamaqui mato ra. <sup>42</sup>Anoma tsi xo toca ca ma acai ri. ¿Jéniriahax raca “Anoma xo mi acaina, èbë xatë bá” i ma na? ¿Jéniriahax, “Mia è mëbino ra” i ma na, oquë ca jocha ma aquë no mato ri pë? Jariapari mato shina ó ca jocha tsayaparicana, quiaxëni cabá. Mato oquë ca jocha niahax mabë xatë bo mëbiti mëtsa ixëqui mato ra, jahuë jocha niamaxëna.

### Bimi jihuí saihuahaina

*Mateo 7.17-20; 12.34-35*

<sup>43</sup>Jabi bimi jia ca saihuatinaxëni tsi xo jihui yoi cato. Jascaria, bimi yoi saihuayamahi quiha jihui jia cato. <sup>44</sup>Ja saihuacanai ca

bimí tsi cahéhacahi quiha jatiroha ca jihui. 45 Jénahuariaxo bimi jia ca ronoxé saihuana? Bimi jia ca saihuatinaxéni quiha. 45 Jascaria, jabi jia ca saihuahi quiha joni jiaxéni cato. Jia tsi xo toa ja acaina, shina jia ca ja jaya ca iqui na. Jascaria, jabi yoi ca saihuahi quiha joni yoi cato. Anoma tsi xo toa ja acaina, shina yoi ca ja jaya ca iqui na. Jabi yoi ca jahuë bo pi jahuë shina rëamëno tsi chani yoi ca chanixéhi quiha ra.

### **Jabi jia ca jaya cato — Jabi yoi ca jaya cato**

*Mateo 7.24-27*

46 ‘¿Jénihax tsi “Ibobá” éa quénacanai pë, noho yoba ma ayamaquë no? 47 Tobi ë qui bëcanaibo. Tobi éa nicacanaibo, naa noho yoba acascaniba. 48 Xobo rohahuahai ca joni iquiria ca xo. Jariapari tsi mai huëyohi quiha, maxax bërohuaxëna. Jatsi maxax cacha jahuë xobo rohahuahai quiha. Jatsi jénë baino tsi xobo qui tocaxqui jénë chama; mahitsa. Poxoyamahi quiha xobo, maxax cacha ja rohahuahacani iqui na. 49 Jama, mai cacha xobo rohahuahai ca joni iquiria tsi xo noho yoba ayamahai cato. Noho yoba nicahax ja qui yoi quiha. Jabi jénë baino tsi ja qui tocaxqui jénë chama. Jatsi poxohi quiha xobo rë, maxax cacha ja rohahuahacayamani iqui na. Poxoyoxéhi quiha toa xobo ra —i jato qui Jesu niquë.

### **Romano ca capitán**

*Mateo 8.5-13*

**7** 1 Jahuë chani jatihuahax tsi quiha jahari Jesu caniquë Capernaum yaca qui. 2 Toá tsi quiha romanoba capitán racaniquë, naa yonati jayanish cato. Jabi iquihi quiha jahuë yonati iniquë; rësopaimaria. Jabi jahuë yonati naa capitán noini quiha. 3 Jatsi quiha Jesu yoati tsi capitán nicaniquë. Nicaxo tsi quiha jodioba yosibo rabéroha ca Jesu qui ja raaniquë, jahuë xobo qui joti nicamaxëna, jahuë baquë ja jénimahuano iquish na. 4 Jatsi quiha Jesu qui naa yosibo bocaniquë. Boxo tsi quiha Jesu ja nicacaniquë:

—Capitán bax jahuë yonati mi jénimahuano ra, shinajiaxéni ca joni ja nori ca quëshpi na. 5 Jasca, noba jimibo noihi quiha naa joni ra. Noba catiti xobo ja aniquë no bax na ra —nëa tsi quiha Jesu qui jodioba yosibo nécaniquë.

**6** Jaha tsi jato bëta Jesu caniquë. Jahuë xobo ja basimano tsi quiha jahuë rabëti bo capitán raaniquë chani ya.

—Mimë huënhahuayamana, Ibobá. Noho xobo qui mi jicoyamano, anoma ca joni ë nori quëshpi na. **7** Ja tsi xo toa ë joyamahaina, noho jocha iqui na ra. Mi niihai cató pi mi chanino tsi jénimahuahacaxëhi quiha noho yonati ra. **8** Jénima xo mi chani ra. Jabi ëa oquë ca chama bo nama xo ëa. Jato nicati cahëquia. Jasca, ëa nama xo soldado bo ri. Ea nicacani quiha jato ri. “Bocata” i pi ë no tsi bocani quiha. “Bëcahuë” i pi ë no tsi bëcani quiha. Jabi “Jénimahuë” i pi mi no tsi jénimaxëhi quiha noho yonati iquia — nëa tsi capitán raani ca chani nëcaniquë.

**9** Jatsi quiha Jesu shina-risiquiniquë jahuë chani nicahax na.

—Anomaria tsi xo naa joni ë qui chitimihaina ra. Jia tsi xo. Israél cabo chitimihai ca oquë quiha —i Jesu niquë.

**10** Jesu jisbaya tsi jahari jato capitán xobo qui yosibo bocaniquë. Jénima quiha capitán yonati iniquë ra.

### Shinapayo Jesú bësomanina

**11** Jisbëria tsi quiha yaca huëtsa, naa Naín icanai ca qui Jesu caniquë. Jasca, jahuë rabëti bo, nohiria misco, tihi cabo ja bëta bocaniquë. **12** Jatsi yaca qui ja basimacano tsi quiha rësohax ca shinapayo ca joni yaca cacha nohiria bá bohi iniquë. Noitiria ini quiha jahuë jahëhua; bënë imanish ca quiha. Jasca, yama ini quiha jahuë baquë huëtsa rë. Jabi jahuë baquë maihuahi bocahi ja icani quiha. Jasca, ja bëta huëstima ca yacatá ca nohiria ini quiha jato ri.

**13** Jatsi quiha Jesu cohüenaniquë yoxa jisi na. Jatsi,

—Arayamahuë, caí —i ja qui ja niquë.

**14** Jatsi quiha joni nanëhacani ca caja qui Jesu caniquë. Cahax caja ja motsaniquë. Jatsi niiniquë caja iahai ca joni bo. Jatsi,

—Bësohuë, shinapayó —i Jesu niquë.

**15** Jatsi quiha bësoyama ca joni tsahoniquë pa. Ja chanitapiniquë. Jatsi quiha jahuë jahëhua qui jahari baquë Jesú aniquë.

**16** Ratëniquë nohiria tëquë. Jia tsi Dios ja ocahuacaniquë:

—Noqui xërëquë tsi xo Dios Chani yoati Ibo-iboria ra. Jahuë nohiria yoi bo mëbicatsi quiha Dios ra —i jaca niquë.

**17** Jabi toa barí tsi quiha Jesú ani ca huëstima ca nohiria bá nicaniquë. Nëama pacanani quiha toa chani. Jodioba mai, jato tëamë ca mai bo, tihi cabá tsi Jesú ani ca nicahacani quiha.

**Juán dos ca joni raanina Jesu nicati**  
**Mateo 11.2-19**

**18** Jabi Jesú ani ca jahuë bo yoati tsi ashimanish ca Juan rabëti bá nicaniquë. Nicaxo tsi quiha Juan ja yoacaniquë. **19** Jatsi quiha dos ca joni, naa jahuë rabëti bo Juán quénaniquë Jesu qui raaxëna. Jabi Xabahamati Ibo Jesu iqui ca ja cahëcasni quiha jaa ri, Jatsi,

—“Johai ca Xabahamati Ibo ma ni mia? ¿Joni huëtsa ó pasoxëhi ni noa?” i Jesu qui cahuë —nëa tsi quiha Juan jato qui nëcaniquë.

Jatsi quiha jahuë rabëti bo Juán raaniquë nicaxëna. **20** Jesu qui bëhax,

—Noqui Juán raaquë. ¿Johai ca Xabahamati Ibo ni mia? ¿Joni huëtsa ó pasoxëhi ni noa? Cahëcatsi quiha Juan ra —i Jesu qui jaca niquë.

**21** Jabi ja bëcaquë tsi quiha nohiria bo jënimahuahi Jesu iniquë. Huéstima ca nohiria jënimahuahacani quiha, naa iquicanaibo, yoshi jayanish cabo. Jasca, huéstima ca bëco cabo taismahacani quiha jato ri. **22** Jatsi Juán raani ca joni bo Jesú quëbiniquë:

—Jahari bocata. Ma tsayahana, ma nicahana, tihí cabó Juan yoacata. Taiscani quiha bëco cabo. Tapicani quiha huico choni jaya cabo. Pasohi quiha pasoyamacanaibo. Bësotëquécani quiha bësøyama cabo. Jasca, xabahamati Chani nicacani quiha noitiria cabo. **23** Jabi ranixëhi quiha è qui chitimicanaibo ra —nëa tsi Jesu nëcaniquë Juan rabëti bo qui.

**24** Jatsi quiha Juán raani ca joni bá Jesu jisbërianiquë. Jisbëria jahuacaquë tsi quiha nohiria bo qui chanitsi Jesu niquë Juan yoati na.

—Jahuë ó ma pasoni jisxëna, naa xabachá ca Juan qui ma bocaquë no? ¿Shinapayo cato, naa yoshiní tëtohuahacahai ca huasi jascaria ca joni ó ma pasoni? **25** ¿Jahuë jisi ma bocani? ¿Copixëni ca raiti sahuëhaca joni jisti ó ma pasoni? Toca tsi ja iyamani quiha. Xobo-xoboriá tsi racacani quiha copixëni ca sahuëti jaya cabo. **26** Mato nicaquia. ¿Jahuë ó ma pasoni jisxëna, ja qui cahi na? ¿Dios Chani yoati ibo ó ma pasoni? Jabi Dios Chani yoanish cabo oquë ca ma jisníquë iquia, naa Juan ma jisquë no. **27** Jabi nëca tsi ii quiha Dios Quénëhacanish cabo ó cato Juan yoati na:

“Mia bëbo noho Chani bëhai ca raaxëquia.

Mia bëbo mi quinia rohahuaxëhi quiha” ii quiha Dios Chani

—nëa tsi nohiria bo qui Jesu nëcaniquë Juan yoati na.

<sup>28</sup>Jatsi quiha Jesu jari nëcaniquë Juan yoati na.

—Yama tsi xo Juan oquë ca conish cato ra. Jama, Juan oquë ca tsi xo Diós otohai cato ó ca iriama cato ra. <sup>29</sup>Jabi Juan chani nicahi quiha nohiria tëquë. Jasca, nicahi quiha impuestos bicanaibo ri. Jabi naa nohiria bo tsi xo toa Dios quinia jia ca banahuacanish cabo. Ja tsi xo toa ja ashimahacacanina. <sup>30</sup>Jama, Dios quinia jia ca fariseobo, yoba tiisimacanaibo, tihí cabá nianiquë pë. Jato qui yoi quiha. Ja ashimahacacasyamacani quiha —nëa tsi quiha Jesu nëcaniquë Juan yoati na.

<sup>31</sup>Jatsi Jesu nëcaniquë toa nohiria bo yoati na:

—¿Jahuë jasca ni naa jaboqui bësocanai ca nohiria ra? ¿Jahuë quiri ni naa nohiria pë? <sup>32</sup>Plazá ca iihai ca ranihuatinaxëni ca xocobo jascaria ca xo. “Bisto no ino” i pi huësti ca maxo no tsi “Pabëcasyama xo noa ra” ii quiha yosahai ca maxo huëtsa, cohuëcatsi na. Jama, “No nahuarino. No cohuëno” i pi jaca no tsi “Tsiricasqui noa” icani quiha pë. Jabi naa ranihuahacatimaxëni ca xocobo jascaria xo naa nohiria bo ri. <sup>33</sup>Jabi Juan joquë tsi jato qui yoi quiha jahuë jabi iniquë pë. Joxo tsi Juan samaniquë. Jénë ja ayamaniquë. Tocajano tsi “Yoshi jaya xo” iqui mato ja yoati na pë. <sup>34</sup>Jatsi è joniquë. Ea ti tsi xo oriquihaina. Ea ti tsi xo jénë acaina. Tocahëno tsi “Oriquití-naxëni, jénë-naxëni tsi xo toa. Jasca, jochacanaibo ya rabënahi quiha pë” iqui mato pë ëa yoati na. <sup>35</sup>Jabi mato qui yoi xo noho jabi è acaina. Jasca, mato qui yoi tsi xo Juan jabi ri. Jama, tiisiyoi-canaibo qui jia tsi xo noba jabi ra.

### **Jochahuaxëni ca yoxá Jesu tahë ashimanina**

<sup>36</sup>Huësti ca fariseobá quiha Jesu qui joi amaniquë ja bëta ja oriquino. Jatsi quiha jahuë xobo qui Jesu caniquë. Cahax ja tsahoniquë oriquixëna. <sup>37</sup>Jabi toa yacatá tsi racani quiha jochahuaxëni ipaonish ca yoxa ri. Fariseoba xobó tsi oriquihi Jesu ini nori ca ja nicani quiha. Nicahax toa tsi quiha ja caniquë jisi na. Botiá ca copixëni ca perojome ja bëniquë. <sup>38</sup>Jicohax Jesu tahë tsi ja mëniniquë. Toá tsi quiha ja aracona-niquë. Jatsi jahuë bëho yaxo tsi quiha jahuë tahë bo ashimatsijahuaniquë. Jatsi jahuë boó tsi jahuë tahë ja shinahuaniquë. Shinahuaxo tsi quiha ja tatsoniquë. Jaquiréquë jahuë tahë qui perojome ja japaniquë ra. <sup>39</sup>Jasca, yoxá ani ca fariseobá, naa Jesu qui joi amanish cató jisni quiha. Jisi

tsi ja shinaniquë, “Jochahuaxëni ca naa yoxa nori ca cahéyamahi quiha tonia. Dios Chani yoati ibo yoi pi irohaquí tsi motsahai ca yoxa ja cahéquë aquë ra. Jochahuaxëni ca yoxa tsi xo naa” i ja niquë jamë no. <sup>40</sup>Jatsi Jesú quëbiniquë:

—Jahuëcara mia yoacasquia ra, Simón —iquiina.

—Ihuë, Maestró —i Simón niquë.

<sup>41</sup>Jatsi quiha ja qui chani Jesú yoaniquë:

—Tobi quiha dos ca joni bo iniquë. Jato qui chamá parata prestahuahaniquë. Jariapari ca joni qui quinientos ca parata ja aniquë. Naa copixëni ca parata quiha. Jasca, joni huëtsa qui nama, naa cincuenta ca parata ja qui ja aniquë. Prestamo quiha. <sup>42</sup>Jatsi quiha jahari toa parata ibo qui ati mëtsama ja icani quiha, naa dos ca joni bo rë. Noitiria ca joni bo quiha. Jatsi jato noiquí tsi quiha jato cuenta bo chamá nianiquë ra. Shinajiaxëni ca chama ja ini quiha. Jabi jato cuenta bo chamá niaquë tsi quiha ejëni ca joni oquë tsi jahuë chama noini? ¿Cuenta chahitaxëni ca jayanish ca ni? ¿Cuenta pistia ca jayanish ca ni? Ea yoahuë —nëa tsi quiha Simón qui Jesu nëcaniquë.

<sup>43</sup>—Tonia oquë tsi noiniquë cuenta chahitaxëni ca jayanish cato ra —i Simón niquë.

—Oca xo ra —i Jesu niquë.

<sup>44</sup>Jatsi yoxa quiri bësohax Simón qui Jesu chaniniquë:

—Mi xobo qui ë jicoquë ra. Jënepaxa ë qui mi ayamaquë rë, tachocohati; jama, jahuë bëho yaxo tsi noho tahë ja chocohaquë ra. Jaquirëquë jahuë boó tsi noho tahë ja shinahuaquë. <sup>45</sup>E jicoquë tsi ëa mi joihuayamaquë rë, tatsohai cató no. Jama, naa yoxa tsayahuë. E jicoquë rohari tsi noho tahë huëstima tsi ja tatsoquë ra. <sup>46</sup>Noho boo qui xëni mi ayamaquë rë. Jama, noho tahë bo qui copixëni ca perojome ja japaquë ra. <sup>47</sup>Jaha tsi masahacaquë jahuë huëstima ca jocha iquia ra, ja noiriah ca quëshpi na. Jama, ichariama ca masaha ca jocha jaya ca tsi xo toa noiyamariahai cato ra —nëa tsi Simón qui Jesu nëcaniquë.

<sup>48</sup>Jatsi quiha,

—Masahacaquë mi jocha ra —i yoxa qui Jesu niquë.

<sup>49</sup>Jatsi chaninatsi mesa tsahonish cabio niquë:

—¿Tsohuëcara ni naa joni sa, naa jocha masahai cato? —iquiina.

<sup>50</sup>Jatsi quiha yoxa qui Jesu chaniniquë:

—Mi xabahamahacaquë ra, mi chitimihai cató no. Bëpasi tsi cata —iquiina.

### Galileá ca yaca bo qui Jesu shishonina

**8** <sup>1</sup>Jaquiréquë quiha yaca huëtsa, yaca huëtsa qui Jesu caniquë. Dios Chani yoahi ja caniquë Diós otohai ca yoati na. Jasca, ja bëta bocaniquë doce ca banahuacanaibo ri. <sup>2</sup>Bocaniquë ichariama ca yoxa bo ri, naa ja jénimahuani ca yoxa bo. Jasca, caniquë María Magdalena, naa siete ca yoshi jayanish cato. <sup>3</sup>Jasca, jato bëta caniquë Juana, Chuza ahuini, naa Herodes empleado. Bocaniquë Susana, yoxa huëtsa bo ri. Jabi Jesu, jahuë rabëti bo, tihi cabو naa yoxa bá orihuapaoni quiha jato parata yoí no.

### Bëro sayanish cato

*Mateo 13.1-9; Marcos 4.1-9*

<sup>4</sup>Toatiyá tsi Jesu qui huëstima ca nohiria bëcaniquë. Huëstima ca yaca bo ax ja bëcani quiha jahuë chani nicaxëna. Jatsi bëroria ca chani Jesu jato qui yoaniquë jato tiisimaxëna. Ja nëcaniquë:

<sup>5</sup>—Bëro sayahi quiha joni caniquë. Bëro sayajahuano tsi quiha huësti huësti ca bëro bahi tapaí xapaqueniquë. Jahá tsi ja jamahacani quiha. Jasca, jahá ca bëro isa bá piniquë. <sup>6</sup>Jasca, bëro huëtsa maxax mai qui xapaqueniquë. Jabi shinahacax ja chonini quiha jénë yama pi ja ini iqui na. <sup>7</sup>Jatsi bëro huëtsa masa xéréquë tsi xapaqueniquë. Bëro ya shinahabéquiniquë quiha toa masara pë. Jatsi banahaca ca mapahacani quiha. <sup>8</sup>Jatsi bëro huëtsa mai jiaxëni ca qui sayahacaniquë. Shinahaxo tsi huëstima ca bimi ja saihuaniquë. Tihiria ca bimi saini quiha —nëa tsi Jesu nëcaniquë nohiria bo qui.

Chanipama tsi,

—Ea nicati xo jatiroha cabo ra —i ja niquë.

<sup>9</sup>Jabi Jesú yoani ca chani jahuë rabëti bá cahéyamaniquë. Ja quëshpi tsi,  
—¿Jénihi ni naa noqui mi yoahana sa? —i ja qui jaca niquë.

<sup>10</sup>Jatsi quiha Jesú quëbiniquë:

—Mato qui tiisi acacaniquë, naa Diós otohai ca yoati na.

Jonë ca jahuë bo ma cahëxëti xo. Jama, naa jonë ca jahuë bo cahéyamaxëhi quiha tëxë bo. Ja tsi xo toa nëca ca chani jato qui chaniquia, nicaxo ja cahéyamacano iquish na.

### Jahuë chani Jesú bërohuanina jahuë rabëti bo bax na

*Mateo 13.18-23; Marcos 4.13-20*

<sup>11</sup>Jatsi quiha jahuë chani Jesú bërohuaniquë:

—Jabi Dios Chani tsi xo toa sayahaca ca bëro. <sup>12</sup>Toa bahi tapaí cabo tsi xo toa Dios Chani nicahai ca nohiria bo. Chani ja nicacano tsi johi quiha Satanás. Joxo tsi jato shina ó ca chani tsécahi quiha rë, ja chahahuayamacano xabahamahacaxëna. <sup>13</sup>Jabi maxax mai qui sayahaca ca bëro jascaria tsi xo nohiria huëtsa. Ranixo tsi Dios Chani biriacani quiha nicaxo na. Jama, jato shina ó tsi tapoyamahi quiha Dios Chani rë. Naamayamahi quiha ja chahahuacanaina rë. Dios Chani tahëhax pi tënëmahacaquí tsi Dios Chani niacani quiha pë. <sup>14</sup>Jabi masa xërëquë sayahaca ca bëro jascaria tsi xo nohiria huëtsa. Dios Chani nicacaquë jato ri. Jama, Dios quima jato ninihi quiha maí ca jahuë bo. Toa jahuë bo shina-shinacani quiha pë. Jatsi Dios Chani tsiihaqui quiha toa parata ó ja quëëcanaina. Jasca, tsiihaqui quiha toa jato ranihuahai ca jahuë bo pë. Ja quëshpi tsi jato shina ó ca tsi anitimaxëni tsi xo Dios Chani rë. <sup>15</sup>Jama, mai jiaxëni sayahaca ca bëro jascaria xo nohiria huëtsa. Dios Chani nicacanaibo tsi xo naa. Nicahax jato qui jia quiha jahuë Chani ra. Chahahuacani quiha ra. Chahahuaxo tsi anomaria tsi xo toa Dios bax ja acanaina.

### **Yoahacati xo Jesu chani**

*Marcos 4.21-25*

<sup>16</sup>¿Caca nama, oxati nama jahuë lamparina janahi ni ibo pa, tsamaxo na? Tocayamahi quiha. Béroria tsi janahi quiha, naquëtë ja huëano jicocanaibo bax na. <sup>17</sup>Jascaria tsi bërohuahacaxëti xo nohiria bo qui yoahama ca têquë. <sup>18</sup>Jatsi quiniacaxëcahuë. Jia tsi Dios Chani nicatsacana. Jia pi ma nicano tsi anixëhi quiha mato tiisi. Jama, ja bichi ca tiisi pistia bënoxëhi quiha nicacasyamacanaibo —nëa tsi quiha Jesu nëcaniquë jahuë chani bërohuahi na.

### **Jesu jahëhua, jahuë noma bo**

*Mateo 12.46-50; Marcos 3.31-35*

<sup>19</sup>Jabi jahuë jahëhua, jahuë noma bo, tihi cabos Jesu qui bëcaniquë. Jama, ja qui basimatimaxëni quiha ja icaniquë ja qui quëtsoni ca nohiria bo iqui na. <sup>20</sup>Jatsi quiha Jesu qui nohiria bo chaniniquë:

—Bëcaquë mi ihua, mi noma bo ra. Xobo cacha niicani quiha. Mia jiscascanni quiha —iquiina.

**21** Jatsi quiha Jesú quëbiniquë:

—Noho jahëhua yoi, noho noma yoi bo, tihi cabو tsi xo toa  
Dios Chani nicacanaibo. Tihi cabو tsi xo toa jahuë yoba acanaibo  
—iquiina.

### **Yoshini, choca, tihi cabو Jesú janacamanina**

*Mateo 8.23-27; Marcos 4.35-41*

**22** Toatiyá tsi quiha noti qui Jesu jiconiquë jahuë rabëti bo ya.  
Jicohax,

—¿Ia rabëquëx ca qui canomani? —i jato qui ja niquë.

Jatsi shitatsijacaniquë. **23** Shitajacano tsi quiha noti tsi oxa Jesu  
iniquë. Jatsi iané tsi cosporiatsi yoshi niquë. Jato noti rëamëtsi  
quiha jënë iniquë rë. Jëtëquëpaimaria jato noti ini quiha. **24** Jatsi  
Jesu bësomahi ja bocaniquë.

—Jisa Maestró. Jëtëquëpaima xo noa ra —i jaca niquë.

Jatsi quiha Jesu joiniquë. Joixo tsi quiha yoshini, choca, tihi  
cabو ja raahaniquë. Jatsi quiha janacaniquë yoshini. Pasiniquë ia ri.

**25** Jatsi Jesú jato nicaniquë:

—¿Yama ni ë qui ma chitimihaina ra? —iquiina.

Raquëhax,

—¿Tsohuë cara ni naa sa? Ja qui nicahi quiha yoshini, choca pa  
—i jaca niquë.

Jatsi ja ratëyocaniquë.

### **Yoshi jayanish ca jënimahuahacanina**

*Mateo 8.28-34; Marcos 5.1-20*

**26** Galilea mai jisbaya tsi quiha ia rabëquëx ca qui ja shitacaniquë  
Gadara icanai ca mai qui. **27** Rërëhax Jesu témahinaniquë. Toa xo  
tsi quiha yoshi jaya cató jato bëchaniquë. Tsoboco ja ini quiha.

Siri tsi sahuëti ja sahuëyamani quiha. Jasca, jahuë xobó tsi ja  
racayamani quiha, rësonish caba maí tsi ja chitécasni iqui na.

**28** Jatsi Jesu tsayahax ja sainiquë. Saihax ja bësojó tsi ja mëniniquë.  
Jatsi,

—Ea huënahuayamahuë Jesú, mana ca Dios Baqué. Ea  
ténëmayamahuë iquia —i Jesu qui joni niquë joi pistiamá no.

**29** Jabi néca tsi quiha ja chaniniquë, “Ja quima tsëquëcahuë” i  
yoshi bo qui Jesu ni nori quëshpi na. Jabi huëstima tsi quiha yoshi  
bá naa joni qui tsaminiquë rë. Jatsi jahuë yoshi iqui tsi quiha

nohiria bá jahuë mëquë bo, jahuë tahë bo, tihi cabو nëxapaoni quiha mëchichó no, ja paxayamano iquish na. Jama, mëchicho ja tésapaoni quiha. Jasca, xabaca, nihi, tihi cabو qui ja jabapaoni quiha yoshi iqui na. <sup>30</sup>Jatsi quiha,

—¿Jahuë ni mi janë ra? —i toa joni qui Jesu niquë.

—Seis Mil —i quiha joni niquë, huéstima ca yoshi ja qui jiconi nori iqui na.

<sup>31</sup>Jatsi yoshi bá Jesu bënarianiquë, tënëtiya qui jato ja raayamano.

<sup>32</sup>Jabi basima xo tsi quiha yahua jinaya cabá pihí iniquë. Yahua tirixëni quiha. Jatsi quiha,

—Japa toa yahua jinaya cabو qui noqui raatsana. Jato qui no jicono ra —iriatsi jaca niquë Jesu qui.

Jatsi,

—Bocata —i jato qui Jesu niquë.

<sup>33</sup>Jatsi quiha joni quima ax ja natsëquë-caniquë. Natsëquëhax yahua qui ja jicocaniquë. Jatsi quiha jabatsi yahua tirixëni niquë. Maca ax rënichihax ia qui ja jabayocaniquë. Ja nëachiyocaniquë. <sup>34</sup>Jatsi yahua obëso cabو jabaniquë yaca qui. Jënipijani ca ja yoabonacani quiha.

<sup>35</sup>Jatsi nohiria bocaniquë ocapijani ca jisi na. Jesu qui ja bëcaniquë.

Toá tsi quiha yoshi jayanish ca joni ja jiscaniquë. Jesu tapaí tsaho ja ini quiha. Sahuëti sahuë ja ini quiha. Jénima ja ini quiha. Jatsi ja raquëyocaniquë tsayahax na. <sup>36</sup>Jatsi yoyoxëni ca joni jénimahuahacani nori ca quinia jisnish cabá yoaniquë bëcanish cabو qui. <sup>37</sup>Jatsi pë Jesu bënatsi quiha Gadara maí ca nohiria tēquëtå huaniquë jato ja jisbayano. Ja raquëyocan quiha. Jatsi noti qui ja jicohaca tsi quiha Jesu caniquë.

<sup>38</sup>Jabi yoshi jayanish ca joni Jesu ya cacasníquë jaa ri,

—Mi bëta cacasquia —iquina.

Jama, jahari jahuë xobo qui Jesú raaniquë.

<sup>39</sup>—Mi xobo qui cata. Mi bax Diós aca ca yoata —i ja qui Jesu niquë.

Jisbaya tsi quiha toa yacata xo tsi ja bax Jesú ani ca ja yoabonaniquë ra.

### Jairo jahini, jimihacai ca yoxa, tihi cabو jénimahuahacanina

*Mateo 9.18-26; Marcos 5.21-43*

<sup>40</sup>Ia rabëquëx ca ax Jesu bacaqué tsi quiha rani tsi nohiria bá joihuaniquë, ja manacanai ca quëshpi na. <sup>41</sup>Jatsi quiha catiti xobo chama joniquë, naa Jairo icanai cato. Jesu tahë tsi ja mënihaca tsi,

—Noho xobo qui johuë ra —iriatsi ja qui ja niquë.

**42** Jabi rësopaimaria quiha jahuë jahi iniquë rë. Doce ca año bo jayani quiha. Jatsi ja bëta Jesu caniquë. Ja cano tsi quiha ja qui nohiria quëtsojahuacaniquë. Huéstima ca nohiria quiha.

**43** Jabi nohiria xërëquë tsi quiha jimihacai ca yoxa iniquë. Doce ca año no tsi ini quiha ja jimihanina rë. Jasca, jahuë parata tēquë doctor bo qui ja mëani quiha jénimahuahacaxëna. Jénimahuahacatimaxëni ja ini quiha. **44** Jabi Jesu cho quiha naa yoxa basimaniquë. Basimaxo tsi quiha jahuë sahuëti quëpë ja motsaniquë. Jatsi jénétapiniquë ja jimihacaina ra.

**45** Jatsi quiha,

—¿Tsohuë ëa motsaha? —i Jesu niquë.

—Yama tsi xo toa mia motsahaina ra —i quiha nohiria bo niquë.

Jatsi pasi quiha nohiria bo iniquë. Jatsi,

—Tsayahuë. Mi qui quëtsocani quiha nohiria bo ra, Maestró. Mia tijihacani quiha. ¿Jénahuariahax “¿Tsohuë ëa motsaha?” i mi na ra? —i Jesu qui Pedro niquë.

**46** Jatsi Jesú quëbiniquë:

—Ea motsayaquë nohiria iquia. E quima ax noho chama tséquëquë ra —iquina.

**47** Jatsi mëmériatsi quiha yoxa niquë.

—Cahëhi quiha rë —i jamë ja niquë.

Jatsi Jesu qui johax tsi quiha ja bësojó yoxa mëniniquë. Mënixo tsi nohiria bo bësojo xo tsi ja ani ca ja yoaniquë.

—Mia ë motsaquë jénimahuahacaxëna ra. E jénimahuahacatapiquë ra —i Jesu qui yoxa niquë.

**48** Jatsi,

—Mi jénimahuahacaquë caí, mi chitimiha ca quëshpi na. Bëpasi cata —i ja qui Jesu niquë.

**49** Chanijano tsi quiha chama Jairo xobo ax chani bëhai ca caheníquë. Cahëhax,

—Rësoquë mi jahi pistia rë. Maestro jari huënahuayamahuë —i Jairo qui ja niquë.

**50** Jama, nicahax Jesu chaniniquë:

—Raquéyamatsina. E qui mi chitimiti xo. Jénimaxëhi quiha mi jahini ra —iquina.

**51** Jatsi xobo qui ja caheníquë. Cahëhax,

—Nohiria ë bëta jicoyamano —i ja niquë.

Jatsi quiha Pedro, Juan, Jacobo, jahini jahëpa, jahuë jahëhua, tihí cabó roha Jesu ya jiconiquë. <sup>52</sup>Jahi tahëhax tsi araconahi nohiria tēquë ini quiha. Jatsi,

<sup>53</sup>—Arayamacana. Bëso xo ra. Oxa roha —i jato qui Jesu niquë.

Jatsi quiha nohiria bá osaniquë, ja rësoni nori ja cahëcani quëshpi na. <sup>54</sup>Jatsi xotaco mëquë Jesú biniquë. Bichi tsi,

—Bësuhuë, caí —i ja qui ja niquë.

<sup>55</sup>Jatsi ja bësotëquëniquë. Ja niitapiniquë. Jatsi quiha,

—Pimahuë —i jahuë nabo qui ja niquë.

<sup>56</sup>Ratëniquë jahuë nabo, rani-ranihi na. Jatsi,

—Jënipijaha ca yoayamacana —i jahuë nabo qui Jesu niquë.

### **Jahuë doce ca rabëti bo Jesú raanina**

*Mateo 10.5-15; Marcos 6.7-13*

**9** <sup>1</sup>Jesú jahuë doce ca rabëti bo quënaniquë ja caticano.

Quënaxo tsi quiha chama jato qui ja aniquë yoshi bo tsëcati, noitiria cabó jënimahuati. <sup>2</sup>Jatsi quiha jato ja raaniquë Diós otohai ca chani ja yoacano, isicanaibo, iquicanaibo, tihí cabó ja jënimahuacano. <sup>3</sup>Yobapama tsi Jesu nëcaniquë:

—Mëquëya bocana. Coti jihui, sota, oriquiti, parata, tihí cabó boyamacana. Rabë ca sahuëti boyamacana; huësti ca roha.

<sup>4</sup>Tsohuëcaracá xobo qui jicohax toá tsi chitécana. Chitéquí tsi xobo rarinyamacana. <sup>5</sup>Jasca nohiria bá pi mato joihuayamano tsi toa yaca jisbayacana. Jisbaya tsi mato tahé ca cospo totohacahuë jato jocha jismaxëna. Toca tsi jato qui Dios caxa ma jismati xo —i quiha jato qui Jesu niquë.

<sup>6</sup>Jatsi quiha ja bocaniquë. Yaca bo ja nacocani quiha, Dios Chani yoahi na. Jasca, jatiroha ca iti xo tsi quiha noitiria cabó ja jënimahuacaniquë.

### **Juan yamabo yoati Herodés nicanina**

*Mateo 14.1-12; Marcos 6.14-29*

<sup>7</sup>Jatsi quiha chama Herodés nicaniquë jatiroha ca Jesú ani ca yoati na. Nicahax ja shina-risiquiniquë. Shinati pi ja cahëyamani quiha “Bëso xo Juan yamabo ra” i nohiria bo ni quëshpi na.

<sup>8</sup>Jasca,

—Elías yamabo tsi xo naa jisiquihaina tonia —i huëtsa bo niquë.

—Bësotëquëquë Dios Chani yoanish ca huësti cato —i quiha huëtsa bo niquë.

<sup>9</sup>Jatsi Herodes nēcaniquë:

—Juan mapo ë quëésayamëquë ra. ¿Tsohuëcara ni naa joni sa? Anomaria tsi xo toa nohiria bo chanihai ca ja yoati na —iquina. Nohiria bo iqui tsi Herodés Jesu jiscasni quiha.

### Cinco mil ca joni bo Jesú pimanina

*Mateo 14.13-21; Marcos 6.30-44; Juan 6.1-14*

<sup>10</sup>Jatsi quiha Jesu rabëti bo bacaniquë. Bacaxo tsi quiha ja acani ca tēquë Jesu ja yoacaniquë. Jaquirëquë jahuë rabëti bo Jesú boniquë Betsaida yaca quiri. Jato bëta ja icasni quiha jamëpistiá no. <sup>11</sup>Jabi ja bocaquë tsi quiha nohiria bá nicaniquë. Nicaxo tsi quiha ja banahuacaniquë jato ri. Jatsi nohiria Jesú joihuaniquë. Joihuaxo tsi quiha Diós otohai ca yoati jato ja yoaniquë. Jasca, noitiria cabo ja jénimahuaniquë.

<sup>12</sup>Jaquirëquë yata tsi quiha ja qui jahuë rabëti bo bëcaniquë. Caquë quiha bari. Béhax tsi jahuë rabëti bo ja qui chaniniquë:

—Basima ca yaca bo, huai bo, tihí cabó qui nohiria raatsana. Oxati bo, piti, tihí cabó ja bicano ra. Yama tsi xo nëá ca racati ra —i Jesu qui jaca ni quiha.

<sup>13</sup>Jatsi quiha,

—Jato pimacana —i jato qui Jesu niquë pa.

Jatsi,

—Yama tsi xo nëá ca piti ra. Cinco ca mapari, dos ca sanino, jaroha tsi xo rë. ¿Naa nohiria tēquë bax mapari copihi caxëhi ni noa pa? —i ja qui jaca niquë.

<sup>14</sup>Jabi toá tsi quiha cinco mil ca joni bo mani ini quiha.

Huéstima quiha. Jatsi,

—Maxo cincuenta, maxo cincuenta, nëca tsi nohiria tsahomatsacana —i jahuë rabëti bo qui Jesu niquë.

<sup>15</sup>Jatsi toca tsi ja acaniquë. Nohiria tēquë ja tsahomacaniquë.

<sup>16</sup>Jaquirëquë cinco ca mapari, dos ca sanino, tihí cabó Jesú biniquë. Bixo tsi quiha mana nai qui tsayahax tsi “Gracias” Dios qui i ja niquë piti quëshpi na. Jatsi mapari ja têxenamaniquë. Têxenamaxo tsi jahuë rabëti bo qui ja aniquë nohiria bo qui ja taacano. <sup>17</sup>Piniquë nohiria tēquëta. Ja sëyayocaniquë. Jaquirëquë mapari quësi bo, sanino, naa pihama ca quësi bo ja catiacaniquë ra. Doce ca caca ja rëacani quiha.

### —Xabahamati Ibo xo Mia —i Pedro nina

*Mateo 16.13-19; Marcos 8.27-29*

<sup>18</sup>Xaba huëtsá tsi Jesu bëhoxno tsi quiha ja bëta jahuë rabëti bo iniquë. Jatsi jato ja nicaniquë:

—¿Tsohuë ni ëa? ¿Jënihi ni nohiria bo ëa yoati na? —i jato qui Jesu niquë.

**19** Jatsi jahuë rabëti bá quëbiniquë:

—“Ashimanish ca Juan yamabo pérë xo mia” ii quiha huëstima cabو. “Elías yamabo” ii quiha huëtsa bo. Jasca, “Dios Chani yoanish cabó ca huësti cato, naa résonish cabó quima ax téronoyamëtax cato” ii quiha tèxë bo —nëa tsi Jesu qui ja nëcacaniquë.

**20** Jatsi jato ja nicaniquë:

—¿Japa mato tsa ni? ¿Tsohuë ë nori ca icanai? —i Jesu niquë.

Jatsi quiha,

—Dios raahacanish ca Xabahamati Ibo xo mia ra —i Pedro niquë.

### Ja rësöhái yoati tsi Jesu chaninina

*Mateo 16.20-28; Marcos 8.31-9.1*

**21** Jatsi jahuë rabëti bo Jesú yobaniquë, tsohuë ja iqui ca ja yoayamacano iquish na. **22** Yobapama tsi ja nëcaniquë:

—Ténë-ténëxëquia naa Nohiria Baqué ë nori cato ra. Jasca, ëa niacaxëcani quiha yosibo, arati ibo-iboria bo, Dios yoba tiisimacanaibo rë. Tihi cabá ëa namëcaxëcani quiha. Jama, tres bari huinocaquë tsi bësotëquëxëquia ra —i jahuë rabëti bo qui ja niquë.

**23** Jaquirëquë Jesu nëcaniquë:

—Ea pi banahuacasquí tsi ma acatsai ca ma shinayamaxëti xo. Jatiroha ca barí tsi mato cruz ma iano ra. Iaxo ëa ma banahuano.

**24** Jabi xabahamahacayamaxëhi quiha toa jahuë nomá jabi ó quëemisxëni cato. Jama, xabahamahacaxëhi quiha jahuë nomá jabi chihohuahai cato ëa tahëxo na. **25** Jatsi jatiroha ca maí ca jahuë bo joní bëbomitsa, ricoria ca iquiina. Jama ténëtiya qui pi caquí tsi ejahuëcara ca ja bëbona? **26** Jasca pi ëa, noho chani, tihi cabó qui jaboqui nohiria bérabino tsi jato qui bérabixëquia ëa ri, xaba huëtsa ë joxëquë no. Toa barí tsi Rey jascaria tsi, naa noho ángel bo ya tsi joxëquia ra, noho jahëpa chamá no. **27** Mato parayamaquia, “Diós otohai ca oquë jisxëqui mato ichariama cabó” iquia. Rësonox pari tsi ja otohai ca oquë jiscaxëcani quiha —nëa tsi quiha Jesu nëcaniquë.

### Jahuë oquë Jesú jismanina

*Mateo 17.1-8; Marcos 9.2-8*

**28** Nëca tsi chanixo tsi Pedro, Jacobo, Juan, tihi cabó maca qui Jesu boniquë oquëri ca semaná no. Jaha tsi Dios qui ja

bëhoxcasni quiha. <sup>29</sup>Dios qui bëhoxjano tsi quiha jahuë bëmana jaria jabitiniquë. Jasca, joxonaria-niquë jahuë sahuëti. <sup>30</sup>Jatsi jisiquitapiniquë rabë ca joni bo. Ja bëta chanihi ja icani quiha. Moisés yamabo, Elías yamabo, tihi cabو jisiquini quiha. <sup>31</sup>Jabi mana ca oquë ca ja jayacani quiha jato ri. Anomaria jato jaria ini quiha. Jabi chaninahi ja icaniquë, naa Jerusalén tsi Jesu nahai ca yoati na. <sup>32</sup>Jabi coshi ini quiha Pedro, Jacobo, Juan, tihi caba bëro. Jatsi ja bësocaniquë. Bësoxo tsi quiha Jesu, ja bëta rabë ca niihai ca joni bo, tihi cabو ja jiscaniquë. <sup>33</sup>Jatsi nai qui Moisés yamabo, Elías yamabo, tihi cabá jisbayano tsi Pedro chaniniquë:

—Noqui jia tsi xo nëá no iquiina. Tres ca tapas no ano ra. Huësti mí-na, huësti Moisés yamabá-na, huësti Elías yamabá-na —i ja ni quiha.

Jabi toca tsi Pedro chaniniquë, ratëhi na. <sup>34</sup>Jari chanijano tsi quiha tsëmo joniquë. Joxo tsi jato ja mapaniquë. Jatsi tsëmo qui Moisés yamabo, Elías yamabo, tihi cabو jicoquë tsi quiha ja raquëcaniquë. <sup>35</sup>Jatsi tsëmó ca joi ja nicacaniquë:

—Noho Baqué tsi xo naa. E bini ca tsi xo naa noho yonoco ati. Ja qui nicatsacana —i joi niquë.

<sup>36</sup>Jatsi joi pasiquë tsi quiha toá tsi Jesu iniquë. Jamëpistia quiha. Toatiyá tsi ja jiscani ca jahuë bo jahuë rabëti bá yoayamani quiha. Ja bëpacani quiha jënipijani ca yoati na.

### **Yoshi jayanish ca baqué Jesú jénimahuanina**

*Mateo 17.14-21; Marcos 9.14-29*

<sup>37</sup>Maca quima ax botëxo tsi quiha nohiria huëstima ca ja bëchacaniquë huëaquë no. <sup>38</sup>Jatsi nohiria xërëquë ó ca joni Jesu quënaniquë:

—Anoma tsi xo noho baqué ra, Maestró. Noho baqué yoi ra. Tsayapa. <sup>39</sup>Noho baqué qui yoshini tsamihaca tsi sai-saihitapihi quiha noho baqué rë. Jatsi noho baqué caxo amahi quiha. Jatsi bacoxhi quiha rë. Natohuahi quiha. Natohuaxo tsi jisbayahi quiha ra. <sup>40</sup>Jasca, “Noho baqué ó ca yoshi tsëcacahuë” i mi rabëti bo qui ë quë. Tsëcatimaxëni ca xo rë —nëa tsi Jesu qui joni nëcaniquë.

<sup>41</sup>Jatsi Jesú quëbiniquë:

—Chitimitimaxëni ca yosaxëni ca nohiria xo mato pë. ¿Jahuë tihi tsi mato tënëxëhi ni ëa pë? Mi baqué néri bëhuë —nëa tsi Jesu nëcaniquë.

**42**Jatsi baquë basimano tsi yoshiní mai qui baquë nianiquë. Caxo ja amahacani quiha. Jatsi yoshi Jesú raahaniquë. Raahaxo tsi quiha ja jénimahuaniquë. Jaquiréquë jahuë jahëpa qui jahari ja aniquë. **43**Jatsi Dios chama-chamaria qui nohiria téquë ratéyoniquë tsayahax na.

### **Ja rësoxéhai yoati tsi Jesu chaninina**

*Mateo 17.22-23; Marcos 9.30-32*

Jari Jesú ani ca yoati tsi nohiria chaninano tsi quiha jahuë rabëti bo qui Jesu chaniniquë:

**44**—Jia tsi ëa nicacana, ma shina-bënøyamano iquish na. Nohiria caxaxéniria cabo qui ë mëahacaxëti xo —i ja niquë.

**45**Jama, Jesú yoani nori ca ja cahëyamacani quiha. Jato joma quiha. Jari jato qui jonë ini quiha ja yoanina. Jama, Jesu ja nicayama-caniquë ja yoaha ca ja bërohuano, raquéqui na.

### **¿Tsohuë ni oquë cato?**

*Mateo 18.1-5; Marcos 9.33-37*

**46**Jatsi chaninatsi Jesu rabëti bo niquë, tsohuë jato oquë ca ixëti iqui ca yoati na. **47**Jabi ja chaninacanai nori ca Jesú cahëni quiha. Cahëxo tsi quiha baquë pistia ja biniquë. Bixo tsi ja tapaí ja nimaniquë. **48**Nimahax,

—Ea joihuahi quiha tsohuëcara ca noho janë tsi naa baquë pistia joihuahai cato. Jasca, ëa raanish ca ri joihuahi quiha ëa joihuahai cato. Nicaparicana. Oquë-oquëriaxëhi quiha mato xérëquë ó ca iriama cato ra, naa baquë pistia jasca cato —nëa tsi jato qui Jesu nëcaniquë.

### **Jesu rabëti yoi bo**

*Marcos 9.38-40*

**49**Jatsi Juan chaniniquë:

—Jisa, Maestró. Mi janë tsi yoshi tsécahai ca joni no tsayahitaquë ra. Tsayaxo toa joni no jénëmacas-hitaquë noba maxo quirim ja iqui iqui na —i Jesu qui Juan niquë.

**50**Jatsi Jesú quëbiniquë:

—Jénëmayamacana. Noba rabëti tsi xo toa noqui pasomahama cato ra —iquiina.

### **Jacobo, Juan, tihi cabo Jesú raahanina**

**51**Jabi basima quiha nai qui Jesu tërohacati xaba iniquë. Toatiyá tsi raquéhaxma tsi Jerusalén qui ja cacasni quiha. **52**Jatsi rëquë tsi

joni bo ja raaniquë jahuë quinia ja rohahuacano. Jatsi, Samariá ca yaca qui ja jicocaniquë, chitëti iti Jesu bax méraxëna. <sup>53</sup>Jama, jato yaca qui Jesu cahëquë tsi quiha samariabá jato chitëmacasyamani quiha, Jerusalén qui ja bocanai ca ja jiscani quëshpi na. <sup>54</sup>Jatsi samariabo qui Jacobo, Juan, tihi cabو caxaniquë. Caxahax,  
—¿Naipá ca chihi baaxëhi ni noa, Ibobá, jato mëshati, naa Elías yamabá ani jascaria? —i Jesu qui jaca niquë.

<sup>55</sup>Jatsi Juan, Jacobo, tihi cabو quiri bësoxo tsi quiha Jesú jato raahaniquë. <sup>56</sup>Jatsi yaca huëtsa qui ja bocaniquë chitëxëna.

### Mahitsa ca banahuacanaibo

*Mateo 8.19-22*

<sup>57</sup>Bahí tsi bohocanajacano tsi,  
—Jahuëniacara qui mi caxëhai ca mia banahuaxëquia —i huësti ca joni Jesu qui niquë.

<sup>58</sup>Jatsi Jesú quëbiniquë:  
—Jato quini bo jaya xo tsaca bo. Jasca, naha jaya xo isa bo. Jama, ëa, naa mana ax johax ca tsi xo toa racati xobo yama cato —iquina.

<sup>59</sup>Jatsi joni huëtsa qui Jesu chaniniquë:  
—Ea banahuahuë —iquina.

Jama,  
—Mi bëta cacasquia ra. Jama, jaboqui canoma xo ëa ra.  
Rësopaimaria xo noho jahëpa. E maihuaparixëti xo —i joni niquë.

<sup>60</sup>Jatsi Jesú quëbiniquë:  
—Jato nabo Dios chahahuayamacanaibá maihuano. Mi yonoco tsi xo toa Dios Chani yoahi cati, naa Diós otohai ca yoati na —iquina.

<sup>61</sup>Jatsi,  
—Mi bëta caxëquia, Taitá. Huënayamaxëhuë. Jahari noho xobó cabو qui ë caapariti xo jato joihuaxëna —i joni huëtsa niquë.

<sup>62</sup>Jama, ja qui Jesu chaniniquë:  
—Noho yonoco pi chitahëhuaquí tsi jahari mi jahuë bo qui mi bacayamano. Ibo Dios bax yonocoyoiti mëtsama xo toa jahari bacacatsai cato ra —iquina.

### Setenta ca joni bo Jesú raanina

**10** <sup>1</sup>Jaquirëquë setenta ca joni bo Ibo Jesú biniquë. Bixo tsi quiha rëquë tsi dos, dos, dos tsi jato ja raaniquë ja shishocatsai ca yaca tëquë qui.

**2Raapama tsi ja nēcaniquë:**

—Huéstima tsi xo toa tésahacati cato ra, ichariama yonococanaibo nori. Ja quëshpi tsi Ibo Dios nicacana, yonati bo ja raano ja bax yonocoti. **3Jatsi**, bocata. Mato raaquia. Cama xërëquë ó ca oveja xocobo jascaria ixéqui mato. **4Jatsi** parata, sahuëti, zapato bo, tihi cabó boyamacana. Jasca, bahí tsi bamayamacana, nohiria joihuaxëna. **5Jasca**, xobo qui jiconox pari tsi “Dios mato shomahuano” icana ibo qui. **6Jabi** toá pi rabënacatsai ca joni racano tsi toá tsi chitëxéhi quiha ma shomahuahaina. Jama, xobo ibo pi rabënacasyamano tsi ma joihuahai ca jahari bicana. **7Jasca**, xobo qui jicohax xobo rarínayamacana. Huësti ca ití tsi chitécana. Toa xo tsi ma taahacahai ca jahuë bo picana. Jabi jahuë yonoco quëshpi tsi orihuahacaxëti xo yonati. **8Jabi** yacatá ca nohiria bá mato joihuano tsi mato qui ja taacanai ca jahuë bo picana ra. **9Jasca**, toá ca iquicanaibo jénimahuacana. Jénimahuahax, “Mato basima tsi xo Diós otohaina” icana jato qui.

**10Jama**, yacatá ca nohiria bá pi mato joihuayamano tsi jato calle bo qui bocata. **11Toá tsi** “Mato yacatá ca cospo jaya xo noba tahë bo pë. Bicasýama xo noa. Bita” i jato qui cana. Jasca, “Mato parayamaqui noa. Jaboqui mato qui basimaria Diós otohai ca joquë ra” i jato qui cana. **12Parayamaquia**. Copiti barí tsi anomariaxëhi quiha naa yacatá ca nohiria copi ra; naa jochahuaxëni ca Sodoma yaca oquë ja iti quiha.

### Nicamisxëni ca yaca bo

Mateo 11.20-24

**13**“Noitiriaxëhi quiha mato Corazín cabá. Noitiriaxëhi quiha mato ri, Betsaidá cabá. Mato yaca bo xo tsi huéstima ca jisti bo acacani quiha; mahitsa rë. Jabi jochahuaxëni ca Tiro y Sidón yaca bo xo tsi jasca ca jisti bo acacarohapino tsi naama tsi jato jocha quima Dios quirí ja bësoquë acaniquë ra. Bamaxoma tsi moro ja sahuëquë acaniquë cohuëquí na. Jasca, chihi mishpó tsi ja tsahoquë acaniquë, jato cohuë jismaxëna. **14Nicaparicana**. Copiti barí tsi anomariaxëhi quiha mato copi ra; Tiro y Sidón yacatá ca jochahuaxëni ca nohiria oquë ja iti quiha. **15**¿Japa mato Capernaum yacatá cabá? ¿Nai qui bocascanai pa? Maj. Tënëtiya qui botëxëqui mato iquia —nëa tsi Jesu nëcaniquë jochahuaxëni ca yaca bo yoati na.

**16** Jatsi Jesú jahuë rabëti bo yobaniquë:

—Ea nicayoohlí quiha mato chani nicacanaibo. Jasca, éa niahí quiha mato chani nicacasyamacanaibo. Jasca, éa raanish ca niahí quiha éa bicasyamacanaibo —i ja niquë.

### Setenta cabó bacanina

**17** Jatsi rani tsi setenta ca raahacanish cabó bacaniquë.

—Noqui nicahi quiha yoshi bo pa, Ibóbá, naa mi jané tsi jato qui no chaniquë no —i jaca niquë.

**18** Jatsi Jesu jato qui chaniniquë:

—Dios Chani ma yoaquë tsi Satanás jahuë chama bënöhái ca ée jisitaquë ra. Ja bëbohacahitaquë ra. **19** Jabi chama mato qui aquia noqui pasomaha cato chama bëboxëna. Rono, nibo, tihi cabó xérëquë tsi coti métsaxëqui mato. Mato ayamacaxëcani quiha ra. **20** Jasca, yoshi ma natsécahai ca iqui tsi ranixëqui mato. Jama, oquë tsi ma ranixëti xo, naipá ca libro ó tsi mato janë bo quénëhacani iqui na —nëa tsi Jesu nëcaniquë jahuë bëcanish ca rabëti bo qui.

### Jesu raninina

Mateo 11.25-27; 13.16-17

**21** Espíritu Santó tsi Jesu rani-ranitapiniquë. Ranihax ja chaniniquë:

—Oquë-oquëria ca xo mia ra, Jahépá. Mia tsi xo naipa, mai, tihi cabó yonati Ibo-iboria. Mi qui “Gracias” iquia, tiisi jayamacabo qui mi Chani jia ca mi jisiquimahai quëshpi na. Jia tsi xo ra. Jasca, maí ca tiisi jaya cabó quima mi tiisi-tiisiria jonëmahacaquë ra, ja cahëyamacano iquish na. Jabi toca tsi mi acai ca quëshpi tsi “Gracias” mi qui iquia, Jahépá. **22** Jasca, nicaparicana, joni bá. Chama é qui noho Jahépá aniquë, jahuë bo tëquë yonati. Jabi yama tsi xo toa éa, naa Dios Baquë-baquëria cahëyoihaina. Noho Jahépa roha tsi xo toa éa cahëyoihai cato. Jasca, yama tsi xo Jahépa Dios cahëxëni cato. Jahépa Dios cahëxëni ca roha ca éa xo naa, naa jahuë baquë yoi. Jasca, Jahépa Dios cahëcani quiha chahahuacanaibo ri, naa é quénani cabó. Jato qui noho jahépa jisiquimaquia ja cahëcano iquish na —nëa tsi jahuë rabëti bo qui Jesu nëcaniquë.

**23** Jatsi jahuë rabëti bo quiri Jesu bësoniquë. Bësohax jato qui ja chaniniquë:

—Shoma xo mato ra. Jia tsi xo ma jisina. <sup>24</sup>Jabi è acai ca jahuë bo huéstima cabá jiscasníquë, naa Dios Chani yoanish cabo, rësonish ca chama bo ri. Ja jisyamacani quiha rë. Jasca, è yoahai ca jahuë bo ja nicacas-caniquë, jaboqui ma nicahai jascaria. Jama, nicati mëtsama ja icani quiha —i Jesu niquë.

### **Jabi jiaxëni ca jayanish ca samariabo**

<sup>25</sup>Jatsi jodioba yoba bo cahëxëni ca joni Jesu qui joniquë tanamacatsi na. Johax,

—¿Jénahuaxëhi ni ëa, Maestró, bëso-bësopaoxëna? —i ja niquë.

<sup>26</sup>Jatsi Jesú quëbiniquë:

—¿Jénihi ni Moisés quënénina? ¿Jahuë ja quënëni? —iquiina.

<sup>27</sup>Jatsi yoba cahëxëni cató quëbiniquë:

—“Mato joiti, mato shinana, mato coshi, tihi cabá tsi Dios ma noixëti xo. Jasca, mato rabëti bo ma noixëti xo, mamë ma noiham jascaria” ii quiha —i joni niquë Jesu qui.

<sup>28</sup>Jatsi,

—Jabija tsi xo toa mi yoahana. Tocapihi tsi bësoxëqui mia ra —i ja qui Jesu niquë.

<sup>29</sup>Jama, tocacasyamani quiha yoba cahëxëni cato rë. Jatsi parahax,

—¿Tsohuë ni toa noho rabëti cato sa? —i joni niquë Jesu qui.

<sup>30</sup>Jatsi naa chani Jesú yoaniquë ja cahëno iquish na.

—Jabi joni Jerusalén jisbayaniquë. Jericó yaca qui cahi ja ini quiha. Bahí tsi ja co-cono tsi yomacanaibo ja qui tsaminiquë rë. Jahuë sahuëti, jahuë parata, tihi cabø ja yoma-cani quiha. Ja sétiajahuacani quiha. Sétiaxo tsi quiha bahí tsi ja jisbériacaniquë rësoti. <sup>31</sup>Toatiyá tsi quiha toa bahí tsi co-cohi arati ibo iniquë. Noitiria ca joni ja jisniquë ra. Jisi tsi tétiaquiria tsi bahi qui ja riiniquë.

<sup>32</sup>‘Jaquirëquë joni huëtsa joniquë. Levita ja ini quiha, naa Dios xobó tsi yonocohai cato. Joni tsayaxo ja tétianiquë jaa ri, mëbicasyamaquí na.

<sup>33</sup>‘Jaquirëquë joniquë samariabo, naa jodiobo qui yoixëni ca nohiria. Co-copama tsi noitiria ca joni ja jisniquë jaa ri. Jisi tsi, “Noitiria tsi xo naa joni ra” i ja ni quiha. <sup>34</sup>Ja qui caxo tsi quiha jahuë quëesi bo ja chëxaniquë. Chëxaxo tsi ja yaboniquë. Jatsi jahuë burro qui noitiria ca joni ja jananiquë. Janaxo tsi quiha jahuë oxati xobo qui ja boniquë. Jaha

xo tsi joni ja shomahuaniquë ra. <sup>35</sup>Jatsi huëaquë tsi quiha dos ca parata copixëni cabo xobo ibo qui samariabá aniquë. “Naa noitiria ca joni ó bësona” i ibo qui ja ni quiha. “Naa parata mi narisno tsi mia copixëquia jahari ë joquë no” i ja ni quiha —nëa tsi Jesu nëcaniquë toa chani yoahi na. <sup>36</sup>Chani yoahax,

—¿Jahuë shinahai, naa tres ca joni yoati na? ¿Jëni ca ni toa sëtiahacanish ca joni qui rabëti jascaria cato? —i yoba cahëxëni ca qui Jesu niquë.

<sup>37</sup>Jatsi joní quëbiniquë:

—Shomahuanish ca samariabo quiha —iquiina.

—Cata. Ja ani jasca ca mi ano mia ri ra —i Jesu ja qui niquë.

### Marta, María, tihi cabo qui Jesu shishonina

<sup>38</sup>Jahuë rabëti bo ya capama tsi yaca qui Jesu cahëniquë. Jahá tsi quiha racaniquë yoxa, naa Marta icanai cato. Jabi Jesu qui joi ja amani quiha jahuë xobó tsi ja chitëno. <sup>39</sup>Jabi noma Martá jayani quiha, naa María icanai cato, naa Jesú tiisimahai ca nicacatsai cato. Jesu tahë tsi quiha ja tsahoniquë nicaxëna. <sup>40</sup>Jama, nicatimaxëni Marta ini quiha shishocanaibo ja taahai ca iqui na. Jahuë yonoco shina-shinahi ja ini quiha. Jatsi Jesu qui Marta caniquë. Cahax,

—Ea shinahuë, Ibobá. Noho nomá éa jisbayaquë pë. Emë pistia xo taahai ca éa xo naa rë. “Mi rëquëmë mëbihuë” ina ja qui —nëa tsi Marta nëcaniquë jahuë noma yoati na.

<sup>41</sup>Jatsi Jesú quëbiniquë:

—Huëstima ca jahuë bo yoati tsi shina-huëjënahi quiha mia rë. Jënimá tsi xo mi acaina. <sup>42</sup>Jama, huësti ca jahuë narisqui mia axëna. Oquë tsi xo Mariá acaina, noho chani nicacastsi na. Mëbihacatimaxëni tsi xo toa ja nicahana —i ja qui Jesu niquë.

### Jahuë rabëti bo Jesú tiisimanina bëhoxti ja cahëcano

Mateo 6.9-15; 7.7-11

**11** <sup>1</sup>Jabi Dios qui bëhoxhi Jesu iniquë. Ja jatiquë tsi quiha, —Bëhoxti noqui ri tiisimana, Ibobá, naa Juan yamabá jahuë rabëti bo tiisimani jascaria —i jahuë rabëti bo ó ca huësti ca niquë.

<sup>2</sup>Jatsi jato Jesú yoani tsi xo naa:

—Bëhoxhi tsi nëcacana:

“Oquë xo mi janë ra, Jahëpá.

Nohiria mi ototsano ra” icana.



*Jesu chani Mariá nicacasnina San Lucas 10.42*

**3 Jasca,**

“Jatiroha ca barí tsi piti noqui ana” icana.

**4 Jasca,**

“Noba jocha mëbina, naa noqui yosicanaibo tëquë no noiha ca quëshpi na.

  Jochati no tanamahacayamano” icana  
—nëa tsi jahuë rabëti bo qui Jesu nëcaniquë.

### Dios qui bëhoxcana

**5** Jatsi nëca tsi Jesu chaniniquë jahuë rabëti bo qui:

—Shinaparicana. Rabëti bo jaya xo mato têquëta. Jabi mato rabëti xobo qui ma camitsa huëatiscano tsi mapari baaxëna.

Cahax, “Tres ca mapari ë qui prestahuahahuë, noho rabëti. **6** Noho xobo qui cahëyaquë noho rabëti. Paxnahi quiha. Yama tsi xo ja

qui ë ati cato rë” i ja qui ma mitsa. <sup>7</sup>Jatsi xobo xara näca tsi ja quëbimitsa, “Jishopë. Quëbëhacaquë caiti rë” iquiina. “Oxatí xo noa, naa ëa, nohó-na bo. Joinoma xo ëa ra, mapari mi qui axëna” i mato qui ja mitsa quiha. <sup>8</sup>Jabi mato rabëti joicasyamamitsa mato qui mapari axëna, mato rabëti ja iquë ri. Jama, naama pi xobo ibo ma quënano tsi joixëhi quiha mapari mato qui axëna iquia ra. <sup>9</sup>Jascaria, Dios qui bëhoxpíqu tsi bënacana iquia ra. Mato qui acacaxëhi quiha. Méracana. Mérapiqu tsi bixëqui mato. Mato bax japécahacaxëhi quiha jahuë caiti. <sup>10</sup>Bënahai ca qui acacaxëhi quiha. Bixëhi quiha mërahai cato. Japécahaca-xëhi quiha caiti tsoluëcara ca quënahai ca bax na. <sup>11</sup>Shinaparicahuë. “Sani picasquia” i pi mato xocobo no tsi ñja qui rono acaxëcanai pa? <sup>12</sup>“Bachi picasquia” i pi ja no tsi ñja qui nibo acaxëcanai pa pití? <sup>13</sup>Jabi mato xocobo qui jahuë jia cabo ati cahëxëni xo mato, jochacanaibo ma iquii ri. Tocapimano tsi ɿbënacanaibo qui oquë tsi Espíritu Santo ayamayamaxëhi ni mato naipá ca Jahëpa ra? —nëa tsi jahuë rabëti bo qui Jesu näcaniquë.

### **Yoshi pasomaha ca chani**

*Mateo 12.22-30; Marcos 3.19-27*

<sup>14</sup>Jabi joni quima yoshi niahí quiha Jesu iniquë. Yoshi iqui tsi jaro naa joni ini quiha. Jama, yoshi Jesú tsëcaquë tsi quiha chanitsi joni niquë ra. Jatsi ratëniquë nohiria bo ra tsayahax na. <sup>15</sup>Jama, Jesu pasomaha chanitsi nohiria huësti huësti ca niquë pë.

—Naa joni mëbihi quiha Satanás, naa yoshi bo ibo-iboria ra. Satanás chamá tsi yoshi bo tsëcahi quiha tia —i jaca niquë Jesu yoati na.

<sup>16</sup>Jatsi,

—Naipá ca jisti-jistiria ahuë ra —i Jesu qui huëtsa bo niquë pë tanamaxëna.

<sup>17</sup>Jama, ja shinacanai ca cahëquí tsi jato Jesú quëbiniquë:

—Jabi quëyohacaxëhi quiha país ca nohiria bo, ja nianacaquë no ra. Jasca, quëyohacacaxëcani quiha xobó ca nohiria ri, ja iquinacaquë no. <sup>18</sup>Jasca jamë pasomaha pi Satanás iquinano tsi ɿjénahuariahax jahuë chama naamana? Nëcaquía ra, ëa mëbihi quiha Satanás, yoshi bo tsëcati i ma ai quëshpi na. <sup>19</sup>Yoshi bo tsëcati pi Satanás ëa mëbino tsi ɿtsohuë ni toa mato nohiria yoi mëbiti ibo-iboria? Yoshi bo tsëcacani quiha jato ri. ɿTsohuë ni toa

jato tsëquëmati ibo ra? ¿Satanás ma ni? Ja tsi xo toa mato qui quësoxëhi quiha mato nohiria yoi bo iquia. <sup>20</sup>Jabi Dios chamá tsi yoshi bo ë tsëcaquë ra, Satanás chamá tsi nomari. E aca cató tsi bëro tsi xo toa mato qui Diós otohai ca johana ra.

<sup>21</sup>Jabi chamaxëni ca joní jahuë xobó ca jahuë bo ó bësono tsi jénima ca xo jahuë jahuëmishni bo. Yomahacatimaxëni ca xo.  
<sup>22</sup>Jabi toca xo Satanás ri. Jénima xo jahuë jahuë bo. Jama Satanás oquë ca pi jono tsi bëbohacahi quiha Satanás ra. Joxo tsi Satanás iquinati jahuë bo mëbihi quiha. Jaquirëquë, jahuë jahuë bo bichi quiha.

<sup>23</sup>Jabi éa pasomaha yoi tsi xo ë bëtama cato. Jasca, noho yonoco pasomaha tsi xo toa éa mëbiyamahai cato.

### Bacahai ca yoshini

*Mateo 12.43-45*

<sup>24</sup>Jabi joni quima yoshi tsécahacano tsi xaba qui cahi quiha. Caxo tsi iti huëtsa mërahi quiha chitëxëna. Mahitsa mërahax, “E jisbëriani ca xobo qui jahari caxëquia ra” ii quiha yoshini rë. Jatsi bacahi quiha pë. <sup>25</sup>Bacaxo tsi joni tsayahí quiha. Jaboqui jénima xo joni, bahuëhaca ca xobo jascaria. <sup>26</sup>Ja jisbëriani ca joni tsayahax catëquëhi quiha pë, naa jabë yoshi huëtsa bo mërahi na. Jatsi siete ca yoshi yoixëni cabo bëhi quiha ja bëtati. Jatsi joni qui jicocani quiha jato tëquëta racaxëna. Jariapari iriama joni iniquë, jama jaboqui noiti-noitiria nori —nëa tsi jato qui Jesu nëcaniquë.

### Jesu nicacana

*Mateo 12.38-42; Marcos 8.12*

<sup>27</sup>Nëca tsi Jesu chanino tsi quiha nohiria xërëquë ó ca yoxá quënaniquë:

—Shoma xo mi ihua, naa mia comanish cato ra. Shoma xo mia chocho amanish cato ra —iquiina.

<sup>28</sup>Jatsi,

—Jama xo. Shoma tsi xo Dios Chani nicacanaibo. Shoma tsi xo Dios Chani acanaibo iquia —i ja qui Jesu niquë.

<sup>29</sup>Tocajano tsi quiha ja qui quëtsotsi nohiria misco niquë. Jatsi jato qui ja nëcaniquë:

—Anomaria tsi xo no bëta jaboqui bësobëqui-canaibo rë. E acai ca jisti-jistiria roha jiscascani quiha pë, ë qui chitiminox

pari. Maj. Jonás jisti roha jato qui axëquia. <sup>30</sup>Jabi sani chahita jatoquë quima Jonás xabahamahacaquë tsi quiha jahuë chani Nínive yacatá ca nohiria bá chahahuaniquë ra. Jato qui jisti Jonás ini quiha jato chahahuamaxëna. Jascaria, naa xaba ó ca bësocanaibo qui jisti ixëquia éa ri, naa Nohiria Baqué è nori cato. <sup>31</sup>Copiti barí tsi bësotëquéxéhi quiha yoxa chama, naa Shiba mai ax jonish cato. Bësotëquécaxécani quiha naa xabacá ca nohiria bo ri. Jatsi toa barí tsi jato qui quësoxéhi quiha naa yoxa chama, éa ja chahahuayamacana iqui na. Naa yoxa chama tsayacana. Nëama ja caniquë chama Salomón yamaba tiisi nicaxëna. Jama, nëá ca Salomón oquë ca jisqui mato ra. Jisi tsi nicayamaqui mato pë. <sup>32</sup>Jasca, bësotëquécaxécani quiha Nínive yacatá ca nohiria bo ri, copiti barí no. Naa xabacá ca nohiria qui quësocaxécani quiha jato ri. Jabi jato qui Dios Chani Jonás yoaquë tsi quiha jahuë chani qui ja chitimicaniquë. Jama, nëá ca tsi Jonás oquë ca jisqui mato ra. Toa jahuë chani chahahuayamaqui mato pë.

### **Noba quinia bërohuahi quiha noba shinana**

*Mateo 5.15; 6.22-23*

<sup>33</sup>'Jabi lamparina tsamaxo tsi ćcaca nama janahi ni ibo pa? Jahuë ití tsi janahi quiha ra. Jatsi naquëtë qui jicoxo tsi huëa jisxéhi quiha nohiria. <sup>34</sup>Jascaria tsi mëbihacaxéhi quiha nohiria, shina jia ca jayapiquí na. Mato quinia bërohuaxéhi quiha mato shinana, ja jënimacaquë no. Jatsi jabi jia ca jayaxéhi quiha mato ra. Jama shina yoi pi jayahí tsi tsémó tsi coxéqui mato rë. <sup>35</sup>Jatsi quiniacaxécahuë, mato shina ó ca huëa nocahuahacayamano, ja yoinayamacano iquish na. <sup>36</sup>Mato shina pi jënimano tsi, tsémó pi ma bohoyamano tsi, huahuaxéhi quiha mato jabi jia cato ra, naa lamparina huahuahai jascaria —tihi tsi quiha Jesu niquë nohiria bo qui chanihi na.

### **Fariseobo, yoba cahëxëni cabو, tihi cabو pasomaha Jesu chaninina**

*Mateo 23.1-36; Marcos 12.38-40; Lucas 20.45-47*

<sup>37</sup>Jabi jahuë chani Jesu jatihuauquë tsi quiha fariseobá ja qui joi amaniquë jahuë xobó tsi ja oriquino. Jatsi jahuë xobo qui Jesu caniquë. Cahax ja tsahoniquë ja bëta oriquixëna. <sup>38</sup>Jabi Jesu mëchocoyamani quiha pinox pari. Ja quëshpi tsi fariseobo

ratëniquë, jodioba jabi pasomaha ja iqui iqui na. <sup>39</sup>Japi ja qui Jesu chaniniquë:

—Yobá-naxëni xo mato fariseobo ra. Mato mëquë chocoharia xo mato. Jodioba jabi bo nicariaqui mato. Jama, mato shina tsi xo toa jahuë bo ó quëemisxëniria ra. Yoixëni ca xo. <sup>40</sup>Jatsi, cahëtimaxëni xo mato ra. ¿Mato shina Dios, naa noba yora nöhohuanish cató ayamayamani? <sup>41</sup>Jariapari mato shina Ibo Dios qui acahuë. Jaquirëquë jiaxëhi quiha mato jabi téquë.

<sup>42</sup>Noiti xo mato fariseobo ra. Ma tésaha ca yochi bo, naa mente, ruda, tihi cabio quima xatë pistia ca, naa decima ca Dios qui aqui mato, mato yoba bo nicaxëna. Jénima quiha. Jama, mabë xatë yoi bo mëbicasyama xo mato pë. Dios noiyamayoiqui mato iquia. Jabi Dios yoba ma nicaxëti xo ra, yoba huëtsa bo shina-bënoxoma.

<sup>43</sup>Noiti xo mato fariseobo ra. Catiti xobo qui jicoxo tsi oquë ca tsahoti bo bicasqui mato pë. Jasca, yacatá ca bahí tsi bohoquí tsi nohiria bá mato joihuahai ca ó pasoqui mato pë.

<sup>44</sup>Noiti xo mato ra. Mato tsaya-tsayacani quiha nohiria, shina jiaxëni ca ma nori ca quëscahuaquí na. Jama, mato shina tsi xo yoixëniria. Jato qui jonë tsi xo toa mato jabi yoi bo ra —nëa tsi quiha fariseobo qui Jesu nécaniquë.

<sup>45</sup>Jatsi Moisés yoba cahëxëni cabio huëstitá quëbiniquë:

—Jishopë. Noqui ri ocaguaqui mia pë, Maestró, toca tsi mi chaniquë no. Noqui anoma quiha —i Jesu qui joni niquë.

<sup>46</sup>Jatsi Jesú quëbiniquë:

—Noiti tsi xo mato ri, yoba cahëxëni cabá. Nicahacatimaxëni ca yoba bo nohiria bo qui aqui mato pë. Jama, jato qui ma acai ca yoba bo nicayamahai ca mato xo naa ra.

<sup>47</sup>Noiti xo mato ra. Mato naborëquëbá Dios Chani yoanish cabio tēpasníquë pë. Jatsi jato bax maihuati xobo aqui mato pa, nohiria bo jato shinamaxëna. <sup>48</sup>Jama, mato qui jia tsi xo toa mato naborëquëbá anina iquia. Dios Chani yoanish cabio ja acani quiha. Jaquirëquë jato bax maihuati xobo aqui mato pë, nohiria bo quima mato jabi yoiria ca jonëmaxëna.

<sup>49</sup>Jabi mato yoati tsi Diós yoani ca tsi xo naa ra: “Jato qui noho Chani yoati ibo bo, noho Chani chitahëhuati ibo bo, tihi cabio jato qui raaxëquia. Huësti huësti ca tēpascacxëcani quiha pë. Tëxë bo ténëmacaxëcani quiha” i Dios ni quiha jahuë tiisí no. <sup>50</sup>Jabi toca ja iquë ra. Rëquë rohari tsi tēpas-hacani quiha huëstima ca Dios

Chani yoati ibo bo rë. Jabi naa tēpas-hacanish cabo tēquë quëshpi tsi mato copixëhi quiha Dios ra. <sup>51</sup>Jabi Abel pari acacani quiha. Jaquiréquë huéstima ca Dios Chani yoati ibo huëtsa bo acacani quiha. Jarohari tsi Zacarías ja acaniquë. Altar, naa arati xobo naxéréquë xo tsi Zacarías ja tēpascani quiha. Mato parayamaquia. Ja tēpas-hacacani quëshpi tsi copihacaxëti xo naa jaboquí ca bësocanaibo.

<sup>52</sup>Noiti xo mato yoba cahëxëni cabá. Mahitsa ca ma tiisimahai ca iqui tsi Dios Chani cahëyamahi quiha nohiria bo ra. Jasca, jabija ca chani cahëcasyama xo mato ri. Jasca, ë qui bëcascanaibo quëtiaqui mato pë, Dios Chani ja chahahuayamacano iquish na — nëa tsi fariseobo, yoba cahëxëni cabó, tihi cabó qui Jesu nëcaniquë.

<sup>53</sup>Chanixo tsi quiha jato xobo Jesú jisbayaniquë. Jatsi ja qui caxatsi yoba tiisimacanaibo, fariseobo, tihi cabó niquë. Caxaquí tsi huéstima ca jahuë bo yoati tsi ja nica-nicacaniquë tanamacasquí na. Mahitsa ja nica-nicacani quiha. <sup>54</sup>Jatsi ja tsayamisria-caniquë ja qui quësoxëna.

### Fariseobo pasomaha Jesú yobanina

**12** <sup>1</sup>Jabi huéstima ca nohiria bo Jesu qui quëtsoniquë. Tihiria ca inish ca racana. Yama xëa ini quiha tapiti. Jasca, jato huëtsa jamahi ja icani quiha xëa yama iqui na. Jatsi jahuë rabëti bo qui chanitsi Jesu niquë.

—Fariseobá tiisimahai ca qui quiniacaxëcahuë. Paramisxëni ca xo. <sup>2</sup>Bërohuahacaxëti xo jato jabi yoi ra. Jonëma quiha.

### Nohiria qui no raquëyamano

Mateo 10.28-31

<sup>3</sup>Jabi raquëxo tsi Dios Chani ma yoa-yoapaoniquë. Jama, jaboqui tsi mato nicacaxëcani quiha nohiria. Jasca, Dios Chani yoahi tsi ma baxëxpäoniquë. Jama, jaboqui bëro-bëroria tsi noho Chani ma yoaxëti xo, raquëxoma. <sup>4</sup>Jabi mato acascanaibo qui raquëyamacana, noho rabëti bá. Mato yora roha tsi ati mëtsa ca xo. Mato aapiquí tsi jaroha tsi xo toa mato ja acanaina. <sup>5</sup>Jama, Dios qui ma raquëxëti xo iquia ra. Tënëtiya qui nohiria niati chama jaya xo, jato ati. Parayamaquia. Dios qui raquëcana iquia.

<sup>6</sup>¿Mahitsa, naa dos ca parata quëshpi tsi cinco ca chorobo iniayamayamacahi ni? Copiyamaria ca xo. Jabi copiyama ca

chorobo shina-bënoyamahi quiha Dios ra. <sup>7</sup>Jascaria, mato boo tēquë tocahacani quiha ra. Jatsi raquéyamacana, huéstima ca chorobo oquë ma nori quëshpi na —nëa tsi Jesu nëcaniquë.

### Nohiria bësojo ax tsi Cristo ti chanihaina

*Mateo 10.32-33; 12.32; 10.19-20*

<sup>8</sup>'Nohiria bësojó pi "Cristó-na xo éa" i nohiria no tsi Dios ángel bo bësojó tsi "Nohó-na xo toa" ixéquia éa ri, naa Nohiria Baquë ë nori cato. <sup>9</sup>Jama, nohiria bësojó pi éa pasomaha nohiria chanino tsi Dios ángel bo bësojó tsi "Nohó-na ma xo toa" ixéquia éa ri, naa Nohiria Baquë ë nori cato.

<sup>10</sup>'Jabi éa pasomaha pi nohiria chanino tsi iriama tsi xo toa. Jahuë jocha masaxéhi quiha Dios. Jama Espíritu Santo pasomaha pi nohiria chanino tsi masahacayamaxéhi quiha jahuë jocha ra.

<sup>11</sup>'Jabi catiti xobó ca chama bo, nohiria chama bo, tihí cabó qui mato ja bocamitsa mato qui quësoxéna. Tocapijahuacano tsi shina-huéjénayamatsicana ma quëbixéhai ca yoati na. <sup>12</sup>Toatiyá tsi mato tiisimaxéhi quiha Espíritu Santo ra. Ma yoaxéti ca mato jismaxéhi quiha. Chaniyamaxéqui mato, Espíritu Santo inori —nëa tsi jahuë rabéti bo qui Jesu nëcaniquë.

### Jahuëmishni bo ó quëëmisxëni cato

<sup>13</sup>Jatsi nohiria xérëquë ó ca joni chaniniquë:

—Noho rëquëmë qui mi chanino, maestró. Huashicoxëni quiha. Noho jahépa yamaba jahuëmishni bo è bëta xaténayamahi quiha pë —i Jesu qui ja niquë.

<sup>14</sup>Jatsi Jesú quëbiniquë:

—Iyamaquia ra, joní. Nohiria jahuëmishni bo tsi yobati è raahacayamaniquë ra —iquiina.

<sup>15</sup>Jatsi,

—Quiniacaxëcahuë. Anoma tsi xo jahuëmishni bo ó quëëmis-haina ra. Huéstima ca pi ma jayano ri tsi ɿjenahuariaxo raca toa jahuë bá mato raniyoihuana? —i Jesu niquë.

<sup>16</sup>Jatsi naa chani Jesú nohiria bo qui yoaniquë ja cahëcano iquish na:

—Huai jiaxëni ca rico ca joni jayani quiha. Anomaria ja tësani ca bëro ini quiha. <sup>17</sup>Ja iqui tsi "¿Jénahuaxéhi ni éa sa? Bimi janati ca xobo narisquia rë" i jamë ja niquë. <sup>18</sup>Jarohari tsi, "Noho bimi janati

xobo pistia bo poxaxëquia ra. Jaquirëquë xobo chahitaxëni cabo axëquia noho bimi, noho jahuë bo, tihi cabو quëshpi na. <sup>19</sup>Acax, ‘Mi yonoco jënëna. Huëstima ca año no tsi naamaxëhi quiha mi nanëha ca jahuë bo ra. Shoma xo mia. Oriquihuë. Jënë ahuë. Ranitsihuë’ i èmë xëquia ra” —nëa tsi rico ca joni nëcani quiha. <sup>20</sup>Jatsi ja qui Dios chaniniquë: “Naa baquichá tsi rësoxëqui mia, yoyoxëni cató. Mi rësoquë tsi ɿtsohuë ni toa mi janaha ca jahuë bo bichiina ra?” iquiina. <sup>21</sup>Jabi toca xo parata, jahuëmishni bo, tihi cabو ó quëëmisxëni cabو. Mëquëyariayoi ca xo, Dios shinayamahi na.

### Dios no chahahuati xo

Mateo 6.25-34

<sup>22</sup>Jatsi jahuë rabëti bo qui chanitëquëtsi Jesu niquë:  
—Oriquiti, sahuëti, tihi cabو ti tsi shinayamacana ra. <sup>23</sup>Mato oriquiti oquë tsi xo ma bësöhaina. Jasca, mato sahuëti oquë tsi xo mato yora. <sup>24</sup>Isa bo tsayacahuë. Bëro banayamacani quiha. Bimi tësayamacani quiha. Jasca, yama tsi xo toa jato xobo qui nanëhaca ca bimi ra. Jama, jari jënima ca xo. Jato pimahi quiha Dios ra. Jabi ɿisa bo oquëyamayamahi ni mato ra? <sup>25</sup>Jasca, ɿjénahuaríaxo raca ma bësohai ca año bo ma huinomana, ma shina-huëjénahai cató no? <sup>26</sup>Inoma xo mato ra. Japi oriquiti, sahuëti, tihi cabو yoati tsi shina-shinayamatsacana.

<sup>27</sup>Jasca, huasi joa jiaxëni cabو qui tsayacahuë. Yonocoyamacani quiha oriquiti quëshpi na. Jiaría tsi xo ja jiscanaina. Salomón yamaba raiti oquë-oquëria ca xo iquia ra. <sup>28</sup>Jabi jiaría tsi naa naamayamahai ca joa, naa méri tsi nahai ca joa sahuëmahai quiha Dios ra. Tocapiquí tsi ɿmato ri sahuëmacas-yamayamaxëhi ni Dios ra? Iriama tsi xo toa ma chitimihaina iquia. <sup>29</sup>Jaha tsi oriquiti, jënë, tihi cabو ó quëëmisyamacana. Jasca, nëca ca jahuë bo yoati tsi shina-huëjénayamacana. <sup>30</sup>Jabi ja picanai ca shina-shinacani quiha Dios cahëyamacanaibo. Jama, mato ó bësohi quiha mato Jahëpa, ma narisyamano iquish na. <sup>31</sup>Jatsi, mato Chama-chamaria pari shinacana. Tocapimano tsi mato qui acacaxëhi quiha, oriquiti, jënë, tihi cabو ma narisyamano iquish na. <sup>32</sup>Raquëyamacana, noho xocobá. Jahuë mana ca jahuë bo mato qui acatsi quiha Dios ra.

### Mana ca jahuë bo

Mateo 6.19-21

<sup>33</sup>‘Mato jahuë bo iniacana, noitiria cabو qui parata axëna. Tocapimano tsi oquëxëhi quiha mato mana ca jahuë bo ra. Oquë-

oquëria ca jahuë bo quëyotimaxëni tsi xo jotoro ri. <sup>34</sup>Jabi maí ca jahuëmishni bo pi noiquí tsi toa jahuë bo shinarohaxëqui mato pë. Jama, Dios noiquí tsi Dios jahuë bo shinaxëqui mato ra.

### Rohahuahacati xo Diós-na bo

<sup>35-36</sup>‘Ma rohahuahacaxëti xo iquia. Jato chama manacanai ca yonati bo jascariacana. Raiti sahuë ca xo. Jasca, chama bax ririhi quiha jato lamparina bo. Jatsi ahui yahai ca joni fiesta ax jato chama bacano tsi ja bax caiti japëcatapicani quiha. <sup>37</sup>Jatsi ranicani quiha yonati bo, ja manacanai ca nori ca jato chamá jisquë no. Ja manacanai nori iqui tsi ranixëhi quiha chama ri. Ja quëshpi tsi jahuë yonati bo tsahomaxëhi quiha pimaxëna. Jahuë sahuëti rarinamaxo tsi jato taaxëhi quiha chama ra. <sup>38</sup>Jabi baquicha, baquishmari, tihí pi no tsi chama jono tsi ranicaxëcani quiha yonati bo, ja rohahuahacacani quëshpi na. Jabi manahai ca yonati bo jisxëhi quiha chama, joxo na. <sup>39</sup>Jasca, shinaparicana. Yomaxëni ca johai ca xaba pi cahérohahi tsi jahuë xobo ó ibo bësoquë aquë ra. Jahuë xobo qui jicoti mëtsama yomaxëni ca iquë aquë ra. <sup>40</sup>Jascaria tsi ma rohahuahacaxëti xo mato ri. Jabi bacaxëquia, naa Nohiria Baquë ë nori cato. Bacaxëquia jaha ma pasoyamahai ca xabacá no —nëa tsi Jesu nëcaniquë.

### Chiquishxëni ca yonati

Mateo 24.45-51

<sup>41</sup>Jatsi Pedró nicaniquë:

—¿Tsohuë qui naa chani mi yoaha? ¿Jatiroha cabo qui mi yoaha sa? ¿Noqui roha quëshpi ma ni? —iquina.

<sup>42</sup>Jatsi Jesú quëbiniquë:

—¿Tsohuë ni toa empleado jiaxëni cato, naa chahahuahacati cato? ¿Jënica nohiria bixëhi ni chama, jahuë yonati bo obësoti empleado iti, jato orihiati? ¿Jahuë yonati jia ca biyamayamaxëhi ni? <sup>43</sup>Jahuë chamá ja qui aca ca yonoco aapihi tsi ranixëhi quiha empleado, jahuë chama joquë no. Ja acai ca jisxëhi quiha jahuë chama ra. <sup>44</sup>Jisi tsi jahuë empleado qui jatiroha ca axëhi quiha, jahuë jahuë bo tëqué obësoti. <sup>45</sup>Jama, “Bamaxëhi quiha noho chama” i pi toa yonati no tsi, jahuë chama yonati bo pi ja rashano tsi ɿjénahuariaxëhi ni jahuë chama ra, nicaxo na? Jasca, oriquihaina, jënë acaina, pahëhaina, tihí cabo pi empleadó ano

tsi ɿjénahuaxéhi ni chama ra, nicaxo na? <sup>46</sup> Ja quinixäti xo ra. Jabi jaha ja pasoyamahai ca barí tsi bacaxéhi quiha toa chama ra. Bacaxo tsi ɿjahuë yonati yoi ca t  pasyamayamaxéhi ni? Nicamisx  ni caba copi ja qui ax  hi quiha ra.

<sup>47</sup> Jasca, hu  stima tsi rashahacaxéhi quiha jahu   chama shina cah  hai ca yonati, ja yoaha ca ayamapiqu   na. <sup>48</sup> Jama, iriama tsi rashahacaxéhi quiha jahu   chama shina cah  yamahax cato, janyama ja aqu   no. Jabi hu  stima ca tiisi pi joni qui acacarohano tsi hu  stima ca    pasohacaxéhi quiha. “Ariax  hi quiha” ii quiha nohiria bo ja yoati na. Joni qui pi hu  stima ca ati yonoco acacarohano tsi oqu   ca yonoco ja ati ca    pasocax  cani quiha nohiria bo —i Jesu niqu  .

### Jesu iqui tsi oqu  xnamahacax  hi quiha nohiria

Mateo 10.34-36

<sup>49</sup> Jabi mai qui    joniqu   ma  i ca nohiria oqu  xnamax  na. Ea iqui tsi iquinacax  cani quiha nohiria ra, caxahi na. Jaboqui pi ja oqu  xnacano tsi    raniqu   aqu  . Ja oqu  xna-tapicano ra.

<sup>50</sup> Jasca, anomariax  hi quiha    t  n  -t  n  haina r  . Ja iqui tsi shina-hu  j  naquia. M  ri tsi ja jatino ra. <sup>51</sup> Jasca, nohiria b  pasimahi    joyamaniqu  . Toca tsi qu  scahuayamacana. Jama, nohiria iquinamati, nohiria oqu  xnamati, tihi ca aqui    joniqu  . <sup>52</sup> Ea iqui tsi oqu  xnax  hi quiha xob   ca cinco cabo. Dos ca pasomahax  hi quiha tres cabo; tres ca pasomahax  hi quiha dos cabo. <sup>53</sup> Ea iqui tsi jahu   baqu   pasomahax  hi jahu   jah  pa r  . Jasca, jahu   jah  pa pasomahax  hi quiha jahu   baqu   ri. Ea iqui tsi jahu   jahi pasomahax  hi quiha jah  hua. Jasca, jahu   jah  hua pasomahax  hi quiha jahu   jahini. (Jasca,   a iqui tsi jahu   raisi pasomahax  hi quiha jahu   raisi ri) —n  a tsi quiha Jesu n  caniqu  .

### Copiti Ibo-Iboria b  soj   niix  hi quiha nohiria

Mateo 16.1-4; 5.25-26; Marcos 8.11-13

<sup>54</sup> Jatsi n  ca tsi nohiria bo qui Jesu chaniniqu  :

—“Joqui oi” iqui mato, yota ts  mo ch  qu   johai ca ma jisqu   no. Jatsi oi tsi xo. <sup>55</sup> Jasca, xototsi yota no tsi “Matsinax  hi quiha r  ” iqui mato. Jabija tsi xo toa ma iquiina. <sup>56</sup> Jabi nai tsaya-tsayaqu   tsi oi johai, yota johai, tihi cabos cah  x  ni xo mato, paramisx  ni cab  . Jama, jaboqui no b  sohai ca xaba cah  timax  ni xo mato ra.

<sup>57</sup>¿Jia ca jahuë ati mëtsama ni mato sa? <sup>58</sup>Jabi mato pasomaha ca joni pi mato qui caxano tsi bamahaxma tsi ja bëta rabënacana, gobierno chama bo qui mato ja bonox pari. Jabi policía qui chamá mato mëamitsa ra. Jaquirëqué cárcel qui ma nanëhacamitsa.

<sup>59</sup>Jatsi tséquëyamaxëqui mato rë. Jariapari tsi mato múlta copi ma jatihuaxëti xo. (Jascaria tsi bamayamacana rohahuahacaxëna. Joxëhi quiha Dios copiti bari ra) —nëa tsi Jesu nëcaniquë.

**13** <sup>1</sup>Toatiyá tsi huësti huësti ca nohiria bo Jesu qui bëcaniquë Pilató ani ca yoaxëna. Jabi Galileá ca joni bo Pilató tëpasni quiha. Tëpasxo tsi quiha yohina jimi ya jato jimi ja jaxcamënamani quiha pë, Jerusalén ca arati xobo xo na. Toa yohina jimi Dios qui acacati ini quiha nohiria ba jocha quëshpi na. <sup>2</sup>Nicahax Jesú quëbiniquë:

—¿Jahuë shinacanai? ¿Galileá ca nohiria oquë ni naa tëpas-hacanish ca joni ba jocha ra? <sup>3</sup>Iyamahi quiha. Jatsi quiniacaxëcahuë. Mato jocha quima pi Dios quiri bësoyamahi tsi rësoxëqui mato ri.

<sup>4</sup>¿Japa Siloé ca namëhacanish ca joni bo? Toa ax tsi quiha dieciocho ca joni bo acacaniquë jato ri, jato cacha xobo tëtëca poxoniquë no. ¿Ja acacani iqui tsi Jerusalén cabo oquë jato jocha ini? ¿Jahuë shinacanai? <sup>5</sup>Dios copi ja nomari iquia. Jama, mato quinia pi raninamayamahi tsi rësoxëqui mato tëquë ri —i jato qui Jesu niquë.

### Bimiyamahai ca jihui ti chani

<sup>6</sup>Jatsi naa chani nohiria bo qui Jesu yoaniquë:

—Bimi jihui jayaniquë joni ra, jahuë huaí cato. Jahuë bimi bichi ja cani quiha. Yama a ra. <sup>7</sup>Japi jahuë yonati qui ibo chaniniquë: “Tsayahüe. Tres año no tsi naa jihui qui è joquë bimi bixëna. Yama xo pë. Reràhuë. Anoma quiha. Noho mai xëa biqui ra” iquiina.

<sup>8</sup>Jama, jahuë yonatí quëbiniquë: “Jari huësti ca año no tsi ja niino. Ja tëamë tsi mai huëyoxëquia. Jahuë mai jiahuaxëquia. <sup>9</sup>Oquëri ca xënipá tsi ja bimimitsa ra. Ja bimiyamapino tsi rëraxëquia ra” iyonati ni quiha ibo qui —nëa tsi Jesu nëcaniquë.

### Joiti barí tsi yoxa Jesú jënimahuanina

<sup>10</sup>Jabi jodioba catiti xobo xo tsi tiisimahi Jesu iniquë. <sup>11</sup>Jaha tsi quiha noitiria ca yoxa iniquë. Dieciocho año no tsi tapitimaxëni ja ini quiha. Jabi yoshi iqui tsi této ja ini quiha, mëstë niitimaxëni iquiina. <sup>12</sup>Jisi tsi Jesú quënaniquë:

—Mi jénimahuahacaquë, caí —iquiina.

<sup>13</sup>Jatsi yoxa ja motsaniquë jahuë mëquënë no. Ja joitapiniquë ra. Joixo tsi quiha Dios ja ocahuaniquë “Gracias” iquiina. <sup>14</sup>Jama, catiti xobo chama caxaniquë, joiti barí tsi Jesú jénimahuani nori quëshpi na. Jatsi,

—Seis tsi xo toa yonocoti bari ra. Toa barí tsi bëcahuë jénimahuahacaxëna. Anoma tsi xo toa joiti barí tsi jénimahuahacahaina ra —i nohiria qui chama niquë.

<sup>15</sup>Jatsi Jesú quëbiniquë:

—Jisa, mato paracanaibá. ¿Japa mato huëyë bo, mato burro bo? ¿Joiti barí tsi jato mërisyamayamacanai, jénë qui jato mëpixëna? <sup>16</sup>¿Japa naa yoxa ra? Abraham yamabo chahitaxocobo xo ra. Huëyë, burro, tihi cabio oquë quiha. Jabi dieciocho año no tsi Satanás iqui tsi mëstë niitimaxëni ja iquë ra, tëto iquiina. ¿Mato qui yoi ni naa tëtohai ca yoxa jénimahuahaina pa? —i nohiria bo qui Jesu niquë.

<sup>17</sup>Nëca tsi Jesu chaniquë tsi quiha ja qui caxahai ca chama bo bërabiniquë. Jama, rani-raniniquë nohiria tëxë. Jato qui jia ini quiha Jesú ani ca tëquë.

### Mostaza bëro, levadura, tihi cabo jascaria tsi xo Diós otohaina

*Mateo 13.31-32; Marcos 4.30-32*

<sup>18</sup>Jatsi Jesú nicaniquë:

—¿Jahuë jasca ni Diós otohaina? ¿Jahuë qui Diós otohai ca jaharisihuaxëhi ni noa? <sup>19</sup>Bëro mishni, naa joní banahai ca mostaza bëro jascaria xo iquia. Shinahaqui quiha mostaza bëro. Shinahacax jihui manëhi quiha. Jaquirëquë toa xo tsi jato naha quiha isa bo —i Jesu niquë.

<sup>20</sup>Jatsi Jesú jato nicatëquëniquë:

—¿Jahuë qui Diós otohai ca jaharisihuaxëhi ni noa? <sup>21</sup>Levadura jascaria xo iquia. Jariapari tsi harina somo ca ya tëohai quiha yoxa. Toca tsi harina xara pacanahi quiha jahuë shapo —i Jesu niquë.

### Natsëo ca caiti

*Mateo 7.13-14; 21-23*

<sup>22</sup>Jatsi yaca bo xo tsi Jesú tiisima-bonaniquë. Huësti ca yaca jisbaya tsi yaca huëtsa qui ja caniquë Jerusalén quinia ca bahí no.

<sup>23</sup>Jatsi,

—¿Xabahamahacaxëhi ni ichariama cabro roha, Taitá? —i nohiria niquë. Jatsi Jesú quëbiniquë:

24—Naipá ca caiti tsi xo natséo. Jatsi ariacana ja qui jicoxëna. Ja qui jicoti mëtsama icaxëcani quiha huëstima ca jicocas-canaibo ra. 25 Jabi xobo ibobá caiti japono tsi jicotimaxëni-xëhi quiha mato ra. Jatsi, “Noqui jicomahuë, Ibobá” ixéqui mato, cacha niihax na. Jatsi, “Mato cahëyamaquia” i mato qui xëhi quiha Ibo ra. 26 Jatsi jahari quëbixëhi quiha mato. “Mi bëta no oriquipaoniquë ra. Jasca noba yacata xo tsi noqui mi tiisimaponaoniquë ra” ixéqui mato, mahitsa. 27 Jatsi, “Mato cahëyamquia. Bocata, mato jochahuaxëni cabá” i mato qui xëhi quiha. 28 Jatsi, araconaxëqui mato ra. “E ra ma. Jishopë” ixéqui mato, cacha ax na. Toá ca Diós otohai cató ca Abraham, Isaac, Jacob, Dios Chani yoanish cabro, tihi cabro jisxëqui mato. Jato bëtayamaxëqui mato ra. 29 Toatiyá tsi maí ca iti bo tëquë quima ax bëcaxëcani quiha nohiria bo. Diós otohai cató tsi oriquicaxëcani quiha carayanabo ri. 30 Tsayacahuë. Toa barí tsi mato qui quërasria ca carayanabo pari bixëhi quiha Dios ra. Jama, noitixëhi quiha mato jariapari ca Dios Chani binish cabro. Jachoxëqui mato iquia —nëa tsi jato qui Jesu nëcaniquë.

### **Jerusalén ca nohiria Jesú noinina**

*Mateo 23.37-39*

31 Jatsi ja qui huësti huësti ca fariseobo bëcaniquë.

—Nëa chitëyamatsihuë. Jabahuë ra. Mia acatsi quiha Herodes ra —i Jesu qui jaca niquë.

32 Jatsi Jesú quëbiniquë:

—Jahari toa quiaxëni ca qui bocata. “Jaboqui, huëaquë, jari yoshi bo tsëcaxëquia ra. Toa dos ca bari no tsi nohiria bo jénimahuaxëquia. Jama, oquëri ca bari jatixëhi quiha noho yonoco ra” icana ja qui. 33 Jari noho quiniá tsi ë caxëti xo ra. Jaboqui, huëaquë, oquëri ca bari, tihi tsi xo ë cahaina. Jasca, Jerusalén tsi ë namëhacaxëti xo, naa Dios Chani yoanish ca huëtsa bo acacani jascaria.

34 Jisa Jerusalén ca nohiria bá. Dios Chani yoati ibo jari aqui mato rë. Mato qui Diós raahai ca Chani bëcanaibo aqui mato maxaxá no. Jabi mato noiquí tsi mato otocasquia, naa jahuë pëhi namá jahuë xocobo patiarí otohai jascaria. Jama, ëa niacasqui mato rë. 35 Diós mato niabayaquë iquia. Tsayahuë. Jabi ëa

jistéquënox pari tsi “Shoma tsi xo toa Ibobá jané tsi johai cato” ixéqui mato ra —nëa tsi Jesu nëcaniquë.

### Iquihai ca joni Jesú jénimahuanina

**14** <sup>1</sup>Huéstí ca joiti barí tsi quiha fariseobo chama xobo qui Jesu caniquë ja bëta ori quihi na. Jasca, tobi ini quiha Jesu qui tsayamixëniria ca jodioba jabinaxëni cabó ri. <sup>2</sup>Jabi Jesu bësojó tsi noitiria ca joni tsaho ini quiha, naa bai ca yora, poyamë, huico, tihi cabó jayanish cato. <sup>3</sup>Jaha tsi jodioba yoba cahëxëni cabó, fariseobo, tihi cabó Jesú nicaniquë:

—¿Mato qui jénima ni joiti barí tsi jénimahuahaina? —iquiina.

<sup>4</sup>Ja quëbiyamacaniquë. Jatsi Jesú joni biniquë. Bixo tsi joni ja jénimahuaniquë. Jatsi jahari jahuë xobo qui jénima ja raaniquë.

<sup>5</sup>Raahax jato qui Jesu chanítéqueniquë:

—¿Mato baqué, mato vaca, tihi cabó pi jénë maiquini qui paquërohano tsi bamaxoma tsi ma tsécayamaquë ana? —iquiina.

<sup>6</sup>Jatsi quëbitimaxëni quiha ja icaniquë ra, naa jodioba yoba cahëxëni cabó.

### Fiesta qui joi binish cabó

<sup>7</sup>Jabi toá ca oquë ca tsahoti bo fariseobá bicasni quiha. Ja acanai ca jisi tsi naa chani jato qui Jesú yoaniquë:

<sup>8</sup>—Ahui yahai cato fiesta qui pi mato qui nohiriá joi amano tsi toá ca oquë ca tsahoti bo biyamacana. Quiniacaxëcahuë. Mato oquë ca nohiriá jomitsa ra. <sup>9</sup>Jatsi mato qui joxëhi quiha fiesta ibo tia. Johax, “Mi tsahoti joni huëtsa qui acasquia rë” i mato qui xëhi quiha. Tocapijano tsi bërabixëqui mato tia. Jatsi ibo nëama ca tsahoti yoi ca bixëqui mato ra. <sup>10</sup>Jama, mato qui joi amahacano tsi nëama ca tsahoti pari bicana. Jatsi johax, “Ea tahë tsi mi tsahono, noho rabëti” i mato qui fiesta ibo mitsa. Toca tsi fiesta qui bëcanish cabó bësojo ax tsi oquëhuahacaxëqui mato. <sup>11</sup>Jatsi quiniacaxëcahuë. Noitihuahacaxëhi quiha jamë oquëhuacatsai cato. Jama, oquëhuahacaxëhi quiha iriama cato, naa oquë bicas yamahai cato —nëa tsi Jesu nëcaniquë oquë ó quëecanaibo yoati na.

<sup>12</sup>Jatsi oriquiti ja qui joi amati ibo qui Jesu chaniniquë:

—Oriquiti taaquí tsi mi rabëti bo, mi xatë bo, mi jimi bo, mi rico ca rabëti bo, tihi cabó qui oriquiti joi amayamahuë. Jato qui oriquiti joi pi mi amano tsi jahari mi qui oriquiti joi amacaxëcani

quiha jato ri. Toca tsi copihacaxëqui mia. <sup>13</sup>Jama, oriquiti taaquí tsi noitiria cabo, yora choni jaya cabo, tapiyamacanaibo, bëco cabo, tihi cabo qui oriquiti joi mi amaxëti xo. <sup>14</sup>Tocapihi tsi shomahuahacaxëhi quiha mia ra, jahari mia copitimaxëni ja icanaí iqui na. Jatsi mia copixëhi quiha Dios ra, mëstëxëni cabo bësotéquëxéquë no —nëa tsi ibo qui Jesu nëcaniquë.

### Fiesta-fiestaria ti chani

<sup>15</sup>Jabi Jesú yoaha ca toá ca oriquihai ca joni huësti cató nicaniquë. Nicahax,

—Rani-ranixëhi quiha Diós otohai cato ó ca oriquicanaibo têquë —i quiha Jesu qui ja niquë.

<sup>16</sup>Jatsi Jesu ja qui naa chani yoaniquë:

—Oriquiti, chariquiti, tihi cabo joní ani quiha. Axo tsi quiha huëstima cabo qui oriquiti joi ja amaniquë. <sup>17</sup>Jatsi jahuë oriquiti bari tséquëquë tsi quiha jahuë yonati ja raaniquë nohiria bo qui joi amati. “Bëcahuë, rohahuahacaquë oriquiti ra’ icana jato qui” i jahuë yonati qui ibo ni quiha. <sup>18</sup>Jama, nohiria bo bëcasyamacani quiha. “Huai copiyaquë éa ra. E jisi caxëti xo” i jariapari ca joni niquë jahuë yonati qui. <sup>19</sup>Jatsi, “Cinco ca huëyë bo ë copiquë. Jato tanamahi caquia ra. Canoma xo éa rë” i huëtsa ni quiha. <sup>20</sup>Jatsi, “Jaboqui ë ahui yaquë ra. Canoma xo éa rë” i joni huëtsa ni quiha. <sup>21</sup>Jatsi yonati bacaniquë jahuë ibo qui. Bacahax, “Bëcasyamacani quiha pë” i ja qui ja niquë. Jatsi ibo caxaniquë. “Yacatá ca bahi têquë qui cata. Noitiria cabo, yora choni jaya cabo, bëco cabo, tapitimaxëni cabo, tihi cabo néri bëhuë” i jahuë yonati qui ibo ni quiha. <sup>22</sup>Jatsi bacahax, “Jato ë bëquë ra, mi yoaha jascaria; jama, jari tobi xëa pa” i jahuë chama qui ja ni quiha. <sup>23</sup>Jatsi ibo jahuë yonati qui chanitëquëniquë. “Bahí ca nohiria bo, nëama ca nohiria bo, tihi ca nohiria néri bëhuë, noho xobo rëamëno iquish na. <sup>24</sup>Noho oriquiti piyamaxëhi quiha ra toa jariapari ca noho joi binish cabo ra” iquiina —nëa tsi joni qui Jesu nëcaniquë toa chani yoahi na.

### Copixëni tsi xo Cristo banahuahaina

<sup>25</sup>Jabi huëstima ca nohiria Jesu qui bëhi iniquë. Jato quiri bësohax ja chaniniquë:

<sup>26</sup>—Ea noixëti xo tsuhuëcara ca éa banahuacatsai cato. Jahuë jahëpa, jahuë jahëhua, jahuë ahuini, jahuë xocobo,

jahuë xatë bo, tihi cabو oquë tsi ëa ja noixëti xo ra. Jasca, jamë ja noiyamano. Toca pi ëa noiyamahi tsi noho rabëti manëtimaxëni-xëhi quiha. <sup>27</sup>Jahuë cruz yoi pi iayamahi tsi ëa pi banahuayamahi tsi noho rabëti iti mëtsama xo toa ra. <sup>28</sup>Jabi չjénahuahi ni joni, xobo paxa ca acatsi na? Tsahoxo tsi չjahuë xobo pari ati copinaca shinayamayamahi ni? Toa shinaparihi quiha, parata narisyamaxëna. <sup>29</sup>Parata pi narisquí tsi jahuë xobo jatihuayamaxëhi quiha. Tocapijano tsi osacaxëcani quiha nohiria. <sup>30</sup>“Jahuë xobo naa joní chitahëhuaniquë. Chitahëhuahax jatihuatimaxëni xo ra” i caxëcani quiha. <sup>31</sup>Jascaria, չshinayamayamaxëhi ni chama, ja pasomaha ca país huëtsá iquinacasquë no? Jabi veinte mil ca soldado bo pi chama huëtsá jayano tsi jahuë diez mil ca soldado bo yoi bëbohacamitsa. Japi jato iquinati chama cahëparicatsi quiha iquinanox pari. Shinaparihi quiha chama. <sup>32</sup>Jatsi bëbotimaxëni pi jahuë soldado bo no tsi toa chama huëtsa qui chani raaxëhi quiha, ja bëta rabënaxëna. <sup>33</sup>Jascaria, shina-shinaparicana. Mato jahuë bo tëquë pi jisbëriayamahi tsi noho rabëti bo itimaxëni xo mato ra —nëa tsi Jesu nëcaniquë.

### Chopará jahuë tëë bënohaina

*Mateo 5.13; Marcos 9.50*

<sup>34</sup>—Jabi chopara tëë tsi xo jënimá. Jama jahuë tëë pi bënohi tsi չjénahuariahx ja tëenatëquëna? <sup>35</sup>Mahitsa tsi xo chopara tëeyama cato. Anoma quiha. Ja niahacaxëti xo. Japi pahoqui jayaquí tsi nicacana ra —i Jesu niquë nohiria bo qui.

### Bënonish ca oveja

*Mateo 18.10-14*

**15** <sup>1</sup>Jabi gobierno impuestos bicanaibo, jochacanaibo, tihi cabو Jesu qui bëcaniquë jahuë chani nicacatsi na. <sup>2</sup>Ja bëcaquë tsi quiha fariseobo, yoba tiisimacanaibo, tihi cabو yosananiquë.

—Jochahuaxëni cabو joihuahi quiha naa Jesu pa. Tsayacapa. Jato bëta xo tsi pihi quiha ra —i jaca niquë.

<sup>3</sup>Jatsi naa chani Jesú jato yoaniquë:

<sup>4</sup>—Shinaparicana. ¿Cien ca oveja bo pi jayarohaquí tsi jato ó ma bësoquë ayamana? Huësti ca oveja pi bënono tsi չnoventa y nueve

cabo jisbayayamayamacanai, toa huësti ca méraxëna? Toa bënohai ca oveja ma mëraquë aquë tia. <sup>5</sup>Bichi tsi rani-raniqui mato. Icoxo tsi jahari xobo qui bëqui mato raniquí na. <sup>6</sup>Jatsi mato xobo qui cahëxo tsi mato tapaí ca racacanaibo quënaqui mato, jato yoaxëna, “E bëta ranicana. Noho bënohax ca oveja jahari ë biquë ra” iquiina. <sup>7</sup>Jascaria tsi, noventa y nueve ca mëstëxëni ca nohiria bo, naa janyama boyamacanaibo quëshpi tsi ranihi quiha naipá cabo. Jama, oquëria tsi xo ja ranicanaina, huësti ca bënohax ca jochahai ca jahari Dios qui joquë no —i Jesu niquë.

### Bënohacanish ca parata

<sup>8</sup>—Shinaparicana. Diez ca parata jayaquí tsi huësti ca parata yoxá bënomitsa. Bënoxo tsi ñjahuë lamparina tsamayamayamaxëhi ni, toa huësti ca parata méraxëna? <sup>9</sup>Méraxo tsi jahuë xobo tahë ca racacanaibo, jahuë rabëti bo, tihí cabó quënahi quiha jato yoaxëna, “E bëta ranicana. E bënoha ca parata ë biquë ra” iquiina. <sup>10</sup>Jascaria tsi rani-ranixëhi quiha Dios ángel bo ri, jocha quima Dios quirí huësti ca jochahai ca bësoquë no —nëa tsi Jesu nëcaniquë.

### Bënonish ca baqué

<sup>11</sup>Jaquirëquë chani huëtsa Jesú yoaniquë. Ja nëcani quiha: —Dos ca baqué joní jayaniquë. <sup>12</sup>Baqué nomá jahuë jahëpa jisbayacasni quiha. Canox pari tsi quiha “E bixëti ca jahuë bo xatë jaboqui ë qui ahuë, noho jahëpá” i ja qui ja ni quiha. Jatsi jahuë jahuëmishni bo, jahuë parata, tihí cabó jahuë jahëpá oquëxnamaniquë, jahuë baqué noma qui ati. <sup>13</sup>Jatsi ichariama bari huinocaqué tsi jahuë jahuë bo, jahuë parata, tihí cabó sota qui baqué nomá nanëniquë. Nanëhax nëama ca mai huëtsa qui ja caniquë. Toá tsi jahuë parata ja raaniquë. Ja pahëni quiha. Ja yoyoni quiha. Méri tsi jahuë parata quëyohacani quiha. <sup>14</sup>Toca tsi jahuë parata tëquë ja raaniquë pë. Jatsi biniatsi toá ca maí ca nohiria bá huaniquë, oi yama ca quëshpi na. Paxnatsi joni niquë rë jaa ri. <sup>15</sup>Paxnaxo tsi quiha yonoco mërahi ja caniquë. Jatsi chancho obëso ca ja manëni quiha. Ja raahacani quiha jato pimati. <sup>16</sup>Paxnaquí tsi quiha chancho bá piñai ca xëqui xëbo ja picasni quiha. Yama jahuë poco ini quiha. Huashicoxëni jahuë chama ini quiha. <sup>17</sup>Jatsi jahuë jahëpa xobo shinatsijahuaniquë. “Shomaria tsi xo toa noho jahëpa yonati bo ra. Paxnayamacani quiha. Huëstima tsi xo jato oriquiti ra. Jama, rësopaimaria xo ëa rë, paxnahi na” nëa

tsi ja næcani quiha jamë no. <sup>18</sup>Jatsi “Noho jahëpa qui jahari caquia ra. Cahax ‘Mia, Dios, tihi cabو pasomaha è jochaquë rë’ ixëquia noho jahëpa qui. <sup>19</sup>‘Mi baquë è quënahacayamati xo. Mi yonati jascaria ea mi ano ra’ ixëquia” nëa tsi baquë næcani quiha jamë no. <sup>20</sup>Jatsi joihax jahuë jahëpa xobo qui catsijaniquë.

‘Jabi næama ja no tsi quiha jahuë jahëpá jahuë baquë jisniquë. Jisi tsi quiha jahuë baquë qui ja jabaniquë. Jahuë baquë ja tatsoniquë noiquí na. <sup>21</sup>Jatsi jahuë jahëpa qui baquë chaniniquë: “Dios, mia, tihi cabو pasomaha è jochaquë ra. Mi baquë è quënahacayamati xo ra. Mi



*Jabanish ca baquë bacanina*

yonati jascaria éa mi ano” i jahuë jahëpa qui baquë ni quiha. <sup>22</sup>Jama, jahuë jahëpá jahuë yonati bo quénaniquë. “Saco, naa oquë ca saco néri bëcana. Noho baquë sahuëmacana. Jasca, jahuë mëquënë tsi mëquëraati amacana. Jaquirëquë zapato bo sahuëmacana. <sup>23</sup>Sahuëmaxo tsi vaca baquë chahitaxëni ca bëcana tēpas-hacati. No oriquino ra. No pabëno ra. <sup>24</sup>Résonish ca jascaria noho baquë iniquë, jama jaboqui bëso ja nori ra. Bëno tsi ja iniquë, jaboqui no bëta ja nori. Jahari ja joquë ra” nëa tsi jahuë jahëpa nëcaniquë. Jatsi oriquitsijacaniquë.

<sup>25</sup>Jabi huaí tsi jahuë baquë rëquëmë iniquë, jahuë nomá bacaquë no. Xobo qui jopama tsi quiha música, pabëcanaina, tihi cabó ja nicaniquë ra. <sup>26</sup>Nicaxo jahuë yonati ja quénaniquë. “¿Jénahuacahi ni xobó cabó pa?” i ja qui ja ni quiha. <sup>27</sup>Jatsi, “Jahari joquë mi nomá ra. Vaca baquë chahitaxëni ca mi ipá aquë ra piti, jénima mi nomá nori quëshpi na. Jia tsi jahari ja joquë ra” i ja qui yonati niquë. <sup>28</sup>Jatsi caxaniquë jahuë rëquëmë. Xobo qui ja jicoyamani quiha. Jatsi cacha jahuë jahëpa caniquë ja qui, “Jicohuë, jicohuë” iquiina. <sup>29</sup>Jatsi jahuë jahëpa qui baquë nëcaniquë: “Huéstima ca año no tsi yonati jascaria mi bax é yonocoquë ra. Mi yoba tèquë é nicaquë ra. Toatiyá tsi chibo pistia roha é qui ayamaqui mia pë, noho rabëti bo ya é pabëno. <sup>30</sup>Jama, noho nomá bacatapiquë tsi vaca chahitaxëni ca aquí mia pë ja bax na. Mëtsaxëniria ca yoxa quëshpi tsi mi parata quëyoria ca baquë tsi xo naa ra” nëa tsi jahuë jahëpa qui baquë rëquëmë nëcaniquë. <sup>31</sup>Jatsi jahëpa chaniniquë: “Jatiroha ca bari tsi é bëta xo mia ra. Nohó-na jatiroha ca xo mí-na ra. <sup>32</sup>Jaboqui no oriquino ra. Jaboqui no raniti xo, mi nomá bëso nori quëshpi na. Résonish ca jascaria ja iniquë ra. Bëno tsi ja iniquë ra, jaboqui no bëta ja nori. Jahari ja bacaquë ra” i ja qui jahuë jahëpa ni quiha —nëa tsi Jesu nëcaniquë naa chani yoahi na.

### Yomaxëni ca empleado

**16** <sup>1</sup>Jabi naa chani Jesú jahuë rabëti bo qui yoaniquë:  
 —Jabi tobi ini quiha rico inish ca joni. Empleado jayani quiha jahuë yonoco ati. Jabi jahuë empleadó yomahai ca yoati tsi ja yoahacani quiha. <sup>2</sup>Nicaxo tsi quiha jahuë empleado ja quénaniquë. “¿Jahuë ni naa rë, é nicahaha mia yoati na? Mi libro bo, mi cuenta bo, tihi cabó mi jatihuano. Jaboqui rohari tsi noho empleado inoma xo mia ra” i ja qui jahuë chama ni quiha. <sup>3</sup>Jatsi shinatsi empleado huaniquë: “¿Jénahuariaxëhi ni éa rë? Ea tsi xo toa chamayama, huai xëxëti. Jasca, parata bënati bërabipquia” i jamë ja ni quiha.

Shinahax, <sup>4</sup>“E axëti ca cahëquia ra. Noho yonoco jatiquë tsi huëstima ca rabëti bo jayaxëquia tia. Jato xobo qui éa joihua-caxëcani quiha ra” i jamë empleado ni quiha. <sup>5</sup>Japi jahuë chama ó ca cuenta jaya cabo ja quënaniquë. Quënahax, “¿Jahuë tihi ni toa mi cuenta?” i ja niquë jariapari ca jonish ca qui. <sup>6</sup>Jatsi joní quëbiniquë: “Noho cuenta tsi xo cien ca aceite lata bo rë” iquiina. Jatsi empleado nëcaniquë: “Nëa xo mi cuenta siri. Bamayamatsihuë. Cuenta paxa ca mi ano. Cincuenta lata bo huishana” i joni qui ja niquë pë, jahuë chama parahi na. <sup>7</sup>Jaquirëquë huëtsa ja nicaniquë: “¿Jahuë tihi ni mi cuenta?” iquiina. “Cien ca medida trigo moto” i joni niquë. Jatsi, “Mi cuenta siri bihuë. Ochenta roha huishana” i joni qui ja niquë pë, jahuë chama parahi na. <sup>8</sup>Jatsi chamá toa empleado paraxëni cató ani ca nicaniquë. Nicahax, “Anomaria tsi xo toa empleadó acana ra. Nohiria, parata, tihi cabo mëquixëni ca joni tsi xo naa. Cahëxëni quiha” i chama niquë. Jabi Dios xocobo oquë tsi xo toa chahahuayamacanaibá jato jahuë bo, jato parata, jato yonoco, tihi cabo ó ja bësocanaina ra.

<sup>9</sup>Jabi bëroria tsi xo toa paratá tsi anoma ca acaina ra. Jama, mato paratá tsi noitiria cabo mëbicana. Tocapiquí tsi rabëti-rabëtiria bo jayaxëqui mato ra. Jatsi ma rësono tsi mato joihuariaxëhi quiha Dios, i-ipaoħai ca qui ma cahëxëquë no.

<sup>10</sup>Jabi jia pi jahuë ichariama ca jahuë bo otoquí tsi jia tsi huëstima ca jahuë bo otoxëhi quiha nohiria. Chahahuahacati ca nohiria tsi xo naa. Jama, jia pi jahuë ichariama ca jahuë bo otoyamaquí tsi ɿjénahuariaxo oquë ca jahuë bo ja otona? Chahahuahacatimaxëni ca nohiria tsi xo naa. <sup>11</sup>Jabi parata, nohiria jahuë bo, tihi cabo pi ó bësoti cahëyamaquí tsi ɿjénahuariaxo raca mana ca jahuë bo ó bësoti ma cahëna? <sup>12</sup>Jasca pi nohiria huëtsa jahuë bo ó bësoti mëtsama ma ino tsi ɿjénahuariaxo raca mana ca jahuë bo mato qui Diós ana, jaha ma bësono?

<sup>13</sup>Jabi dos ca chama bo bax yonocotimaxëni xo nohiria. Huësti ca chama qui caxaxëhi quiha; chama huëtsa noijahuanori. Huësti ca chama nicaxëhi quiha; chama huëtsa nicacasyama-jahuanori. Japi, ɿjénahuariahax raca Dios bax ma yonocona, parata noihi na? ¿Mato yonayamayamaxëhi ni parata ra? Dos ca ibo jayatimaxëni xo mato ra —nëa tsi Jesu nëcaniquë jahuë rabëti bo qui, tihi ca chani bo yoahi na.

**14** Jabi Jesu chanihai ca toa paratá-naxëni ca fariseobá nicaniquë. Nicaxo tsi quiha Jesu ja osacaniquë parata noiquí na. **15** Jatsi Jesu jato qui chaniquë:

—Paraquí tsi nohiria bësojó tsi mamë mëstëhuaqui mato pë. Jama, mato shina yoi bo cahëhi quiha Dios ra. Ma parahai ca iqui tsi jia tsi nohiria bá mato ocahuamitsa. Jama, mahitsa tsi xo toa mato yoati ja shinacanaina. Dios qui quërasria xo toa nohiria bo ma parahaina iquia ra —i jato qui Jesu niqué—.

### Dios yoba-yobaria

**16** Jabi Moisés quënënina, Dios Chani yoanish cabá quënënina, tihí cabó nohiria bo yoahacaniquë Juan yamabo jonox pari no. Ja joquë tsi quiha chitaheniquë chani paxa cato, naa Diós nohiria bo otohai ca yoati na. Jaha tsi jato chamá tsi Diós otohai ca qui jicocascani quiha jatiroha cabó.

**17** Jabi jatihuahacaniquë Moisés yoba. Jama, naama-naamapaoxëhi quiha Dios yoba-yobaria. Jatihuahacayamaxëhi quiha.

### Ahui niahaina

*Mateo 19.1-12; Marcos 10.1-12*

**18** Jabi jocha ó tsi bësohi quiha ahui niahax ca joni, ahui huëtsa ja biquë no. Jascaria, jocha ó tsi bësohi quiha niahacahax ca yoxa bichi cato ra.

### Rico inish ca joni — noitiria ca Lázaro

**19** Jabi tobi iniquë quiha rico-ricoria ca joni, naa sahuëti copixëni ca sahuëhai cato. Xobo jiaxëni ca ja jayani quiha. Jasca, jatiroha ca barí tsi jia tsi ja piniquë. Ja paxnayamani quiha. **20** Jabi jahuë panë caiti ó tsi janahacani quiha joni, naa Lázaro icanaí cato. Bonohuaxëni ca naa joni ini quiha. Jasca, yonocotimaxëni ja ini quiha. **21** Jabi joni rico cato mesa quima ax paquëhax ca quësi mishni bo ja picasni quiha, paxnaquí na. Jasca, ja qui ina bo bëcanaca tsi jahuë bono bo ja taxocani quiha. **22** Jarohari tsi noitiria ca Lázaro rësoniquë. Ja rësoquë tsi quiha mana, naa Abraham iti icanaí ca qui ángel bá boniquë. Jaquirëquë rësoniquë rico ca ri. Rësohax ja maihuahacaniquë. **23** Jatsi tënëtiyá tsi ja bëpëquëníquë tënëhi na. Jaha xo tsi quiha néama ca Abraham, ja

tapaí ca Lázaro, tihí cabó ja jisni quiha. <sup>24</sup>Jisi tsi quiha Abraham ja quénaniqué: “Ea shinahué, noho jahépa Abrahám. Néri Lázaro mi raano ra. Jénë qui jahué mëtsis ja raano, noho jana matsihuaxëna. Naa chihí tsi ténëquia rë” i ja ni quiha. <sup>25</sup>Jatsi Abrahám quëbiniqué: “Shinaparihué, noho baqué. Huéstima ca jahué jia bo mi jayapaoni quiha bësoquí na. Toatiyá tsi noitiria Lázaro ini quiha. Jama jaboqui nëá xo Lázaro. Shoma xo ra. Jaboqui mia ri tsi xo toa ténëhaina. <sup>26</sup>Jasca, noqui naxérëquë tsi xo xëa chahitaxëni ra. Shitanoma quiha. Tori canoma xo nëá ca shitacascanaibo. Jasca, yama tsi xo toa néri bëcanaibo toa nahax na” i ja qui Abraham ni quiha. <sup>27</sup>Jatsi rico inish ca chaniniqué: “Jishopé. Jatsi noba jahépa xobo qui Lázaro raahué, noho jahépa Abrahám. <sup>28</sup>Cinco ca noma bo jaya xo ëa ra. Naa ténëtiya iti yoati tsi Lazaró jato yobano ra. Néri ja bëcamitsa jato ri rë ja rësoquë no” i Abraham qui ja ni quiha. <sup>29</sup>Jatsi Abrahám quëbiniqué: “Moisés quénënina, Dios Chani yoanish cabá quénënina, tihí ca libro bo jayacani quiha. Jato yoba qui ja nicacano ra” iquiina. <sup>30</sup>Jatsi rico cató quëbitéqueniqué: “Iriama tsi xo jato yoba, noho jahépa Abrahám. Oquë tsi xo rësonish cabó iti quima ax térohacahax ca nohiria jato qui shishohi cahaina, jato yobaxëna. Jatsi jato jocha quima Dios quiri bësocaxécani quiha ra nicahax na” i ja ni quiha. <sup>31</sup>Jatsi ja qui Abraham chanitéqueniqué: “Moisés, Dios Chani yoanish cabó, tihí caba yoba pi nicayamaquí tsi ḥjénahuariaxo rësonish caba iti quima ax térohacahax ca ja nicacascana ra?” i Abraham ni quiha —nëá tsi Jesu nëcaniqué nohiria bo qui chanihi na.

### **Jochamahaina**

*Mateo 18.6-7, 21-22; Marcos 9.42*

**17** <sup>1</sup>Jahué rabëti bo qui Jesu chaniniqué:  
 —Jochati tanamahacarohaxëhi quiha nohiria ra. Jama, noiti-noitixëhi quiha nohiria jochamahai cato. <sup>2</sup>Anoma tsi xo naa chahahuabëna cabó jochamahaina ra. Ja acai ca quëshpi tsi térotamë ca rënëti maxaxa jaya tsi ia qui ja niahacarohapino tsi “Anomaria tsi xo toa copi” i no quë aquë. Jama, oquë ca copi bixëhi quiha toa nohiria huëtsa jochamahai cato iquia. <sup>3</sup>Japi quiniacaxécahué. Mabë xatë pi jochano tsi raahacana. Jahué jocha quima Dios quiri pi ja bësono tsi jahué jocha shina-bënocana.  
<sup>4</sup>Jasca, huësti barí pi siete tsi mato pasomaha ja jochano tsi, siete

tsi “Jochaquë ëa rë” i pi mato qui ja no tsi jari jahuë jocha ma shina-bënoxëti xo iquia —i Jesu niquë.

### Chama jayaxo chitimihaina

*Mateo 17.20*

**5** Jatsi Ibo qui jahuë Chani chitahëhuati ibo bo chaniniquë:  
—No chitimihai ca mi anihuano —iquiina.

**6** Jatsi,  
—Mostaza bëro tsayacana. Mishni-mishniria ca bëro tsi xo toa ra. Jama, chahitaxëni ca planta manëhi quiha toa bëro banahacahax na. Jabi mostaza planta jascaria pi ma chitimihai ca anino tsi anomariaxëhi quiha ma acaina. Jatsi “Mimë tsëquëhuë. Ia qui cata” i pi toá ca jihui qui ma no tsi mato bax caxëhi quiha ra —i jato qui Jesu niquë.

### Yonati yonoco

**7** Jatsi Jesu nëcaniquë:

—Shinaparicana. Yonati mato ó ca huësti cató jayamitsa, naa mato huai xëxëhai cato, vaca ó bësohai cato. Huai ax ja joquë tsi çjënicanai ja qui? “Tsahohuë. Piiparihuë” ñi ja qui canai pa? **8** Iyamaqui mato ra. Jama, “Noho oriquiti rohahuahuë. Shomahuahacahuë. Jaboqui piquia. Ea mi taano. Ea taaxo tsi piquimia” iqui mato ra. **9** Pihax ja qui “Gracias” iyamaqui mato, yonati roha ja nori quëshpi na. **10** Jabi yonati bo xo mato ri. “Yonati bo roha xo noa. No ati ca yonoco roha no aquë ra” i ma ti xo, Diós mato yoaha ca tëquë jatihuahax na. Jatsi mamë oquëhuayamacana —nëa tsi jahuë rabëti bo qui Jesu nëcaniquë.

### Diez ca lepra bo, naa bonohuaxëni cabo

**11** Jerusalén qui cahi tsi Samaria, Galilea, tihi ca mai bo Jesu naconiquë. **12** Jëni ca yaca qui ja cahëquë tsi quiha ja qui diez ca lepra jaya cabo bëcaniquë. Noitiria ca joni bo quiha. Bonohuaxëni cabo ja icani quiha. Ja bëcanaca tsi basi xo tsi Jesu ja quënaçaniquë:

**13** —Noqui shinahuë, taita Jesú —i quiha jaca niquë.

**14** Jatsi Jesú jato jisníquë. Jisi tsi quiha,  
—Arati ibo bo qui bocata. Jato qui mato yora bo jismacana —i jato qui ja niquë.

Capama tsi quiha ja jënimahuahacaniquë. <sup>15</sup>Jatsi huësti ca joni jahari joniquë, ja jënimahuahacani nori jisish na. Jopama tsi Dios oquéhuahi ja ini quiha “Jia xo Dios” iquiina. <sup>16</sup>Johax Jesu tahë tsi ja mëniniquë. Mënihax “Gracias” i Jesu qui ja niquë ranihi na. Jabi Samariá ca carayana ca joni, naa “Gracias” inish ca ini quiha, naa jodiobo qui quéras ca nohiria. <sup>17</sup>Jatsi Jesu chaniniquë:

—¿Diez ca joni jënimahuahacayamayamaha? ¿Jahuënia ni toa nueve ca tëxë bo rë? <sup>18</sup>¿Jaroха ca “Gracias” iquii ca ni naa carayana pa? ¿Béyamacahi ni tëxë bo rë, “Gracias” ixëna? —i Jesu niquë.

<sup>19</sup>Jatsi bacanish ca qui Jesu chaniniquë:

—Joihuë. Cata. Mi chahahuahai cató mi jënimahuahacaquë ra —iquina.

### Diós otohaina

Mateo 24.23-28; 36-41

<sup>20</sup>—¿Jénino tsi nohiria bo otoxëhi ni Dios ra? —i Jesu qui fariseobo niquë.

Jatsi Jesú jato quëbiniquë:

—Nohiria bo ototi Diós chitahëhuano tsi mato béró tsi jisyamaxëqui mato. Jisnoma quiha. <sup>21</sup>Ja tsi xo toa yamaxëhi quiha toa “Néá xo ra. Toá xo ra” iti mëtsa cato, mato xérëqué ó tsi Diós otohai nori ca quëshpi na —i jato qui Jesu niquë.

### Jesu bacahaina

Mateo 24.23-28, 36-41

<sup>22</sup>Jatsi jahuë rabëti bo qui Jesu chanitëquëniquë:

—Tséquëxëhi quiha ma tënëti xabaca ra. Toatiyá tsi Nohiria Baquë bari, naa è bacahai ca bari jiscasxëqui mato iquia. Jama, mato ri tsi xo toa bari jisyamaxëhaina. <sup>23</sup>Toatiyá tsi quiacaxëcani quiha nohiria, “Toá xo Cristo, néá xo Cristo” iquiina. Tocajacano tsi boyamacana. Jato qui nicayamatsacana. <sup>24</sup>Toa barí tsi joritsixëhi quiha Nohiria Baquë, naa bajra-bajrahai ca canapa nai shitahai jascaria. Nohiria qui béroriaxëhi quiha ra. <sup>25</sup>Jama, è bacanox pari tsi è ténëparixëti xo. Jariapari èa niacaxëcani quiha naa nohiria, è qui caxaquí na. <sup>26</sup>Jasca, è bacano tsi è noho pasoyamacaxëcani quiha nohiria rë. Noé tiyá jascariaxëhi quiha. <sup>27</sup>Dios shinayamaquí tsi oi ó ja pasoyamacani quiha. Jénë aqui ja icani quiha. Ahui yahi

ja icani quiha. Ja tocacani quiha, jahuë noti chahitaxëni ca qui Noé jicoquë rohari. Jatsi jënë bainiquë. Jatsi ja quëyohacacaniquë jato tēquëta. <sup>28</sup>Jasca ca ja ini quiha Lot tiyá ca nohiria bo ri. Jocha copi ó ja pasoyamacani quiha jato ri. Toatiyá tsi oriquihi nohiria bo ini quiha, raquëhaxma. Jënë aqui ja icani quiha. Tobi copihaina, iniahaina, banahaina, xobo acaina, tihi cabو aqui ja icani quiha. <sup>29</sup>Jama, yaca Sodoma ax Lot tsëquëquë tsi quiha nai ax chihi, mëshohai ca azufre, tihi cabو xapaquëniquë oi jascaria. Quëyohacani quiha toa nohiria tēquë. <sup>30</sup>Jasca, tocatsixëhi quiha Nohiria Baquë jisiquihai ca barí no ra. Toa bari ó pasoyamacaxëcani quiha nohiria pë.

<sup>31</sup>Toa bari tsëquëno tsi bamahaxma tsi xobo cacha cabو jabano. Xobo qui ja jicoyamacano jato jahuëmishni bo bixëna. Jasca, jato xobo qui huaí ca yonococanaibo bacayamano. <sup>32</sup>Lot ahui shina-bënoyamacana. Ja copihacani quiha yaca qui ja bacacasni iqui na. <sup>33</sup>Jabi rësoxëhi quiha tsohuëcara ca jahuë shina xabahamacatsai cato. Jama, bësoxëhi quiha tsohuëcara ca jahuë shina chihohuahai cato. <sup>34</sup>Parayamaquia. Toa baquichá tsi huësti ca oxatí tsi oxa ixëhi quiha dos ca joni bo. Mëbihacaxëti xo huëstita iquia. Jisbëriahacaxëhi quiha huëtsa rë. <sup>35-36</sup>Toa barí tsi yonoconabëquixëhi quiha dos ca yoxa bo, jato moto acaina. Mëbihacaxëhi quiha huësti cato. Jisbëriahacaxëhi quiha huëtsa rë —nëa tsi Jesu nëcaniquë.

<sup>37</sup>Jatsi,

—¿Jahuënia tsi ocapixëhi ni naa ra, Ibobá? —i jahuë rabëti bo niquë.

Jatsi ja quëbiniquë:

—Jatiroha ca iti xo naa. Poico catihai jascaria catixëhi quiha Dios ángel bo, jochacanaibo copixëna —nëa tsi Jesu nëcaniquë.

### Copiti ibo-iboria — bënen imanish ca yoxa

**18** <sup>1</sup>Jatsi naa chani jahuë rabëti bo Jesú yoaniquë, bëhoxti jato tiisimaxëna, ja shina-huéjénayamacano iquish na. <sup>2</sup>Ja nëcaniquë:

—Huësti ca yacatá tsi juez, naa copiti ibo-iboria ini quiha. Dios cahëcasyamahai ca ja ini quiha. Jasca, nohiria bo qui ja raquëyamani quiha. <sup>3</sup>Toa yacatá tsi racani quiha bënen imanish ca yoxa ri. Jabi juez, naa nohiria bo copiti ibo-iboria qui naa noitiria

ca yoxa caroha-carohaniquë. Cahax, “Ea mëbihuë. Ea yosihai ca mi copino ra” i ja qui yoxa paoni quiha. <sup>4</sup>Jabi naama tsi naa noitiria ca yoxa juéz mëbicasyamani quiha. Jarohari tsi yoxa qui ja yosananiquë. Yosanahax, “Toa yoxa mëbixëquia pë” i jamë ja ni quiha. “Dios, joni, tihi cabio qui raquëyamaquia. <sup>5</sup>Jama, yosaria tsi xo naa yoxa é qui joroha-jorohahaina. Japi é mëbiyamano tsi jari joroha-jorohaxëhi quiha pë. Toa yoxa mëbixëquia ra, éa ja yosanamayamano ra” i jamë juez ni quiha —i Jesu niquë naa chani yoahi na.

<sup>6</sup>Jatsi Jesu chanitëquëniquë:

—Naa juez yoi cato chani nicacana. “Mia mëbixëquia” éi yoxa qui ja yamayamani? <sup>7</sup>Nicacana. ¿Jahuë nohiria yoi bo mëbiyamayamaxëhi ni Dios ri? Baquicha, barihani, tihi cató tsi mëbixëhi quiha, “Ea mëbihuë ra” i ja qui nohiria quë no. Bamayamaxëhi quiha ra. <sup>8</sup>Bamaxoma tsi jato mëbixëhi quiha Dios iquia ra. Jama, éa, naa Nohiria Baqué mai qui bacano tsi ichariama ixëhi quiha toa chahahuacanai ca bëhoxcanaibo iquia —nëa tsi Jesu nëcaniquë.

### Fariseobo — impuestos biti ibo bo

<sup>9</sup>Jabi tobi ini quiha mëstëxëni ca jaca nori ca quëscahuacanaibo. Jato qui naa chani Jesú yoaniquë, naa nohiria huëtsa bo oquë jaca nori ca jascahuacanaibo qui.

<sup>10</sup>Ja nëcaniquë:

—Dios arati xobo qui dos ca joni bo bocaniquë bëhox-xëna. Caniquë fariseobo, naa nohiria huëtsa bo oquë ja nori ca quëscahuahai cato. Jasca, bëhoxhi caniquë impuestos parata biti ibo ri, naa nohiria bo qui yoixëni cato. <sup>11</sup>Jabi arati xobó tsi fariseobo niiniquë jamë bëhox-xëna. Ja nëcani quiha: “Paratá-naxëni ma ca éa xo naa ra, Diós. Jasca, éa ti tsi xo nohiria parayamahaina. Yoxa mëtsaxëniria ca ma ca éa xo naa. Mi qui ‘Gracias’ iquia, Diós, nohiria huëtsa jascama é nori quëshpi na. Jasca, mi qui ‘Gracias’ iquia, naa nëca ca impuesto bichii ca yoixëni ca jascama é nori quëshpi na. <sup>12</sup>Jasca, jatiroha ca semaná tsi dos bari no tsi samaquia ra. Jasca, mi qui noho parata xatë, naa décima ca mi qui aquia ra” tihi ca tsi fariseobo ini quiha, bëhoxhi na. <sup>13</sup>Jama, ori pistia tsi nii quiha impuesto biti ibo iniquë. Nai qui ja tsayacasyamani quiha rabíhi na. Cohuéquí

tsi jahuë shipati ja tox-toxhaniquë jahuë jocha iqui na. “Ea shinahuë, Diós, jochahuaxëni ca ë nori quëshpi na” i ja ni quiha bëhoxhi na. <sup>14</sup>Jabi masahacaquë toa joni jocha iquia ra. Jia tsi jahari jahuë xobo qui ja cani quiha. Jama, toa fariseobo rë. Ja bëhoxhai ca Diós nicayamaniquë. Masahacayamani quiha jahuë jocha. Jatsi quiniacaxécahuë. Jamë oquëhuamisxënocabo tëquë noitihuaxëhi quiha Dios. Jasca, oquëhuahacaxëhi quiha jato jocha bërohuacanaibo tëquë —nëa tsi Jesu nëcaniquë.

### Xocobo Jesú shomahuanina

*Mateo 19.13-15; Marcos 10.13-16*

**15**Jatsi Jesu qui baquë mishni bo nohiria bá bëníquë, jato ja shomahuano iquish na. Jama, jato jisi tsi jahuë rabëti bá raahaniquë;

—Xocobo bëyamacahuë —iquiina.

**16**Jatsi xocobo Jesú quënaniquë:

—E qui xocobo  
bëcano ra. Jato  
chitiayamacana. Nëca  
cabá-na tsi xo Diós  
otohaina ra. **17**Mato  
parayamaquia. Bëroria  
tsi Chama Dios qui  
chahahuacani quiha  
xocobo ra. Jabi  
xocobo jascaria pi  
chahahuayamahi tsi  
nai qui jicoyamaxëqui  
mato ra —i Jesu  
niquë.

### Rico inish ca jonina

*Mateo 19.16-30;  
Marcos 10.17-31*

**18**Jatsi huësti ca  
jodioba chamá Jesu  
nicaniquë:



*Xocobo qui joi Jesú amanina*

—¿Jënhahuaxëhi ni ëa, maestro jiaxëni cató, bëso-bësopaoxëna?  
—iquiina.

**19** Jatsi Jesú quëbiniquë:

—¿Jëníxo tsi jiaxëni ca ëa mi quënaha? Yama tsi xo jiaxëni cato. Jaroha ca jia ca tsi xo Dios. **20** Tonia Moisés yoba cahëqui mia tia. “Joni huëtsa ahui biyamahuë; joni ayamahuë; yomayamahuë; quiahuayamahuë; mi ipa, mi ihua, tihi cabو noihuë” tihi ca tsi ii quiha jahuë yoba —i ja qui Jesu niquë.

**21** Jatsi chama chaniniquë:

—Xocobo xo rohari tsi toa yoba bo tëquë ë nicaniquë ra —iquiina.

**22** Jatsi Jesú quëbiniquë joni nicaxo na.

—Jari huësti ca jahuë narisqui mia axëna. Mi jahuë bo tëquë iniahüe. Iniaxo tsi noitiria cabو qui toa parata mëahuë. Tocapimino tsi naipá ca jahuë bo bixëqui mia ra. Jaquirëquë johuë. Ea mi banahuano —i joni qui Jesu niquë.

**23** Nicahax cohuënaniquë chama, rico ja ini quëshpi na. **24** Cohuë ja ini ca Jesú jisniquë. Jatsi,

—Bëroma tsi xo toa rico cabو Diós otohai ca qui jicohaina ra.

**25** Jato chama yoí tsi Diós otohai ca qui jicocascani quiha; toa quiniá tsi ja jicocanomari —i Jesu niquë.

**26** Jatsi,

—Yama tsi xo xabahamahacati mëtsa cato rë —i nicanish cabو niquë.

**27** Jatsi Jesú jato yoaniquë:

—Jamë xabahamatimaxëni tsi xo nohiria. Dios roha tsi xo toa nohiria xabahamahaina —iquiina.

**28** Jatsi Pedro chaniniquë:

—Noba jahuë bo tëquë no jisbërianiquë mia banahuaxëna —iquiina.

**29** Jesú jato quëbiniquë:

—Mato parayamaquia. Ibo Diós otohai ca iqui pi jahuë xobo, jahuë ahuni, jabë xatë bo, jahuë nabo, jahuë xocobo, tihi cabو jisbëriaquí tsi huëstima ca huino ca jahari bixëqui mato. **30** Jaboqui bësoquí tsi oquë ca copi bixëqui mato ra. Jasca, mato bëso-bësopaoxmaxëhi quiha Dios ra, toa tsëquëxëhai ca xaba paxá no —i Jesu niquë.

### Jesu chaninina ja tënëhai ca yoati na

*Mateo 20.17-19; Marcos 10.32-34*

**31** Jatsi jahuë doce ca rabëti bo Jesú biniquë jato qui chanixëna.

—Jaboqui Jerusalén qui caqui noa. Toá tsi jatihuahacaxëhi quiha Dios Chani yoanish cabá quënënina éa yoati na. <sup>32</sup>Carayanabo qui éa mëacaxëcani quiha. Mëaxo éa mahuacaxëcani quiha pë. Ea yosicaxëcani quiha rë. E qui coshocaxëcani quiha. <sup>33</sup>Jatsi éa rashacaxëcani quiha. Jaquirëquë namëhacaxëquia. Jama, tres barí tsi bésotëquëxëquia —i Jesu niquë.

<sup>34</sup>Jama, Jesú yoani ca jahuë rabëti bá cahëyamani quiha. Jato joma quiha. Cahëtimaxëni ja icani quiha.

### Bëco inish ca joni

*Mateo 20.29-34; Marcos 10.46-52*

<sup>35</sup>Yaca Jericó qui tsi Jesu basimano tsi quiha bahi quëpë tsi bëco ca joni tsaho iniquë. Parata bënahi ja ini quiha.

<sup>36</sup>Tsahoxo tsi nohiria misco tarabihai ca ja nicaniquë. Nicahi tsi,

—¿Tsohuë ni toa éa tarabihaina ra? —i ja niquë.

<sup>37</sup>Jatsi,

—Tarabibi quiha Jesu, naa Nazarét conish cato —i ja qui nohiria bo niquë.

<sup>38</sup>Jatsi Jesu quënatsijahuaniquë:

—Ea shinahuë, David yamabá Baquë —iquiina.

<sup>39</sup>Jatsi,

—Pasihuë. Pasihuë —i ja qui rëquë ca nohiria bo niquë.

Japi oquë tsi ja quënatéquëniquë:

—Ea shinahuë, David Baquë —iquiina.

<sup>40</sup>Jatsi Jesu niiniquë. Niihax,

—Néri toa joni bëcana —i ja niquë.

Jatsi joni joniquë.

<sup>41</sup>—¿Jahuë ó quëehai? ¿Jënhuaxëhi ni éa mi bax na? —i ja qui Jesu niquë.

Jatsi,

—Taiscasquia, Ibobá —i joni niquë.

<sup>42</sup>—Taishuë. E qui mi chitimihai cató tsi mi jënimahuahacaquë ra —i ja qui Jesu niquë.

<sup>43</sup>Jatsi taisrictsijaniquë ra. Taisxo tsi quiha banahuatsijahuaniquë, Dios qui “Gracias” iquiina. Jatsi jia tsi nohiria bá Dios ocahuaniquë, jëníma ja iqui jisish na.

### Jesu — Zaqueo

**19**

<sup>1</sup>Jatsi yaca Jericó qui Jesu jicohaca tsi nacohi ja iniquë.

<sup>2</sup>Toá tsi racani quiha joni rico cato, naa Zaqueo icanai cato. Impuesto bo bicanaibo obëso ca ja ini quiha. <sup>3</sup>Tsohuëcara Jesu iqui ca ja jiscasni quiha. Nohiria misco iqui tsi jisnoma ja iniquë rë, joni pistia ja ini quëshpi na. <sup>4</sup>Japi rëquë ja jabaniquë jihui inaxëna, Jesu jiscatsi na. Jabi ja quiri johi Jesu ini quiha toa bahí no. <sup>5</sup>Toa iti qui joxo tsi quiha mana Jesú tsayaniquë. Tsayahax,

—Botëtsihuë, Zaqueó. Jaboqui mi xobó tsi ë chitëti xo —i Zaqueo qui ja niquë.

<sup>6</sup>Jatsi ja botëtapiniquë. Botëhax rani tsi Jesu qui joi ja amaniquë jahuë xobó tsi ja chitëno. <sup>7</sup>Jatsi nohiria bo ranimisniquë ocapijani ca jisi na. Jato qui yoi quiha.

—Jochahuaxëni cato xobó tsi chitëhi ja caquë pë —i jaca niquë ranimis-hi na.

<sup>8</sup>Jatsi Zaqueo niiniquë. Niihax,

—Jisa, Ibobá. Noitiria cabo qui noho jahuë mishni bo bëquëx ca axëquia ra. Huëstima cabo ë paraniquë rë, jato parata bichi na. Jaboqui cuatro veces huino jahari jato copixëquia ra —i Zaqueo niquë.

<sup>9</sup>Jatsi Jesu nëcaniquë Zaqueo yoati na.

—Jaboqui naa xobó cabo qui joquë Diós xabahamahai ca chama ra. Abraham yamaba chahitaxocobo yoi tsi xo naa joni ra. <sup>10</sup>Nëca ca bënocaiba mërahi ë joniquë. Jato xabahamacasquia, naa Nohiria Baquë ë nori cato.

### Diez ca parata ti chani

<sup>11</sup>Jahuë chani nohiria bá nicano tsi quiha chani huëtsa jato qui ja yoaniquë. Jerusalén qui cahëpaima ja ini quiha. Jasca, Diós otohai ca ó nohiria bo pasoni quiha chitahëti. Ja quëshpi tsi naa chani jato qui Jesú yoaniquë.

<sup>12</sup>—Nëama ca mai huëtsa qui chama caniquë oquë ca chama bixëna. Rey manëhax jahari ja joniquë. <sup>13</sup>Jama, canox pari tsi quiha jahuë diez ca yonati bo ja quënapariniquë. Quënaxo tsi quiha jato qui huësti ca parata copixëni ca ja aniquë jato tëquë qui. Acax tsi quiha, “Naa paratá tsi

iniatsacana. Yama ë no tsi ganancia bo ma ano ra” i jato qui ja ni quiha. <sup>14</sup>Jabi toa maí ca nohiria bá jato chama noiyamani quiha. Ja qui caxa ja icani quiha. Jabi jato chama caquë tsi quiha comisión ja raacaniquë, “Naa joni bicasyama xo noa ra, noba rey iti” iquiina. <sup>15</sup>Jama, rey toa joni manëni quiha. Manëhax ja bacaniquë. Bacaxo tsi quiha jahuë yonati bo ja quënaniquë, naa jahuë parata binish cabo. “Ma anihuani ca parata bo, naa mato ganancia bo jiscasquia ra” i jato qui ja ni quiha. <sup>16</sup>Jatsi jariapari ca yonati ja qui joniquë. Johax, “Néá xo mi ganancia. Jaboqui diez ca parata tsi xo ra, Ibobá” i yonati niquë. <sup>17</sup>Jatsi, “Jia tsi xo toa mi acana ra, yonati jiaxëni cató. Diez ca yaca bo mi yonano ra” i ja qui jahuë chama niquë. <sup>18</sup>Jaquirëquë joniquë yonati huëtsa. Johax, “Néá xo mi ganancia. Jaboqui cinco ca parata tsi xo” i ja niquë. <sup>19</sup>Jatsi, “Cinco ca yaca bo yonaxëqui mia ra” i ja qui jahuë chama niquë. <sup>20</sup>Jaquirëquë ja qui joniquë yonati huëtsa. Johax, “Pañuelo qui mi parata huësti ca é nanëniquë jaha bësoxëna. <sup>21</sup>Mi qui é raquëníquë, shinacoshi mi nori iqui na. Jabi mi parata pi é bënorohano tsi é qui mi caxaquë aquë ra. Ja tsi xo toa mi parata ó é bësoquë, mi parata yoi jahari mi qui axëna” i yonati huëtsa niquë. <sup>22</sup>Jatsi chamá toa yonati raahaniquë: “Mi yoaha cató tsi mi qui quësoxëquia, yonati yoixëni cató. Joni shinacoshi é nori ca cahëqui mia ra. Jabija. Raahacai ca joni ca éa xo naa. <sup>23</sup>¿Jéniriaxo tsi banco qui noho parata mi ayamani, ganancia biti? Joxo tsi noho parata, jahuë ganancia, tihi cabo é biquë aquë ra” i yonati yoixëni ca qui ja niquë. <sup>24</sup>Jatsi, “Jahuë jahuësti ca parata mëbicahuë. Diez ca parata jaya ca joni qui acahuë” i chama-chamaria niquë toa mani cabo qui. <sup>25</sup>Jatsi toá ca mani cabá quëbiniquë: “Majia. Diez ca parata jaya xo pa” iquiina. <sup>26</sup>“Jabija” i chama niquë. “Huino ca copi bicaxëcani quiha jaya cabo, naa Dios bax yonococanaibo. Jasca, jahuë pistia roha ca bënoxëhi quiha chiquixëni cato. Mëbihacaxëhi quiha jahuë pistia roha cato ra. <sup>27</sup>Japi é qui caxacanaibo, naa ‘Noho chama-chamaria ma xo toa’ iquii cabo nëri bëcana. Bëxo tsi éa bësojo xo tsi jato tēpascana ra” nëa tsi chama-chamaria nëcani quiha —i Jesu niquë, naa chani nohiria bo yoahi na.

### Jerusalén qui Jesu jiconina

*Mateo 21.1-11; Marcos 11.1-11; Juan 12.12-19*

**28** Chanihax, jato bëbo ca Jerusalén quinia ca bahí tsi Jesu caniquë. **29** Jabi yaca Betfagé, yaca Betania, tihi cabo qui cahépaima ja ini quiha, naa Maca Olivo Yá tahé ca yaca bo. Basimapama tsi quiha jahuë rabëti bo dos ca ja raaniquë rëquë.

**30** —Mato bësojó ca yaca qui jicocana. Jicoxo tsi nëxë ca burro baquë jisxëqui mato. Jaha jari tsahohama ca burro quiha. Mërisxo tsi ë qui bëtsacana. **31** “¿Jénixo tsi mériscanai?” i pi tsohuëcara no tsi “Bicatsi quiha Ibo” i jato qui cana —nëa tsi quiha jato qui Jesu nëcaniquë.

**32** Jatsi raahacanish ca joni bo bocaniquë. Burro ja jiscani quiha Jesú yoani jascaria. **33** Ja mériscano tsi quiha,

—¿Jénahuariacanai ra? —i jato qui ibo bo niquë.

**34** Jatsi,

—Bicatsi quiha Ibo —i jato qui jaca niquë.

**35** Japi burro baquë Jesu qui ja bëcaniquë. Bëxo tsi quiha jato sahuëti bo ja capohuécanaca tsi cacha Jesu ja tsahomacaniquë.

**36** Jerusalén qui ja co-cono tsi quiha jato sahuëti bo nohiria bá poohaniquë bahí no. **37** Maca Olivo Yá ca bahi rënichihai ca iti qui ja cahéquë tsi quiha Dios ocahuatsi nohiria bá huaniquë. Jerusalén cacha ja icani quiha. Ja rani-ranicani quiha. Jisti bo tëquë ja jiscani ca quëshpi tsi joi pistiamá tsi Dios ja ocahuacaniquë:

**38** —Shomahuahaca ca tsi xo Ibobá jané tsi johai ca chamaría ra. Naipá ca ángel bo ranicano ra. Jia tsi xo manariá ca Dios ra —iquiina.

**39** Jatsi nohiria bo xërëquë ó ca huësti huësti ca fariseobo Jesu qui chaniniquë.

—Mia banahuacanaibo pasimahuë, Taitá. Anoma tsi xo toa ja chanicanaina ra —iquiina.

**40** Jatsi,

—Mato parayamaquia. Ja pasirohapicano tsi naa bahi quëpë ca maxax bá quënaquë aquë ra —i jato qui Jesu niquë, quëbihi na.

**41** Jerusalén basimapama tsi aratsi Jesu niquë jisish na. **42** Arahax ja nëcani quiha:

—Jishopë. Dios xabahamati quinia cahéyamayoiqui mato rë. ¿Jénahuariaxo mato ë cahémana rë? Mato qui jonë xo rë.

**43** Tséquëxéhi quiha xaba yoi ra, naa mato qui caxacanaibo mato qui quëtsoxëqué no. Mato paxati bahi bo quëtiacaxëcani quiha. Jatiroha ca quëpë xo tsi mato tëpascaxëcani quiha rë. **44** Jasca, mato yacata panë, mato xobo bo, tihi cabو potascaxëcani quiha rë. Jasca, mato ri quëyocaxëcani quiha rë. Matsamí, matsamí niiyamaxéhi quiha mato yacata panë maxax bo ra. Mai qui niahacayocaxëcani quiha jato tèquë, Dios xabahamatí quinia ma niani iqui na —nëa tsi Jesu nëcaniquë Jerusalén ca nohiria yoati na.

### Jodioba arati xoboria qui Jesu jiconina

*Mateo 21.12-17; Marcos 11.15-19; Juan 2.13-22*

**45** Jatsi arati xobo qui Jesu jiconiquë. Jicoxo tsi quiha toá ca iniacanaibo cacha raatsijahuaniquë. **46** Raapama tsi, —“Dios qui chaniti xobo quënähacati xo noho xobo” ii quiha Quënähacanish cabo ra; jama, yomacanaiba iti manëmaqui mato pë —i jato qui Jesu niquë.

**47** Jatsi jatiroha ca barí tsi quiha arati xobo xo tsi nohiria tiisimahi ja iniquë. Jabi arati ibo ba chama bo, yoba tiisimacanaibo, nohiria chama bo, tihi cabá Jesu acasni quiha. **48** Jari anoma ja icani quiha, jahuë chani nohiria bá nicacasni quëshpi na.

### Jesu qui jodioba chama bo caxanina

*Mateo 21.23-27; Marcos 11.27-33*

**20** **1** Arati xobo xo tsi nohiria bo Jesú tiisimano tsi quiha ja qui arati ibo ba chama bo, yoba tiisimacanaibo, yosibo, tihi cabó bëcaniquë. Dios Chani jia ca yoahi Jesu ini quiha. Bëhax, **2** —Noqui yoahuë. ¿Tsohuë mi qui chama aquitaha, arati xobo quima iniacanaibo niati? ¿Tocati chama jaya ni mia ra? —i ja qui jaca niquë.

**3** Jatsi Jesú quëbiniquë:

—Mato nicapariquia éa ri. Ea yoacahuë. **4** ¿Tsohuë Juan yamabo qui chama ani, nohiria ashimati? ¿Dios ni? ¿Joni ni? —iquiina.

**5** Jatsi ja chaninariacaniquë:

—“Dios” ipinono tsi “¿Jénixo tsi Juan ma chahahuayamani?” i noqui xéhi quiha pë. **6** Jama, “Joni quima jahuë chama ja biniquë” ipinono tsi maxaxá tsi noqui axéhi quiha nohiria bo rë —i jaca ni quiha, joi i-iqui na.

<sup>7</sup>Japi,

—¿Tsohuëcara ni sa? Jahuënia tsi jahuë chama ja bini ca cahëyamaqui noa ra —i Jesu qui jaca niquë, quëbihi na.

<sup>8</sup>Jatsi,

—Mato quëbiyamaxëquia äa ri ra —i jato qui Jesu niquë.

### Dios Baquë jodiobá niahai ca chani

*Mateo 21.33-44; Marcos 12.1-11*

<sup>9</sup>Jatsi naa chani nohiria bo qui Jesu yoaniquë:

—Huai joní aniquë. Axo tsi quiha toa xo tsi uva icanai ca bimi ja bananiquë. Banaxo tsi quiha joni huëtsa bo qui jahuë huai ja aqueniquë bimi xatë quëshpi na. Aquëhax tsi naama tsi quiha ja caniquë. <sup>10</sup>Jatsi bimitiyá tsi jahuë yonati ja raaniquë jahuë huaí ca bimi xatë biti. Jatsi pë huaí ca yonococanaibá jahuë yonati rashaniquë. Jahari mëquëyá ja raacani quiha. <sup>11</sup>Jaquirëquë yonati huëtsa ibobá raaniquë. Ja rashahacani quiha jaa ri. Jahuë yonati ja yosicani quiha. Jahari mëquëyá ja raacani quiha. <sup>12</sup>Jatsi yonati huëtsa ibobá raaniquë. Ja tsacahacani quiha rë. Cacha ja niahacani quiha. <sup>13</sup>Jatsi, “¿Jénahuaxëhi ni äa rë?” i huai ibo niquë. Jatsi, “Noho baquë yoi jato qui raaxëquia, naa äe noihai ca baquë. Ja qui nicacaxëcani quiha tia” i ibo niquë. <sup>14</sup>Jama, jahuë baquë jisi tsi quiha “Iboba baquë tsi xo naa ra” i jaca niquë. “No ano ra, jahuë bixëti ca mai mëbixëna” i huaí ca yonococanaibo niquë pë. <sup>15</sup>Japi ibobá baquë ja acaniquë. Axo tsi quiha huai cacha jahuë yora ja niacaniquë. Jatsi, ¿jénahuariaxëhi ni huai ibo toa yonococanaibo qui? <sup>16</sup>Toa joni bo quëyohi joxëhi quiha ra. Quëyoxo tsi yonococanaibo huëtsa bo qui jahuë huai axëhi quiha —nëa tsi Jesu nëcaniquë toa chani yoahi na.

Jatsi,

—¡Jishopë! Ocapijayamano ra —i nicanish ca jodiobo niquë.

<sup>17</sup>Jatsi Jesú jato tsayaniquë. Tsayahax tsi quiha ja nicaniquë:

—¿Jénihi ni naa Quënëhacanish cabo ó ca chani ra?

“Oquënaxëhi quiha yosibá niahai ca Maxaxa ra.

Oquë-oquëria ca manëxëhi quiha ra” ii quiha.

<sup>18</sup>Nicacahuë. Noitixëhi quiha naa Maxax icanai ca chahahuayamacanaibo tëquë. Toa Maxax icanai cató tsi quëyohacacaxëcani quiha ra —nëa tsi quiha jato qui Jesu nëcaniquë.

**19** Jatsi Jesu qui ja tsamicascaniquë, naa yoba tiisimacanaibo, arati ibo bo. Jato yoati ja chanihai nori ca ja cahëcani quiha. Jama, jari ja qui ja tsamiyamacani quiha nohiria bo qui raquëhi na.

### Jesu qui ja quësocascanina

*Mateo 21.45-46; 22.15-22; Marcos 12.12-17*

**20** Jatsi jodioba yoba tiisimacanaibo, arati ibo bo, tihi cabá Jesu tsaya-tsayaniquë acasquí na. Japi Jesu qui joni bo ja raacaniquë ja yoahai ca nicati. Jabi joni shinajaxëni jisiria cabo ja raacani quiha; yoixëni cabo jaca nori. Romanoba chama-chamaria qui Jesu ja mëacascani quiha, ja namëhacano. **21** Ja tsi xo toa naa bëcanish ca joni bo nëcaniquë:

—Jia tsi xo mi chanihaina, maestró. Janyama ca tiisimayamaqui mia ra. Jasca, jatiroha cabo mëbicasqui mia ra. Paraxoma tsi Dios quinia tiisimaqui mia ra. **22** ¿Japa? ¿Romanoba chama-chamaria qui impuesto bo no ati ni, naa noqui jodiobo? —i ja qui jaca niquë tanamaxëna.

**23** Jama, ja paracascanai ca Jesú cahëni quiha. Cahëhx,

**24** —Parata éa jismacana. ¿Tsohuë bëmana jaria ni naa ra? ¿Tsohuë ni naa quïnë ibo? —i jato qui ja niquë.

Jatsi,

—Romanoba chama-chamaria janë quiha —i jaca niquë.

**25** —Japi romanoba chama-chamaria qui jahuë jahuë bo tëquë acana. Jasca, Dios qui jahuë jahuë yoi bo acahuë —i jato qui Jesu niquë.

**26** Jabi jia tsi Jesú quëbini quiha nohiria bo bësojo xo na. Ja quëshpi Jesu qui quësotimaxëni ja icani quiha. Jatsi ja pasicaniquë jiaria tsi ja quëbini iqui na.

### ¿Bësotëquëxëhi ni rësonish cabo?

*Mateo 22.23-33; Marcos 12.18-27*

**27** Jaquirëquë saduceobo Jesu qui bocaniquë jato ri. “Yama tsi xo nohiria bësotëquëxëhaina” icanish cabo tsi xo naa. Jabi Jesu ja tanamacascani quiha jato ri. Ja nëcacaniquë:

**28** —“Baqué yama pi joni rësono tsi jahuë ahui biti xo jahuë noma. Bixo tsi jahuë rëquëmë bax xocobo ja saihuati xo” ii quiha Moisés yamabá quënënina, maestró —i Jesu qui jaca niquë—.

**29** Jabi seis ca noma bo jayanish ca joni ini quiha. Xocobo

saihuahaxma tsi naa joni rësoniquë rë. <sup>30</sup>Jatsi jahuë ahui jahuë xachacató biniquë. Xocobo saihuahaxma tsi ja rësoniquë jaa ri. <sup>31</sup>Jaquirëquë jahuë ahui jahuë noma huëtsá biniquë. Xocobo saihuahaxma tsi ja rësoniquë jaa ri. Toca tsi jahuë noma bo tëquë aniquë. Ja rëscoyocaniquë, xocobo saihuahaxma. <sup>32</sup>Jarohari tsi rësoniquë yoxa ri. <sup>33</sup>¿Jabi nohiria bo bësotëquëno tsi tsohuë ahui ixëhi ni yoxa sa? Siete ca bënë jayani quiha bësoquí na —nëa tsi Jesu qui ja nëcacaniquë.

<sup>34</sup>Jatsi Jesú jato quëbiniquë:

—Naa mai xo tsi ahui bo yacani quiha joni bo. Bënë bicani quiha yoxa bo ri. <sup>35</sup>Jama, mana xo tsi ahui bo, bënë bo, tihi cabojayamaxëhi quiha shomahuahaca cabos, naa bësotëquëxëcanabos. <sup>36</sup>Rësotëquëpistia-yamariacaxëcani quiha, ángel bo jascaria iquiina. Dios xocobo ca xo, jahuë rësotëquëtsi ja bësotëquëcaxëcanai quëshpi na. <sup>37</sup>Jatsi, “Bësotëquëxëhi ni nohiria bo” ¿icanai pa? Jabi Moisés yoani cato ó ca tsi bëroria tsi xo nohiria bo bësotëquëhaina ra. Toa noqui ja jismani quiha. “Abraham Dios, Isaac Dios, Jacob Dios” i Dios qui Moisés yamabo ni quiha, naa nihipétoro mëshohai cato ó tsi ja qui Dios jisiquiniquë no. <sup>38</sup>“Abraham yamabá Dios, Isaac yamabá Dios, Jacob yamabá Dios” iyama Moisés yamabo ni quiha, bëso jaca nori quëshpi na. Bësotëquëhaina Dios ma xo Dios; jama, bësotëquëhaina Dios ja nori. Bëso xo Dios jaya cabotëquë —i saduceobo qui Jesu niquë.

<sup>39</sup>Jatsi,

—Jabija tsi xo mi quëbihana, maestró —i yoba tiisimacanaibo huësti huësti cabos, naa nihipétoro mëshohai cato ó tsi ja quiha raquëquí na.

### David Ibo Cristo

*Mateo 22.41-46; Marcos 12.35-37*

<sup>41</sup>Jatsi Jesú toá ca yoba cahëxëni cabos, nicaniquë:

—“Johai ca Xabahamati Ibo tsi xo David Baqué” ii quiha nohiria bo. ¿Jénahuariahax nëcati mëtsacahi ni? <sup>42,43</sup>Jabi nëca tsi libro Salmos ó tsi David yamabá quëneniquë Cristo yoati na,

“Mia oquëhuanox pari tsi, jariapari mia pasomaha cabo bëboxëquia, jato mi yonano’ i noho Ibo qui Ibo Dios ni quiha” nëa tsi David yamabó nëcani quiha. <sup>44</sup>¿Jénahuariahax David baqué Cristo ii ni ra? “Noho Ibo” ¿i David yamabó yamayamani, Cristo yoati chanihi na? —nëa tsi jato qui Jesu nëcaniquë jato nicahi na.

**Yoba cahëxëni cabo pasomaha Jesú yobanina***Mateo 23.1-36; Marcos 12.38-40; Lucas 11.37-54*

**45** Nohiria tēquëtá nicanó tsi quiha jahuë rabëti bo qui Jesu chaniniquë:

**46** —Yoba tiisimacanaibo qui quiniacaxëcahuë. Sahuëtiria tētëcaxëni cabos sahuëcascani quiha. Toca tsi bohocascani quiha pë. Jasca, mercado xo tsi nohiria bá jato joihuahai ca ó pasocani quiha pë. Jasca, jato catiti xobó ca rēquë ca oquëria ca tsahoti bá tsi tsahocascani quiha. Jasca, nohiria oriquiti catino tsi oquë ca tsahoti bá tsi tsahocascani quiha pë. **47** Jasca, bënë imanish ca yoxa bo paracani quiha, jato jahuë bo mëbixëna. Paraquí tsi jato xobo bo mëbicani quiha pë. Mëbihax Dios qui chani tētëca tsi bëhoxcani quiha ra, nohiria bo paraxëna. Quësohacacaxëcani quiha ra. Oquëxëhi quiha jato copi ra —i jahuë rabëti bo qui Jesu niquë.

**Dios qui bënë imanish ca yoxá anina***Marcos 12.41-44*

**21** <sup>1</sup> Arati xobó tsi niipama tsi parata biti caja qui nohiria rico cabá jato parata nanëhai ca Jesú tsaya-tsayaniquë.

<sup>2</sup> Tsayajahuanó tsi quiha noitiria ca bënë imanish ca yoxá dos ca parata copiriamá cabos nanëniquë. <sup>3</sup> Jisníquë Jesu. Jisi tsi,

—Nohiria huëtsa bá nanëhaca parata huino tsi xo naa noitiria ca yoxá acana ra. <sup>4</sup> Narisxoma tsi parata ja acana quiha. Jama naa yoxa ra. Noitiria xo. Jatiroha ca ja jaya ca ja aquë ra; naa jahuë oriquiti copiti parata —i Jesu niquë.

**“Potas-hacaxëhi quiha jodioba arati xobo” i Jesu nina***Mateo 24.1-2; Marcos 13.1-2*

**5** Templo, naa jato arati xobo yoati tsi chanihi quiha huësti huësti ca rabëti bo iniquë. Jahuë maxax jiaria cabo, templó ca jianati jahuë bo, naa nohiria bá anina, tihí cabo yoati tsi chanihi ja icani quiha. **6** Jatsi Jesu jato qui chaniniquë:

—Tséquëxëhi quiha xabaca ra, naa ma tsayahai ca potas-hacaxëquë no. Poxahacaxëhi quiha jahuë maxax bo tēquë. Yamaxëhi quiha matsami matsami niihai ca maxax bo iquia ra —iquiina.

<sup>7</sup>Jatsi,

—¿Jénino tsi potas-hacacaxécahi ni? ¿Jénahuariaxo tsi cahéxéhi ni noa, ocapijaxéquë no, Maestró? —i Jesu qui jaca niquë.

<sup>8</sup>Jatsi Jesú yoaniquë:

—Quiniacaxécahuë, ma parahacayamano. Joxéhi quiha huéstima ca noho jané tsi chanicanaibo. “Cristo xo éa” icaxécani quiha pë. “Tséquëpaimaria xo jaroha ca bari ra” icaxécani quiha. Jato banahuayamacana ra. <sup>9</sup>Jasca pi país bo nianahaina, país ca xéréquë ca nohiria iquinahaina, tihi cabو nicahi tsi raquéyamatsicana. Toca tsi ja ixéti xo. Ocapijano tsi jari basi tsi xo toa jahuë rëso. <sup>10</sup>Jariapari tsi país huëtsa pasomaha nianaxéhi quiha país huëtsa. Chama huëtsa pasomaha iquinaxéhi quiha chama huëtsa. <sup>11</sup>Yajoriaxéhi quiha mai. Oriquit narisxéhi quiha nohiria bo. Iquicaxécani quiha huéstima cabو. Jasca, raquériaxéhi quiha nai qui tsaya-tsayahaina. Jahá tsi jisiquixéhi quiha mana ca jisti-jistiria bo ra. <sup>12</sup>Jama, ja tocapinox pari no tsi mato qui pari tsamicaxécani quiha ra. Mato ténémacaxécani quiha. Arati ibo bo qui mato mëacaxécani quiha. Preso qui mato nanëcaxécani quiha. Tihi ca tsi acaxécani quiha noho jané tahéxo na. <sup>13</sup>Jatsi, toatiyá tsi xaba jayaxéqui mato jato qui Dios Chani yoaxëna. <sup>14</sup>Tocapijano tsi jato bësojo ax tsi ma chanixéti ca yoati tsi shinayamatsacana. <sup>15</sup>Toatiyá tsi chani-chaniti chama, tiisi, tihi cabو mato qui axéquia. Ja iqui tsi pasimahacaxéhi quiha toa mato qui caxacanaibo. <sup>16</sup>Jasca, chama bo qui mato mëaxéhi quiha mato nabo, mabë xatë bo, mato jimibo, mato rabëti bo. Jatsi, mato ó ca huësti huësti ca namëcaxécani quiha ra. <sup>17</sup>Noho jané tahéhx tsi mato qui caxacaxécani quiha jatiroha cabو. <sup>18</sup>Jama, mato ó bësoxéquia mato ja motsayamacano iquish na. <sup>19</sup>Chamatsicana. Xabahamahacaxéhi quiha mato naamapihi na —i jato qui Jesu niquë.

### Soldado bá Jerusalén potasxéhaina

<sup>20</sup>—Soldado bo Jerusalén tëayohai ca jisi tsi quëyohacati basima ja nori ca cahéxéqui mato. <sup>21</sup>Jatsi maca bo qui jodioba maí cabو jabaxéti xo. Jisbayaxéti xo Jerusalén cabو. Xabachá cabو yaca qui bacayamaxéti xo ra. <sup>22</sup>Nohiria bo copiti xaba tsi xo naa. Toatiyá tsi jatiuhahacaxéhi quiha Quënëhacanish cabо iquiina. <sup>23</sup>Noitixéhi quiha tohoya cabو, baquë pistia ico cabо rë. Anomariaxéhi quiha

toa maí ca nohiria bá ténéhaina iquia. Anomariaxëhi quiha jato qui Dios caxahaina. <sup>24</sup>Saipí tsi tēpas-hacaxëhi quiha huéstima cabó. Nëxahacaxëhi quiha huéstima cabó, país bo tēquë qui ja bohacacano. Jasca, Jerusalén tsi bohocaxëcani quiha carayanabo jato xaba jatiquë rohari.

### **Jesu johaina**

*Mateo 24.29-35, 42-44; Marcos 13.24-37*

<sup>25</sup>Naipá tsi jisiquixëhi quiha jisti bo ra. Yoyoxëhi quiha bari, oxë, huishti bo. Shina-huéjénaxëhi quiha maí ca nohiria tēquëta. Jasca, raquéria ixëhi quiha ia bo ri. Jahuë pacotsa, jahuë yoyohai ca choca bo, tihi cabó qui raquécacxëcani quiha. <sup>26</sup>Toatiyá tsi rësocaxëcani quiha nohiria raquéhi na. Jahuëcara ó pasoti cahéyamacaxëcani quiha, naipá ca jahuë bo yajohacaxëhai iqui na. <sup>27</sup>Jatsi tsémó tsi Nohiria Baquë johai ca jiscaxëcani quiha. Noho chama, noho oquë, tihi cabó jiscaxëcani quiha ë joxëquëno. <sup>28</sup>Naa jahuë bo tēquë ocapiti chitahëno tsi chamacana. Jaha bësocahuë. Joti basima tsi xo ma xabahamahacahaina —i Jesu niquë.

<sup>29</sup>Jatsi naa chani Jesú yoaniquë jato cahémaxëna:

—Higuera jihui, jihui huëtsa bo, tihi cabó qui tsayacahuë. <sup>30</sup>Ja botoxpícano tsi basima oitiya nori ca cahéqui mato. <sup>31</sup>Jascaria, ë yoaha ca jahuë bo ocapiti chitahëno tsi basima Diós otohai nori ca cahéxéqui mato ri. <sup>32</sup>Mato parayamaquia. Naa bësohai ca nohiria bo rësonox pari no tsi ocapixëhi quiha ë yoahaina iquia. <sup>33</sup>Huinocaxëhi quiha naipá ca jahuë bo, naa mai ri, jama, huinoca-pistiyamariaxëhi quiha noho Chani. Jabiya tsi xo naa ë yoahaina.

### **No rohahuahacati xo**

<sup>34</sup>Quiniacaxëcahuë. Pabéhaina, jénë acaina, maí ca jahuëmishni bo, tihi cabó tsi shina-shinayamacana. Tocapimano tsi mato ratiaxëhi quiha toa bari, jaha ma pasoyamahai iqui na. <sup>35</sup>Jatiroha ca maí ca nohiria bo ratiaxëhi quiha ë johaina ra. <sup>36</sup>Japi rohahuahacacahuë. Bëhoxrohacana, chama ma jayacano iquish na, naa jahuë bo tēquë paxaxëna, Nohiria Baquë bësojó tsi niixëna —i jato qui Jesu niquë.

<sup>37</sup>Toa bari bo Jesú raaniquë arati xobó no, toa xo tsi nohiria bo tiisimahaina. Jama, Maca Olivo Yá tsi baquicha ja raaniquë. <sup>38</sup>Jabi baquishmarí tsi nohiria bocani quiha arati xobo qui Jesu nicaxëna.

### Jesu qui ja tsamicascanina

*Mateo 26.1-5, 14-16; Marcos 14.1-2, 10-11; Juan 11.45-53*

**22** <sup>1</sup>Tséquëti basima quiha jodioba pascua fiesta iniquë.  
Toatiyá tsi levadura yama ca mapari ja picani quiha. Jato  
jabi quiha. <sup>2</sup>Jasca, Jesu ati quinia mérahi ini quiha arati iboba  
chama bo, jato yoba tiisimacanaibo ri. Nohiria bo qui raquéquí tsi  
quiha bëroxo tsi Jesu ja acasyamacani quiha.

<sup>3</sup>Jatsi Judas qui Satanás jiconiquë, naa Iscariote icanai cato. Jesu  
doce ca rabëti bo huësti ca ja ini quiha. <sup>4</sup>Jatsi arati ibo bo, arati  
xobo obëso cabø, tihi cabø qui Judas caniquë chanixëna. Jato qui  
Jesu ja mëacasni quiha. Cahax, jato bëta ja chaninaniquë. <sup>5</sup>Jatsi ja  
ranicaniquë ja yoani ca nicahax na. Ranihax,

—Parata mi qui axëqui noa ra —i Judas qui jaca niquë.

<sup>6</sup>Jatsi,

—Jénima —i Judas niquë.

Japi Jesu qui tsamiti xaba mératsi-jahuaniquë, nohiria bá  
cahëyamano iquish na.

### Pascua fiesta

*Mateo 26.17-29; Marcos 14.12-25; Juan 13.21-30; 1 Co. 11.23-26*

<sup>7</sup>Jatsi jato levadura yama ca mapari piti fiesta tséqueniquë,  
naa oveja baqué acacaquë no. <sup>8</sup>Japi Pedro, Juan, tihi cabø Jesú  
raaniquë. Raahax,

—Bocata. Pascua oriquiti ma rohahuano piti —i jato qui ja niquë.

<sup>9</sup>Jatsi,

—¿Jahuëniaxo tsi rohahuaxëhi ni noa? —i jaca niquë.

<sup>10</sup>Jatsi,

—Yaca qui jicocana. Toa xo tsi chomó ca jënë bëhai ca joni  
bëchaxëqui mato. Toa joni banahuacana, ja jicohai ca xobo qui.

<sup>11</sup>Jatsi toa xobo ibo qui chanicana. “¿Jahuënia ni naquëtë?” ii quiha  
Maestro” i ja qui cana. “Nëa xo tsi jahuë rabëti bo yaxo tsi pascua  
oriquiti picatsi quiha” icana. <sup>12</sup>Jatsi mana ca naquëtë chahitaxëni ca  
mato jismaxëhi quiha; tsahoti bo, mesa, tihi cabø rohahuahaca ca  
naquëtë quiha. Toa xo tsi oriquiti rohahuacana —i jato qui Jesu niquë.

<sup>13</sup>Jatsi Pedro, Juan, tihi cabø bocaniquë. Ja bocanaca tsi naquëtë  
qui ja cahëcaniquë Jesú yoani jascaria. Cahëxo tsi quiha pascua  
oriquiti ja rohahuacaniquë.

<sup>14</sup>Jatsi t̄txē bo ya tsi Jesu joniquë. Tsahohax oriquitsijacaniquë.

<sup>15</sup>Oriquipama tsi Jesu jato qui chaniniquë:

—Naa pascua oriquiti mato b̄eta oriqui-casquia r̄esonox pari.

<sup>16</sup>Jabi n̄ea xo tsi naa pascua oriquiti pit̄equépistiyamariaxéquia Diós otohai cato xo tsi ja jatihuahacaxéquë rohari. Jaquiréquë pit̄equéxéquia ra —iquiina.

<sup>17</sup>Jatsi copá ca jénë ja bihaca tsi “Gracias” i Dios qui ja niquë.

—Bicahuë. Ayocana. <sup>18</sup>Néa xo tsi uva bimi jénë

atéquéyamaxéquia Diós otohai joxéquë rohari —i Jesu niquë.

<sup>19</sup>Jatsi mapari Jesú biniquë. Bichi tsi quiha “Gracias” i ja niquë. Béquéx-xo tsi jato qui ja aniquë ja picano.

—Noho yora tsi xo naa. Picahuë, éa shinaquí na —i quiha ja niquë.

<sup>20</sup>Oriquixo tsi quiha copá ca jénë jato qui ja aniquë ja acano. Acax,

—Noho jimí tsi Dios xabahamati quinia paxa ca jismahi quiha naa jénë. Mato bax japhahacaxéhi quiha noho jimi ra. <sup>21</sup>Tsayacahuë. No b̄eta tsaho tsi xo toa éa pasomaha cato r̄e, naa chama bo qui éa m̄eacatsai cato. <sup>22</sup>Jabi r̄esoxéti xo Nohiria Baqué ë nori cato. Diós yoani ca tsi xo naa ra. Jama, noitiriaxéhi quiha toa éa chama bo qui m̄eaxéhai cato iquia —n̄ea tsi Jesu n̄ecaniquë.

<sup>23</sup>Jatsi chaninatsi jahuë rabéti bo niquë:

—¿Tsohuë cara ni toa no nohó ca Jesu pasomaha cato sa?  
—iquiina.

### ¿Tsohuë ni toa oquë cato?

<sup>24</sup>Jatsi joi i-ibéqui tsi quiha Jesu rabéti bo niquë, naa jato xéréquë ó ca oquë ca ixéti nori ca yoati na. <sup>25</sup>Jatsi jato qui Jesu chaniniquë:

—Jato nohiria bo yonahi quiha maí ca chama bo. Yonahi tsi “Nohiria Rabéti bo xo noa” icani quiha p̄e, jato rabéti bo jaca nomari. <sup>26</sup>Jabi toca ma xo noa ra. Yonati jascaria manéxéti xo mato xéréquë ó ca oquë cato. T̄txé bo ja m̄ebixéti xo. <sup>27</sup>Mato nicaquia. ¿Tsohuë ni toa oquë cato? ¿Tsaho ca pihai ca ni? ¿Taahai ca ni? Tsayacahuë. Jato yonati bá tsi taahacahai ca ó pasocani quiha tsahohai ca chama bo. Jama, n̄éa xo éa, mato xéréquë ó no. Ea ti tsi xo toa mato taahaina ra.

<sup>28</sup>‘Mato tsi xo toa é qui chitimihax cabo, naa é t̄enétiyá no.

<sup>29</sup>Jaboqui yonati chama-chamaria mato qui aquia, noho jahépa

ë qui ani jascaria. <sup>30</sup>Noho mesa ax oriquiti tsahoxëqui mato ë yonahai cató no. Jasca, trono bo xo tsi Israél ca doce ca xatë bo ó bësoxëqui mato ra —nëa tsi quiha jahuë rabëti bo qui Jesu nëcaniquë.

**“Jochamati tanamahacaxëqui mia” i Pedro qui Jesu nina**

*Mateo 26.31-35; Marcos 14.27-31; Juan 13.36-38*

<sup>31</sup>—Ea nicahuë, Simón —i Jesu niquë—. Jochati mato tëquë tanamacatsi quiha Satanás ra. <sup>32</sup>Jama, mi bax ë bëhoxquë, Simón, mi chahahuahai ca quima mi casoyamano. Jasca, jahari ë quiri bësoxo tsi mibë xatë bo mi chamahuano —i ja qui Jesu niquë.

<sup>33</sup>Jatsi Pedró quëbiniquë:

—Mia jisbëriapistayamaxëquia ra. Preso qui pi mia ja nanëcano ri tsi mi bëta cahai ca ëa xo naa ra. Mi bëta rësoti qui raquëyamaquia ra —iquina.

<sup>34</sup>Jatsi,

—Mia parayamaquia, Pedró. Ea pasomaha chaniti basima xo mia rë. Jaboqui patiari quéonox pari no tsi tres tsi “Jesu cahëyamaquia” ixëqui mia ra —i ja qui Jesu niquë.

<sup>35</sup>Jatsi jahuë rabëti bo qui Jesu nëcaniquë:

—Mato ë raaquë tsi ñjahuë ma narisni? Mëquëya ma raahacani quiha. Parata, sota, zapato bo, tihi cabو yahaxma tsi ma bocani quiha —iquina.

Jatsi,

—No narisyamahitaquë ra —i jahuë rabëti bo niquë.

<sup>36</sup>Jatsi Jesú quëbiniquë:

—Jaboqui pi parata jayaquí tsi bocahuë. Sota pi jayaquí tsi bocahuë. Saipi pi jayamaquí tsi mato sahuëti iniacahuë copixëna. <sup>37</sup>Mato parayamaquia. Jatihuahacaxëti xo Quënëhacanish cabو, naa “Caxaxëniria ca jascaria ja tocahacaxëti quiha” iquina. Parayamaquia. Jatihuahacaxëhi quiha jatiroha ca ëa yoati Quënëhacanish cabو ra —nëa tsi Jesu nëcaniquë.

<sup>38</sup>Jatsi jahuë rabëti bo nëcaniquë:

—Tsayapa, Ibobá. Nëá xo dos ca saipi bo ra —iquina.

Jatsi,

—Iquë pë —i Jesu niquë.

### Getsemaní Jesu bëhoxnina

*Mateo 26.36-46; Marcos 14.32-42*

**39** Xobo jiisbaya tsi quiha Maca Olivo Ya qui Jesu caniquë bëhoxhi na. Jahuë jabi quiha. Jasca, ja bëta bocani quiha jahuë rabëti bo ri.

**40** Cahax,

—Bëhoxcana, jochati ma tanamahacayamano ra —i jato qui Jesu niquë.

**41** Jatsi ori pistia jamépistia tsi Jesu caniquë bëhoxhi na. Basima quiha. Mënihax Dios qui chanitsijaniquë:

42—Mi qui pi jia no tsi naa johai ca tënëtiya mëbihuë, noho Jahépá. Tënëcasyamaxo ëa ra. Jama, jaha ë quëehai ca mi ayamano. Mi shina mi ano ra —i Jesu niquë bëhoxhi na.

**43** Jatsi ja qui naipá ca ángel jisiquiniquë chamahuaxëna. **44** Shina jii-jiitsi Jesu niquë bëhoxhi na. Jatsi ja bëhox-bëhoxrianiquë. Niscatsijani quiha. Jimi tioihai jascaria ja niscani quiha.

**45** Bëhoxhax ja joiniquë. Joihax jahuë rabëti bo qui ja bacaniquë. Oxa ja icani quiha cohuëhi na. **46** Jatsi,

—¿Jënihax oxacanai rë? Joicana. Bëhoxcana, jocha qui ma paquëyamano —i jato qui Jesu niquë.

### Jesu qui soldado bo tsaminina

*Mateo 26.47-56; Marcos 14.43-50; Juan 18.2-11*

**47** Jahuë rabëti bo ya jari chanihi Jesu iniquë. Chanijano tsi quiha nohiria misco bëcaniquë. Jato bëta Judas, naa doce ó ca huësti ca iniquë jaa ri. Jato mëpihi ja ini quiha Jesu qui. Cahëhax Jesu qui ja basimaniquë tatsoxëna. **48** Jatsi ja qui Jesu chaniniquë:

—¿Ea tatsohai pa? ¿Toca tsi soldado bo qui ëa mëaxëhai rë, naa Nohiria Baquë ë nori cato? —i Judas qui ja niquë.

**49** Ocapijahai ca jisi tsi,

—¿Noba saipí tsi jato tëpasxëhi ni noa, Ibobá? —i ja bëtanish ca rabëti bo niquë.

**50** Jatsi jato ó ca huësti cató toá ca arati ibo-iboria yonati paxtianiquë. Jahuë mënëcayá ca pahoqui paxtiahacani quiha.

**51** Jatsi,

—Iquë ra. Iquë ra. Iquinayamacana —i Jesu niquë.

Jatsi yonati pahoqui motsaxo tsi ja jënimahuaniquë.

**52** Jënimahuahax arati ibo bo, arati xobo obëso ca capitán bo, yosibo, tihi ca bëcanish cabو qui Jesu chaniniquë:

—¿Saipi bo, tēpasti jihui bo, tihi cabo jaya ni mato pa?  
 ¿Yomaxëni ca bichii jascaria éa bichi ma bëcana pa? <sup>53</sup>Jatiroha ca barí tsi mato bëta é i-ipaoyamëquë, arati xobó no. ¿Jéniriaxo tsi éa ma biyamahita, toá tsi é iquë no? Jishopë. Jaboqui mato xaba tsi xo naa rë. Jaboqui bëroria tsi yonahi quiha Satanás pë —i jato qui ja niquë.

<sup>54</sup>Jatsi Jesu qui ja tsamicaniquë. Tsamixo tsi ori ja bocaniquë arati ibo ba chama xobo qui.

### “Jesu cahëyamaquia” i Pedro nina

*Mateo 26.57-58, 69-75; Marcos 14.53-54, 66-72; Juan 18.12-18, 25-27*

Jesu basi tsi Pedró banahuaniquë raquéquí na. <sup>55</sup>Arati ibo ba chama xobo qui cahëxo tsi quiha soldado bá chihi maponiquë huënënë xo na. Tsamahax ja tsahocaniquë yohoxëna. Jasca, jato xéréquë tsi Pedro tsahoniquë jaa ri. <sup>56</sup>Chihi tapaí tsahojano tsi quiha xotacó Pedro jisniquë, naa toá ca yonati cato. Pedro ja tsayatsayani quiha.

—Jesu ya naa joni iquë ra —i xotaco niquë.

<sup>57</sup>Jatsi Pedró quëbiniquë:

—Jesu cahëyamahai ca éa xo naa ra, caí —iquiina.

<sup>58</sup>Jaquiréquë joní tsayaniquë. Tsayahax,

—Tonia Jesu rabëti huësti ca xo mia ra —i Pedro qui ja niquë.

Jatsi,

—Jahuë rabëti ma xo éa ra, joní —i Pedro niquë rë.

<sup>59</sup>Jaquiréquë huësti ca hora huinocaquë tsi,

—Tonia Jesu ya naa joni iquë ra. Nicacapa. Galileá joi jaya xo ra

—iriatsi joni huëtsa niquë.

<sup>60</sup>Jatsi Pedró quëbiniquë:

—E joma mi chanihaina ra, joní —iquiina.

Jari Pedro chanino tsi quiha patiari quëo-quëoniquë. <sup>61</sup>Jatsi Pedro quiri bësohax Jesú bëisniquë cohuëquí na. Jatsi Ibobá yoaha ca Pedró shinaniquë, naa “Tres tsi cahëyamaquia’ ixëqui mia rë, patiari quëonox pari no” i Jesu quë no. <sup>62</sup>Jatsi cacha Pedro caniquë. Cahax ja ara-araniquë rabihu na.

### Jesu qui jodioba yosibo quësonina

*Mateo 26.59-68; Marcos 14.55-64; Juan 18.19-24*

<sup>63</sup>Jatsi Jesu mahuatsi jaha bëso cabá huaniquë. Ja sëtiacaniquë. <sup>64</sup>Bëmapahax,  
 —¿Tsohuë mia aca? Noqui yoahuë ra —itsi quiha jaca niquë nicahi na.

65 Huéstima tsi Jesu ja ocahuacani quiha pë. 66 Huëaquë tsi baquishmarí tsi quiha nohiria yosibo, arati ibo ba chama bo, yoba tiisimacanaibo, tihi cabi catiniquë chaninaxëna. Jato bësojó tsi Jesu mëpihacani quiha toá tsi ja niino. Jatsi,

67 —¿Diós noqui raani ca Xabahamati Ibo ni mia ra? Noqui yoahuë ra —i Jesu qui chama bo niquë.

Jatsi Jesú quëbiniquë:

—“Jaahuë” i pi ë no tsi ëa chahahuayamaxëqui mato rë. 68 Jasca pi mato ë nicano tsi quëbiyamaxëqui mato tia. 69 Jama, basima tsi xo toa Dios chama ë bixëhaina ra, naa Nohiria Baquë ë nori cato. Chamaxëni ca Dios mënécayá tsi tsahoxëquia ra —i jato qui Jesu niquë.

70 Jatsi,

—¿Japa? ¿Dios Baquë ni mia ra? i jaca niquë jato tëquëta.

Jatsi,

—Jaahuë. Ja xo ëa ra —i Jesu niquë quëbihi na.

71 Jatsi ja næcacaniquë:

—Jahuë chani yoi ca no nicaquë ra. Jamë quësohi quiha ra. Ja pasomaha ca chanihai ca huëtsa no nicatima xo ra —i toá ca chama bo niquë.

### Pilato qui Jesu ja bocanina

*Mateo 27.1-2, 11-14; Marcos 15.1-5; Juan 18.28-38*

**23** <sup>1</sup>Jatsi jodioba chama bo tëquë joiniquë. Joixo tsi quiha Pilato qui Jesu ja bocaniquë. <sup>2</sup>Boxo tsi quiha Jesu qui quësotsijacaniquë pë:

—Janyama noba nohiria mëpihi quiha naa joni ra. Gobierno pasomaha xo ra. “Romanoba chama-chamaria qui impuestos parata ayamacahuë” i nohiria bo qui quiha. Jasca, “Nohiria Xabahamati Ibo, naa nohiria ba chama xo ëa” ii quiha pë —nëa tsi quiha Pilato qui jodioba chama bo næcaniquë.

<sup>3</sup> Jatsi Pilató Jesu nicaniquë:

—¿Jodioba chama-chamaria ni mia? —iquina.

Jatsi,

—Jaahuë —i Jesu niquë.

<sup>4</sup> Jatsi arati iboba chama bo, nohiria misco, tihi cabi qui Pilato chaniniquë:

—Yama tsi xo naa joní yoi ca anina iquia —iquina.

**5** Jama, jari Jesu ja ocahuacaniquë pë:  
 —Jodioba mai têquë xo tsi tiisimapama tsi romanobo  
 pasomaha nohiria bo caxahuahi quiha ra. Galilea mai pari tsi ja  
 chitahéhuaniquë tiisimaxëna. Jaquiréquë jodiobá mai qui ja cani  
 quiha. Jarohapa tsi nëa tsi ja johitaquë pë —i jaca niquë.

### Herodes bësojó Jesu niinina

**6** Jato nicahax,  
 —¿Galilea mai quima ax naa joni joni? —i Pilato niquë.  
**7** —Jaahuë —i nohiria bo quë tsi chama Herodes qui Pilató Jesu  
 raaniquë, Galileá ca nohiria bo Herodés yonani quëshpi na. Jabi  
 naatiyá tsi Jerusalén tsi Herodes ini quiha jaa ri. **8** Jatsi Herodes  
 raniniquë Jesu jiscatsi na. Jistiria Jesú acai ca ja jiscasni quiha. **9** Japi  
 Jesu ja nica-nicarianiquë. Mahitsa quiha. Quëbiyamaniquë Jesu.  
**10** Jabi Herodes ya tsi quiha arati iboba chama bo, yoba tiisimacanaibo,  
 tihi cabو mani iniquë jato ri. Jesu qui ja quëso-quësocaniquë pë.  
 Anomaria ini quiha ja qui ja quësocanaina. **11** Jatsi jahuë soldado bo  
 yaxo tsi Jesu mahuatsi Herodés huaniquë. Mahuaxo tsi quiha sahuëti  
 copixëni ca Jesu ja sahuëmacaniquë, chama-chamaria jisiria ca  
 manëmaxëna. **12** Jabi naama tsi Herodes, Pilato, tihi cabو caxanapaoni  
 quiha. Jaquiréquë tsi quiha ja rabënacani quiha.

### Jesu ja namëcascanina

*Mateo 27.15-26; Marcos 15.6-15; Juan 18.39, 19.16*

**13** Jatsi arati iboba chama bo, rëquëninicanaibo, nohiria bo, tihi  
 cabو Pilató quënaniquë catiti.

**14** —E qui naa joni ma bëquë ra, “Romanoba gobierno pasomaha  
 nohiria bo mëpihai ca tsi xo naa” iquiina. Jama, ë nicaquë mato  
 bësojo xo na. Mahitsa ja qui quësoqui mato pë. Yama tsi xo toa  
 janyama ca ja acana iquia. **15** Jascaria, ja qui quësoyamahi quiha  
 Herodes ri, jahari noqui ja raaha quëshpi na. Ja namëhacatima  
 xo ra. Yama tsi xo toa janyama ca ja anina ra, namëhacati. **16** Japi  
 rashaxëquia. Rashaxo tsi paquëmaquia —i jato qui Pilato niquë.

**17** Jabi Pascua fiestá tsi huësti ca achiqui ca ja paquëmapaoni quiha.

**18** Jatsi quénatsi nohiria têquétá huaniquë:

—Jesu ahuë ra. Barrabás paquëmahuë —iquina.

**19** Jabi preso qui Barrabás nanëhacani quiha, yacata xo tsi  
 gobierno pasomaha nohiria bo ja mëpini iqui na. Iquinaxo nohiria

bo ja ani quiha. <sup>20</sup>Jama, Pilató Jesu paquëmacasni quiha. Mahitsá nohiria bo qui ja chani-chaniniquë rë.

<sup>21</sup>—Cruzó tooxahuë. Cruzó tooxahuë —iriatsi nohiria bo niquë.

<sup>22</sup>Jatsi nohiria bo qui Pilato chanitëquëniquë:

—¿Jéni ni ra? ¿Jahuë janyama ca ja ani? Ja namëhacayamati xo ra iquia. Yama tsi xo toa janyama ca ja anina ra. Japi è rashano. Rashaxo tsi paquëmaxëquia —i jato qui ja niquë.

<sup>23</sup>Jama, bamayamaniquë nohiria bo pë. Joi pistiamá tsi quiha,

—Cruzó tsi tooxahuë. Cruzó tsi tooxahuë —i jaca niquë.

Jarohapa tsi jato joi pacotsa iqui tsi jato qui Jesu ja mëaniquë ja acano. Jatsi,

<sup>24</sup>—Ja namëhacati xo —i Pilato niquë, jaha ja quëëcani jascaria.

<sup>25</sup>Jatsi jato qui gobierno pasomaha inish ca Barrabás, naa nohiria ati ibo preso quima ja paquëmaniquë. Jama, Jesu jato qui ja mëaniquë ja namëhacano.

### Cruzó tsi Jesu tooxahacanina

*Mateo 27.32-44; Marcos 15.21-32; Juan 19.17-27*

<sup>26</sup>Ori cruz Jesu mëpipama tsi quiha joni, naa Simón Cirene icanai ca qui ja tsamicaniquë Jesu cruz iati. Jerusalén qui jicohi ja ini quiha, ja tsamicaquë no. Jabi jahá cruz ja janacani quiha Jesu cho iati. <sup>27</sup>Jabi huéstima ca nohiria bá Jesu banahaniquë. Jato xérëquë tsi araconacanai ca yoxa bo iniquë jato ri noihi na. <sup>28</sup>Jatsi jato quiri Jesu bësohaca tsi ja chaniniquë:

—Ea iqui tsi arayamacahuë, Jerusalén ca jahi bá. Tënëxëqui mato ri. Jasca mato xocobo ri. Ja tahëhax aratsicahuë. <sup>29</sup>Joxëh quiha tënëti xabaca rë. Toatiyá tsi “Shomaria tsi xo baquë yama ca yoxa bo ra” icaxëcani quiha nohiria. <sup>30</sup>Toatiyá tsi maca bo qui quëanaxëhi quiha nohiria, “Noqui maxëni paquëcahuë. Noqui mapacahuë” iquiina. <sup>31</sup>Jabi nëca pi ëa, naa mëstëxëni ca ja tënëmacano tsi ćjenahuariaxëhi ni Dios chahahuayamacanaibo qui? —nëa tsi Jesu nëcaniquë.

<sup>32</sup>Jasca dos ca caxaxëniria ca joni bo ri ja bëcaniquë Jesu ya namëxëna. <sup>33</sup>Mapo Xao Ya icanai ca qui cahëxo tsi quiha cruzó tsi Jesu ja tooxacaniquë. Jasca, ja bëta dos ca caxacanaibo tooxahacani quiha jato ri. Huësti ca jahuë mënëcayá no; huësti ca jahuë mëxojó no. <sup>34</sup>Jatsi Jesu chaniniquë:



*Jesu tooxahacanina*

—Jato jocha shina-bënöhuë, noho Jahëpá. Ja acanai ca cahëyamacani quiha rë —i Jesu niquë.

Jatsi jahuë sahuëti bo soldado bá biniquë. Bixo tsi quiha jato xérëquë xo tsi jahuë sahuëti bo ja oquëxhuacaniquë i-ihai cató no.

35 Jasca toá tsi nohiria bo niiniquë tsayahí na. Toá tsi ini quiha jodioba chama bo jato ri, mahuahi na. 36 Ja qui mahuani quiha soldado bo ri. Ja qui ja bëcanaca tsi mocaria ca jënëria ja qui ja acaniquë ati. Jatsi,

37 —Jodioba chama-chamaria pi iqui tsi mimë xabahamahuë —i jaca niquë.

38 Jatsi jahuë mapo maxcacha naa chani janahacaniquë: “Jodioba chama-chamaria xo naa” iquiina.

***Jesu quiri yomaxëni ca bësonina***

39 Jatsi Jesu tapaí ca tooxahacanish ca huëstitá ocahuaniquë jaa ri. Mahuahax,

—¿Xabahamatí Ibo ni mia? Mimë xabahamahuë. Jaquirëquë noqui xabahamahuë ra —i Jesu qui ja niquë.

40 Jama, tooxahacanish ca joni huëtsá raahaniquë:

—¿Dios qui raquëyamahai? Nëa rësohi quiha mia ra, naa joni jascaria. <sup>41</sup>No copihacaquë, no ani ca yoi ca quëshpi na. Jama xo naa joni ra. Yama tsi xo toa janyama ca ja anina ra —i ja qui ja niquë.

<sup>42</sup>Jatsi Jesu qui ja chaniniquë:

—EA shina-bënoyamahuë, Jesú, naa mi otohai ca qui mi jicoquë no —iquiina.

<sup>43</sup>Jatsi ja qui Jesu chaniniquë:

—Mia parayamaquia. Jaboqui ë bëta-xëhi quiha mia ra tërohamá caba ití no —iquiina.

### **Jesu nanina**

*Mateo 27.45-56; Marcos 15.33-41; Juan 19.28-30*

<sup>44</sup>Jabi matoroco bari tsi ja iniquë, mai tëquë tsëmonaquë no. Tres hora no tsi ja baquishni quiha. <sup>45</sup>Jisiquiyamaniquë bari ra. Jasca, arati xobó ca rotamë ca quëbëti raiti jaxcahacaniquë. <sup>46</sup>Jatsi Jesú quënaniquë:

—Mi qui noho shina aquia, noho Jahëpá —iquiina.

Chanihax ja naniquë. <sup>47</sup>Ocapijani ca jisi tsi quiha toá ca niihai ca capitán Diós oquëhuaniquë,

—Mëstëxeni ca joni ja iquë tia —iquiina.

<sup>48</sup>Jesu namëhai ca jisi tsi jahari jato xobo qui quëtsonish ca nohiria bocaniquë. Cohuë ja icani quiha. <sup>49</sup>Jasca, basi tsi quiha Jesu rabëti bo tëquë mani iniquë. Toá tsi ini quiha Galilea ax ja bëta bëcanish ca yoxa bo ri. Basi xo tsi naa jahuë bo tëquë ja tsayacani quiha raquëhi na.

### **Jesu maihuahacanina**

*Mateo 27.57-61; Marcos 15.42-47; Juan 19.38-42*

<sup>50</sup>Tobi joni shinajjaxëni ca iniquë, naa José icanai cato. Jodioba yobahai ca yosibo xatë ja ini quiha. <sup>51</sup>Jabi Jesu toa jodioba chama bá acasquë tsi quiha jato ati yoba pasomaha ja chanini quiha.

Jasca, yaca Arimateá tsi ja raca-racani quiha jodioba maí no. Jabi Diós nohiria bo otohai ca ó pasohi ja ini quiha jaa ri. <sup>52</sup>Jabi Pilato qui José caniquë. Caxo tsi quiha Jesu yora ja bënaniquë maihuati.

<sup>53</sup>Jatsi Jesu yora ja botëmaniquë. Botëmaxo tsi quiha ja yaboniquë raiti miro cató no. Yaboxo tsi quiha maxax ó ca quini ó tsi, naa huéyohaca ca quini ó tsi ja jananiquë. Maihuati quini paxa ja ini

quiha. Jari jaxara janahacayamani quiha yora. <sup>54</sup>Jabi pascua fiesta rohahuati bari ja iniquë, Jesu ja maihuacaquë no. Jodioba joiti bari chitahëpaimaria ini quiha.

<sup>55</sup>Jabi José ya bocani quiha yoxa bo ri, naa Jesu ya Galilea ax bëcanish cabو. Jahuë mai ja jiscani quiha. <sup>56</sup>Jaquirëquë jato xobo qui ja bacacaniquë perojome, yora chëxati, tihí cabو rohahuaxëna. Jama, jahari jahuë yora rohahuahi canoma ja icani quiha, jato joiti bari chitahëni nori iqui na. Japi toa barí tsi quiha ja joicaniquë jato jodioba yoba tahëhax na.

### Jesu bësotëquënina

*Mateo 28.1-10; Marcos 16.1-8; Juan 20.1-10*

**24** <sup>1</sup>Domingó tsi Jesu maiquini qui yoxa bo bacaniquë.

Baquishmari ja ini quiha. Perojome bo ja jayacaniquë, naa ja rohahuahacanish ca perojome yora chëxati. <sup>2</sup>Jahuë maiquini qui cahëxo tsi quiha jahuë maiquini quëbëti maxax chahitaxëni ca ja yopacaniquë. Bahama ja tarahacani quiha ra. <sup>3</sup>Maiquini qui jicoxo tsi quiha Iboba yora ja yopacaniquë. <sup>4</sup>Yama a. Jatsi,

—¿Jahuënia cara ca jahuë yora sa? —i jaca ni quiha yopahax na.

Shinajahuacano tsi quiha jato tapaí niitapiniquë dos ca ángel bo. Joni jisiria ca ja icani quiha. Bajra-bajrani quiha jato raiti, canapa jascaria. <sup>5</sup>Jatsi raquëníquë yoxa bo tsayahax na. Raquëhax jato bësojó ja rënicaniquë.

Jatsi jato qui ángel bo chaniniquë:

—¿Jéniria xo tsi maiquini xo tsi bësohai ca mëracanai pa? <sup>6</sup>Yama xo ra. Ja tëronojaquë ra. ¿Jahuë mato ja yoani, Galileá tsi mato bëtaquí na? <sup>7</sup>“Jochacanaibo qui mëahacaxëti xo Nohiria Baqué, cruzó tsi ja tooxahacano” ¿i ja yamayamani? “Tres bari quirëquë bësotëquëxëquia” ¿i ja yamayamani? —nëa tsi yoxa bo qui ángel bo nëcaniquë.

<sup>8</sup>Jatsi Jesú yoani ca yoxa bá shinaniquë. <sup>9</sup>Shinaxo tsi quiha jahuë maiquini ja jisbayacaniquë. Jahari jato xobo qui ja bocani quiha. Xobo qui cahëxo tsi ángel jato yoani ca tëquë ja yoacaniquë Jesu once ca rabëti bo qui. Tëxë bo tëquë yoahacani quiha jato ri. <sup>10</sup>Jabi Dios Chani chitahëhuati ibo bo yoanish ca yoxa bo tsi xo naa: María Magdalena, Juana, Jacobo jahëhua María, jato bëta ca yoxa huëtsa bo, tihí cabو ini quiha, naa jahuë maiquini qui bocanish cabو. <sup>11</sup>Jama, yoxa bo nicaxo tsi quiha Jesu rabëti bá chahahuayamaniquë, ja paracanai ca quëscahuaquí na.

<sup>12</sup>Jama, Pedro joiniquë jisi caxëna. Jahuë maiquini qui ja jabaniquë. Maiquini qui cahëhax ja tētoniquë jaxara tsayaxëna. Yabohaca ca raiti roha ja jisniquë. Yora yama. Jatsi xobo qui jahari ja caniquë jēnipijani ca qui ratëhi na.

### Emaús yaca quinia ca bahi

<sup>13</sup>Toa barí tsi Emaús icanai ca yaca qui dos ca joni, naa Jesu banahuacanaibo cahi iniquë. Basiriama, naa once kilómetros Jerusalén quima toa yaca ini quiha. <sup>14</sup>Jerusalén ocapijahitaha ca tēquë yoati chanihi ja icani quiha. <sup>15</sup>Jabi ja chanicano tsi jato qui Jesu riiniquë. Riihax jato bëta cotsijaniquë. <sup>16</sup>Jesu tsayaquí tsi jahuë bëmana ja cahëyamacani quiha. <sup>17</sup>Jatsi jato qui Jesu chaniniquë:

—¿Jahuë chanibonacanai? —iquiina.

Jatsi ja niicaniquë. Cohuë jato bëmana ini quiha. <sup>18</sup>Jatsi jato ó ca huësti cató quëbiniquë, naa Cleofás icanai cato.

—¿Naa bari no tsi Jerusalén ca jēnipijahitaha ca jahuë bo mi nicayamahitaha pa, toá tsi shishoquí na? Tonia mia roha tsi xo toa nicayamahaina ra —i Jesu qui ja niquë.

<sup>19</sup>Jatsi,

—¿Jahuë jahuë bo ni? —i Jesu niquë.

Jatsi ja quëbicaniquë:

—Nazaret ca Jesu yoati jahuë bo ra. ¿Toa jahuë bo mi nicayamahitaha pa? Dios Chani yoati ibo-iboria naa joni iquë ra. Anomaria ca jisti bo ja ani quiha. Jasca, Dios, nohiria tēquë, tihi cabø qui jiaria ja yoahai ca chani ini quiha.

<sup>20</sup>Jama, noba arati ibo bo, noba chama bo, tihi cabá mëaniquë romanobo qui, ja namëhacano iquish na. Japi cruzó tsi ja tooxahacahitaquë rë. <sup>21</sup>“Tonia noqui Israél cabø xabahamahai ca tsi xo naa ra” i no paoniquë. Noqui Israél cabø mëbihi jonish ca ja iqui ca quëscahuano huahitaquë ra. Jatsi ja nahitaquë rë. Jasca, huinocaquë tres bari. <sup>22</sup>Jama, jaboqui noqui xatë ca yoxa bá noqui ratiaquë. Naa baquishmarí tsi quiha jahari jahuë maiquini qui yoxa bo huësti huësti cabø bocaquë. <sup>23</sup>Jahuë yora ja yopacana quiha. Yama a. Yopahax jahari ja bëcaquë noqui yoaxëna. “Angel bo no jisquë ra. ‘Bëso xo ra’ icani quiha” i noqui toa yoxa bo quë pa. <sup>24</sup>Japi jahuë maiquini qui huësti huësti ca joni bo bocaniquë jato ri, jiscatsi

na. Yama a ra; naa yoxa bá yoaha jascaria —nëa tsi Jesu qui ja nëcacaniquë.

25 Jatsi jato qui Jesu chaniniquë:

—Cahëtimaxëni ca joni xo mato rë. Dios Chani yoanish cabá yoani ca tëquë chahahua-péniria ca mato xo naa. <sup>26</sup> ¿Naa jahuë bo tëquë tënëti nori Xabahamatí Ibo iyamayamani? Toca tsi jahuë oquë ja biquë ra —iquina.

27 Jatsi jamë yoati tsi Quënëhacanish cabá yoani tëquë bërohuatsi Jesú huaniquë. Jariapari tsi jamë yoati Moisés yamabá quënëni ca jahuë bo ja bërohuaniquë. Jaquirëquë jamë yoati Dios Chani yoanish cabá quënëni ca jahuë bo ja bërohuaniquë. <sup>28</sup> Jatsi yaca qui ja cahëcaniquë. Ori Jesu cahai ca quëscahuahi tsi,

29 —No bëta mi chitëno ra. Caquë bari —i Jesu qui jaca niquë.

Jatsi jato xobo qui Jesu jiconiquë jato bëta chitëxëna. <sup>30</sup> Jatsi jato bëta Jesu oriquiniquë. Oriququí tsi quiha mapari ja biniquë. Ja quëshpi tsi “Gracias” ixo tsi ja bëquëxniquë. Bëquëx-xo tsi quiha jato qui ja mëaniquë piti. <sup>31</sup> Tocajaquë tsi quiha Jesu ja iqui ca ja cahëtапicaniquë. Jatsi Jesu yamatapiniquë. <sup>32</sup> Jatsi chaninatsijacaniquë:

—Anomaria iqui quiha jahuë chani ra, naa bahi xo tsi noqui ja yoohana. Dios Chani noqui ja bërohuano tsi ¿noba shina huahanayamaha pa? —iquina.

<sup>33</sup> Jatsi ja joitapicaniquë. Jerusalén qui bacatsijacaniquë. Jesu once ca rabëtiria bo, Jesu banahuacanaibo huëtsa bo, tihi cabo jisi ja bocani quiha jato yoaxëna. Cahëhax tsi quiha,

34 —Jabija. Bëso xo ra. Simón qui ja jisiquiquë ra —i jato qui jaca niquë.

35 Jatsi bahi ó ca jenipijaha ca ja yoacaniquë jato ri, naa dos ca joni bo. Yoahax,

—Mapari ja bëquëxquë tsi Jesu ja iqui ca no cahëtapiquë ra —i jato qui jaca niquë.

### **Jahuë rabëtiria cabo qui Jesu jisiquinina naquëtë no**

*Mateo 28.16-20; Marcos 16.14-18; Juan 20.19-23*

36 Ocapijani ca jahuë bo yoati ja chanicano tsi jato xërëquë tsi Jesu niitapiniquë. Niihax,

—Raquëyamacana —i jato qui ja niquë.

37 Bërocamaqui ja iqui ca ja quëscahuajahuacani quiha raquëquí na. Mëmëtsijacaniquë ra. <sup>38</sup> Jatsi jato qui Jesu chaniniquë:

—¿Jënhax tsi ratëcanai pa? ¿Jënixo tsi äa yoi ja nori ca shinayamacanai? <sup>39</sup>Noho mëquënë, noho tahë, tihi cabo tsayacahuë. Ea yoi xo naa ra. Ea motsacahuë. Nami, xao, tihi cabo jayama xo bërocamaqui ra. Nami ä jaya ca jisqui mato ra. <sup>40</sup>Toca tsi chanipama tsi jahuë mëquënë, jahuë tahë, tihi cabo jato ja jismaniquë. <sup>41</sup>Jatsi ja ranicaniquë ra. Jari shinati pi ja cahëyamacani quiha. Ja ratëcaniquë. Jatsi,

—¿Jahuë ya ni mato piti? —i jato qui Jesu niquë.

<sup>42</sup>Jatsi ja qui imaha ca sani ja acaniquë piti. <sup>43</sup>Bichi tsi jato bësojo xo tsi ja piniquë. <sup>44</sup>Pihax jato qui Jesu chaniniquë:

—Mato bëtapama tsi èmë yoati tsi Quënëhacanish cabotëquë è oyayamëquë. “Jatihuahacati iqui quiha èmë yoati Quënëhacanish cabotëquë” i mato qui è yamëquë —iquiina.

<sup>45</sup>Jatsi bëroria tsi Quënëhacanish cabotëquë ja tiisimaniquë ja cahëyoicano iquish na. <sup>46</sup>Jatsi ja chaniniquë:

—Jabi äa yoati ja quënëcanni ca tsi xo naa: “Tënëti nori quiha johai ca Xabahamatí Ibo” i jaca ni quiha. “Tres bari quirëquë rësonish cabotëquë quiha” i jaca ni quiha. <sup>47</sup>Jatsi, “Nohiria bo tëquë qui jahuë xabahamatí Chani yoahacaxëti xo, ja quiri bësocanaiba jocha masahacano” i jaca ni quiha. Jabi Jerusalén pari tsi naa chani yoahacaxëti xo. <sup>48</sup>Jabi naa ma jisxëhai ca jahuë bo ma yoaxëti xo. <sup>49</sup>Jabi jaboqui Espíritu Santo mato qui raaxëquia, noho Jahépá yoani jascaria. Yacatá tsi chitëcana, mato qui mana ca chama joxëquë rohari. Toa chama ma jayano —nëa tsi jato qui Jesu nëcaniquë.

### Mana Jesu tërononina

Marcos 16.19-20

<sup>50</sup>Jaquirëquë Jerusalén quima jahuë rabëti bo Jesú boniquë, yaca Betania quiri. Toa xo tsi quiha jahuë mëquë Jesu tëroniquë jato shomahuaquí na. <sup>51</sup>Chanipama tsi nai qui tëronotsijaniquë. Jato quima ja bichiquiniquë nai qui. <sup>52</sup>Jatsi ja mënicanaca tsi Jesu ja ocahuacaniquë. Ocahuahi tsi rani tsi jahari Jerusalén qui ja bocaniquë. <sup>53</sup>Arati xobó tsi ja i-ipaocani quiha Dios oquëhuahi na.